

ASO LULU, 20 AOKUSO 2014

Na nofoia le Nofoa e le Fofoga Fetalai i le itula e 9.00 i le taeao.

Tatalo.

“TUSI FAAMAONIA O LE FILIFILIA

E TUSA AI ma aiaiga o le Vaega e 80 o le Tulafono o Faiga Palota 1963, **O A’U, TUI ATUA TUPUA TAMASESE EFI**, **Ao o le Malo**, ua ou tuuina atu nei le Tusi Faamaonia o le Filifilia o le ua taua i lalo ua filifilia e avea ma Sui Usufono o le Palemene o le Itumalo Faaalaalafaga o Gagaifomauga Numera 1:

Sui Tauva:

FAIMALOTOA, Kika Iemaima Stowers.

Tuuina atu i lo’u nei Lima i lenei Aso Gafua, aso 18, o Aokuso 2014.

(Sainia): Tui Atua Tupua Tamasese Efi
AO O LE MALO.”

FOFOGA FETALAI: A o le i afio mai le sui usufono fou o le Palemene i luma o le Laulau mo le Tautoga, ou te valaau atu i le sui usufono fou mo Gagaifomauga Nu.1 ina ia tulai i luga a o ou faitauina le Tulafono Laititi o Amio Taualoa Faapalemene.

“TULAFONO LAITITI O AMIO TAUALOA FAAPALEMENE.

FAAMATALAGA O FAAMOEMOEGA.

O le matafaioi patino a Sui Usufono uma o le Palemene o le tausisia lea o tulaga aupito i sili ona maualuga o uiga taualoa, e puipuia ma faatumauina ai le mamalu o le Palemene ma faia ai taumafaiga uma e faatumauina ai aiaiga autu o le Faavae.

O aiaiga autu ua taua ua faamoemoe e tuuina atu ai ni taiala i, ma ni tulaga i Sui Usufono taitasi o le Palemene, e tatau ona faatino ai o latou tiute ma matafaioi i se tulaga toatasi po o i le aotelega.

O AIAIGA AUTU.

- (1) Faamaoni i le atunuu ma ona tagata.
O Sui Usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa, ana faalapotopotoga ma ona tagata.
- (2) Faaaloalo i Tulafono.
E tatau i Sui Usufono uma ona tausisia tulafono a Samoa ma puipuia aiaiga autu o lo o i totonu o le Faavae.
- (3) Faaaloalo i Tagata uma.
E tatau i Sui Usufono uma ona faaaloalo i isi Sui Usufono, tagata lautele ma ofisa maufofi o le Malo faapea foi ma le galue i tulaga mamalu, faamaoni, le le faaituau aemaise le amiotonu i taimi uma.
- (4) Faatinoga Lelei o Pule.
E tatau i Sui Usufono uma ona:
 - (a) Faatulaga a latou mataupu totino;
 - (b) Faaoga so o se faamatalaga ma faamatalaga uma na maua mai i o latou tofi faale-malo; ma
 - (c) Faatinoina o so o se malosi po o pule na maua i o latou tofi faale-malo, mo na o le lelei o tagata lautele ma pe afai e tulai mai o so o se tulaga talafeagai ma se tulaga moni e feteenai ai aia, pe i tulaga tau tupe a le Sui Usufono lava ia, tupe faaletulafono po o se aia a le Sui Usufono e tatau ona manaomia e faasilasilaina atu ma le faia o so o se laasaga e aveese ai sea feteenaiga po o le le auai atu i lena feutagaiga tau pisinisi.

Manaoga Faapitoa mo Minisita ma Isi Tagata o lo o Umia Tofi Faale-Malo.

O Sui Usufono uma o lo o umia tofi faapalemene o so o se ituaiga ua manaomia e usitaia atoatoa aiaiga autu e pei ona faamatalaina i luga ma e le tatau, i lalo o so o se tulaga ona faia o so o se faaiuga po o le tuuina atu o se malosi o so o se ituaiga, po o le a lava, e tusa ai i se mataupu o le a maua ai e le Sui Usufono so o se faaopoopoga i ana meatotino po o se faamanuiaga.

FAASALAGA.

O le solia o leni tulafono laititi o le a ono tagofia e le Komiti o Tulaga Aloaia ma Amio Taualoa po o e pei ona o le a fuafuaina e le Palemene.”

Na fofogaina e le Fofoga Fetalai Tulafono Laititi o Amio Taualoa Faapalemene a o tulai le sui usufono fou.

FOFOGA FETALAI: Ou te valaau atu i lau Afioga i le sui usufono mo Gagaifomauga Nu.1 e te afio mai i luma nei i le Failautusi o le Fono Aoaofaitulafono aua le faatinoga o lau Tautoga.

E tuuina atu e le Afioga i le Failautusi o le Fono Aoaofaitulafono upu o le Tautinoga, ona tau lava lea e lau Afioga lou suafa ma faasolo ai le Tautinoga ua tuuina atu.

FAATAUTOINA O LE SUI USUFONO FOU

O le sui usufono fou na faia lana Tautoga o le Loto Faamaoni.

1. FAIMALOTOA Kika Iemaima Stowers.

Tautoga o le Loto Faamaoni

O A'U o....., ou te tauto i le Atua e Ona le Malosi uma lava, o le a ou faamaoni ma tauaveina tonu le lotonuu faamaoni i le Malo Tutoatasi o Samoa, ma o le a ou faataunuuina ma le tataua ai ma le faamaoni ou tiute e avea ai o se sui usufono o le Palemene o Samoa. Ia fesoasoani mai le Atua ia te a'u.

FOFOGA FETALAI: Ou te talosaga atu i le paia ma le mamalu o le Palemene aemaise Samoa ua potopoto, tatou faaali le talisapaia i le patipati o outou aao.

Na faaalua le fiafia o sui usufono o le Palemene i le patipati o latou aao e faafeiloai ai le sui usufono fou ua filifilia.

FOFOGA FETALAI: Ou te manatu o le a avea ia lou leo e fai ma fofoga tau molimoli o le Palemene o Samoa i le afio atu o le Afioga i le Taitai o le Malo ma le paia i lana Kapeneta mamalu, aemaise lea tala-na-atoa i le afio o lana Afioga i le Taitai o le Itu Agai aemaise sui usufono mamalu uma o le Palemene o Samoa, matou te faafeiloai atu ai i lau Afioga i le Tamaitai Faipule, Tofa Faimalotoa Kika Stowers Ah Kau. Afio mai ma tala mai aao i le tatou Palemene i lenei taeao.

E manatu foi o lea e faafogafoga Samoa i ona tulaga faalupu. O le paia i Aiga ma latou Tama, o Tama ma o latou Aiga, le Usoga a Pule ma Tumua, Itua ma Alataua, Aiga i le Tai ma le Vaa o Fonoti.

E le faagaloina le tapuaiga a le Motu i Sasae aua Sua ma le Vaifanua, Fofa ma Aitulagi, Saole ma Saleaamua ma le Launiu na Saelua, Tama a le Manuatele ma le Faleagafulu o le Motu.

O paia ia o Taotoga I'a Sa aua Samoa na lua i ona tulaga faalupu, ae matou te talitonu e tele taeao e le lau taeao, e tele foi aso e le lau aso, a o le aso o le aso nai Amoa ua lau i ula ae pou i toa. O le aso o le sailiga tofa aua le tuua o le Malo e se tasi o Tulatoa o le atunuu sa militino faatasi i totonu o lenei Paeaiga.

Le paia e ma le maualuga o le itumalo o Gagaifomauga Nu.1, le afifio aua Sao e Fa, Aiga Sa Umalau, le Ati Pouniu ma le Faasau, Susu mai

Lilomaiava ma vae o le Nofoafia. Maliu mai oe le Tulafale Lavea, o oe o le Matua o lo ta itumalo ma ou aiga, e te tausii vaatele aua tupu o le Itu ma le Alii o le Itu aua o oe na e mua i malae, ae tainane le paia ia Taito ma ona alo o le malu o Finao. Maliu mai Tauasa ma le lauti na laulelei i faleupolu. O le paia maualuga lena o lo tatou itumalo, e momoli atu le agaga faafetai tele ona o la outou filifiliga faatupu ma le faatamalii.

O le Maota o Samoa e le soona tatūtū vae i ai se tagata, leaga o le atunuu ua uma ona tofitofi, o le tagamamanu a Samoa e omai e lipoi aua se manuia o Upufai o Malo a lo tatou atunuu.

Faimalotoa, o ou mama na, e momoli atu a matou faamanuiaga ma moomooga alofa. O le a tatou galulue faatasi ona o le aso lena ua toe atoa ai pou o le fale o le atunuu ina ia ave o tatou ola ia aoga mo le Alii ma Ana feau, ave o tatou aso o totoe tatou te tautua ai le Atua ma Lona finagalo.

Matou te faafetai atu foi i le faatasi mai o le paia ma le mamalu o aiga, uo ma e masani aemaise le paia o Samoa ua potopoto, faafetai le tapuai.

E faafetaia foi sui uma sa tauva i lena faiga palota. E fetāa'i lava tama a o le uso, ae tu'i le mulipapaga ma ave la outou faamanuia i le ua tusi aao i ai le itumalo aua e manuia faiva pe a tapuaia.

O so matou leo lena ma le agaga faaaloalo i lena vaega o le aso.

TUUNA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. P.P.2014/2015 Nu.111, Lipoti Faaletausaga a le Iunivesite Aoao o Samoa mo le Tausaga Faaletupe 2012-2013.
2. P.P.2014/2015 Nu.112, Tali atu a le Malo i le P.P.2013/2014 Nu.105, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P.2013/2014 Nu.40, Lipoti Faaletausaga a le Pulega o Tagata Tafafao Maimoa mo le Tausaga Faaletupe Faaiiina aso 30 Iuni 2012.
3. P.P.2014/2015 Nu.113, Tali atu a le Malo i le P.P.2013/2014 Nu.131, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P.2011/2012 Nu.85 & P.P.2012/2013 Nu.72, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe Faaiiina aso 30 Iuni 2010 ma le Tausaga Faaletupe Faaiiina aso 30 Iuni 2011.
4. P.P.2014/2015 Nu.114, Tali atu a le Malo i le P.P.2013/2014 Nu.99, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P.2012/2013 Nu.80, Faamatalaga o Sini Autu o Fuafuaga Autasi a le Pulega o Faailoga ma Tusi Pasi Tauloa a Samoa 2013-2015.

TUUNA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma T.T.51(5).

1. P.P. 2014/2015 Nu. 107, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le Tulafono Tau Faaofi o Auaunaga Lagolago Faa-Soifua Maloloina 2013.
2. P.P. 2014/2015 Nu. 108, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le Tulafono Tau Faaofi o Teuteuga o le Tulafono o Fomai 2013.
3. P.P. 2014/2015 Nu. 109, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le P.P. 2012/2013 Nu. 36, Faaaliga Manino Faaupufai a le Fonotaga a Taitai o Atunuu o le Fono Aoao a Malo Afaatasi i le Puipuiga ma le Taofiofia o Faamai Le Pipisi.
4. P.P. 2014/2015 Nu. 110, Lipoti a le Komiti o Galuega, Felauaiga ma Siosiomaga i le Tulafono Tau Faaofi o Tagata Tomai Tau Palama 2013.

TULAFONO TAU FAAOFI O LE OFISA O TIUTE 2014 - iloiloga auiliili

FOFOGA FETALAI: Talu ai ona ua ou taulimaina le Tusi Faamaonia o le Tulaga Faanatinati ma ua maea foi ona sainia e Lana Afioga Mamalu, O Le Ao o le Malo e uiga i le Tulafono Tau Faaofi leni, o lea o le a sagai atu loa le Palemene mo le iloiloga auiliili.

E tusa ai ma le Tulafono Tumau 102 e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Faaaogaina.

Faamaonia.

FUAIUPU 4: Auaunaga tau le Tiute a Samoa.

Afioga Hon PALUSALUE FAAPO II (Taitai o le Itu Agai): Lau Afioga i le Fofoga Fetalai.....

FOFOGA FETALAI: Se i tulai mai lau Afioga i le Taitai o le Itu Agai.

Afioga Hon PALUSALUE FAAPO II: E muamua ona ave le faamalo ma le faafetai i le tatou sui usufono i lenei taeao, ia o moomooga alofa o lenei itu ia maua sau tofa aua le nofoa o le itumalo, faamalo tau, ia faamalo foi le onosai.

Ae ua ou tulai atu lau Afioga i le Fofoga Fetalai i le fuaiupu lea, lea e te silasila oka se Tulafono, o lea foi la o le a taumafai lenei itu ina ia fesili i fuaiupu uma ona o le taua o le Tulafono pei ona fai atu ananafi, sa tatau ona ave le Tulafono Tau Faaofi lenei i le Komiti e silasila totoa i ai ma lauliliuina.

O le Fuaiupu e 4, lea ua ave le malosiaga i le Pule Sili o le Tiute aua le tofiaina o lana aufaigaluega. O le malosiaga la lea e ala ai ona ou fesili, pe o le a faapefea le tulaga agai i le tagata e pulea po o le PSC le Public Service Commission, o le latou matafaioi o le tofiaina o le aufaigaluega a le Malo? O lea la ua aumai i i le Fuaiupu e 4, o lea ua ave le malosiaga i le Ofisa Sili na te tofia ai lava lana ia aufaigaluega. O le mea la lea e fesili atu ai i le Minisita, ina ia faamalamalama mai le tulaga lea, aua o lo o i lalo o le Tulafono a le PSC, o latou e silasila totoa i le faiga po o le tofiaina o le aufaigaluega, o avanoa e tulai mai, o avanoa e faatumu, ia o lea ua aumai nei le Tulafono i le Fuaiupu 4, ia ua ave le malosiaga i le Pule Sili o le Tiute. Pei o le fesili lea e manaomia ai se faamalamalamaaga a lau Afioga i le Minisita.

FOFOGA FETALAI: Malo. Faafetai o lea ua maua se finagalo o le sui usufono mamalu. Lau Afioga i le Minisita.

Tofa Hon TUILOMA LAMEKO (Minisita mo Tupe Maua): Lau Afioga i le Fofoga Fetalai faapea sui usufono mamalu o le Maota, e tulai atu e fai foi se manatu e faatatau i le fesili a le sui usufono mamalu. A silasila lau Afioga i le Tulafono Tau Faaofi aemaise foi o le faaupuga o lo o i ai, e leai se vaega o i ai le tulaga e aveesea ai le pule mai le Public Service Commission. Pei ona ou taua ananafi, o le Tulafono o lo o fuafua o le aumaiga o vaega uma o le ala tele foi lea, ona o le aumaiga o vaega uma o lo o i le vaega o le autu o le Tulafono o Tiute 1977, o lona uiga, e leai se vaega o i ai, afai foi o i ai se vaega faapena, e i ai lava tulaga aloaia e mafai ona soloia ai le tulaga e uiga i le paoa o le a i le Public Service. Ma le faaaloalo.

Afioga Hon PALUSALUE FAAPO II: Lau Afioga i le Fofoga Fetalai, o lou avanoa lona lua. A foi e lua a tatou avanoa e tusa ai ma le Tulafono Tumau?

FOFOGA FETALAI: Ia e te le tau faamanatu mai o lea ou te iloa. A e tu loa i luga saunoa ae le o lou tau faamanatu mai.

Afioga Hon PALUSALUE FAAPO II: Ia ma le faaaloalo o lea ua saunoa manino le Afioga i le Minisita, ae a silasila i le puipui (3) o le Fuaiupu 4 o lona o lo o manino mai ai lava, o lo o manino ai i le puipui (3), e mafai ona ou faitauina atu e faapea: “E mafai e le Pule Sili o le Tiute, i se faiga tusitusia ona tofia tagata ofisa po o isi tagata faigaluega o le Matagaluega e ave ma tagata ofisa o le Tiute.” Ia silasila la o lea e manino lava i i, a o lea

e saunoa le Minisita e le o i ai se vaega faapena i i. O le mea lea lau Afioga i le Minsita se i toe silasila i le tulaga lea, i feteenai ma le Tulafono a le Matagaluega e Pulea Tagata Faigaluega?

FOFOGA FETALAI: Ia se i tulai atu le Afioga i le Palemia e faamalamalama atili le mataupu.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai, o le faa-Peretania lea: “The Comptroller may, in writing, designate officers or other employees of the Ministry as Customs officers for the purposes of this Act.” O le uiga ia o le eseese e tau o le loloto o le faa-Peretania, o le upu faa-Samoa o le “tofiga” ma le upu faa-Peretania “designate, designate”, o le upu faa-Peretania designate, o lona uiga e mafai lava ona toe tofitofia tagata i totonu lava o le Matagaluega i lea tiute ma lea tiute. O le upu designate, lau Afioga e leai lava se mea o lea e sao le faamaninoga a le Minisita. O le tofiga lea e i i, o tofitofiga lava i totonu lava o le lio o le Matagaluega, o lona uiga e faapea, a oo i lea aso ona faapea atu lea o le Pule, ia o oe lona o le fai-ti, sau e alu e vaai le tatou toilet po o mama, ia ona alu lea, e le faapea na o le fai-ti, fai-ti, fai-ti, ae fai foi ma alu e vaavaai le toilet.

Lau Afioga i le Fofoga Fetalai, se o le faigofie ia o nei mea. E ala lava ona faigata o le taumafai o le Itu Agai e femilosai mea, a o le faigofie ia. O le lalolagi lea tatou te i ai, a tatou agai lava e faamamafa mea mama, ia soona mamafa vale ai lava lea.

Lau Afioga i le Fofoga Fetalai o la e sao le Minisita.

FOFOGA FETALAI: Ia e manatu ua.....

Afioga Hon PALUSALUE FAAPO II: Lau Afioga i le Fofoga Fetalai.....

FOFOGA FETALAI: Ia o lea ia o le a tolu ou avanoa le Taitai o le Itu Agai.

Afioga Hon PALUSALUE FAAPO II: Ia leaga o lou avanoa muamua lea i le Palemia, ioe.

FOFOGA FETALAI: E leai, e le mafai. O le Palemia lea e tulai mai e tau faamalamalama le mataupu, designate.

Afioga Hon PALUSALUE FAAPO II: Se i silasila i le faa-Samoa, aua e ese le designate ese le tofia, e ono numi ai le tatou Tulafono.

FOFOGA FETALAI: Malie lau Afioga i le Taitai o le Itu Agai, se i avatu lava le avanoa i le Palemia, se i tulai mai.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le upu lava e tasi, tofia, ae pei o le eseese o lea e matua sao lelei le Minisita,

e le o aafia lava le tofiga a le PSC i luga, ae leaga o upu faa-Peretania e exact e faapitoa lava i le mea e tasi, a o le upu faa-Samoa e selau ituaiga uiga eseese. O le mea lena e ese le taua o le mea lenei o se upu Samoa ona o le tele o le mea e agai i ai, a, ae seiloga la e te faitau i le peretania, ona e agai tonu lava lea i le mea lea e agai i ai le upu tofia lena e faaaoga i le uiga lena lea e faaaogaina.

FOFOGA FETALAI: Ia se i toe tulai mai le Afioga i le Minisita.

Tofa Hon TUILOMA LAMEKO: Lau Afioga i le Fofoga Fetalai, e tulai atu na o sina faamalamalama puupuu lava, sa ou faapea lava au ua malamalama si ou atalii lea le Taitai o le Itu Agai sa aoao lelei, a o lea la ua ou vaai atu, le Taitai o le Itu Agai ua ou foi mai i o i le IMF, ia manuia le aso.

Afioga Hon PALUSALUE FAAPO II: Lau Afioga ona o lea ua taua lou igoa e le Afioga i le Minisita. E pau lava le mea, o lea faatoa malamalama ona ua faamalamalama e le Palemia, ae le malamalama le Minisita i lana Tulafono, ma lou faaloalo lava.

FOFOGA FETALAI: Malo.

Tofa Hon TUILOMA LAMEKO: Lau Afioga i le Fofoga Fetalai, pei ona ou tau faamalamalama atu, o le Taitai o le Itu Agai o si tama laitiiti lava, ia o lea foi la ua ou tau atu, a tau le IMF e na o lauia foi lava, e le mafai ona alu i ai le Taitai o le Itu Agai i le aufaigaluega a le Malo e pei o au. Ia manuia le aso.

FOFOGA FETALAI: Malo. Ia aua ia e te toe amanaia tala a si ou tama ia te oe, ua lua feteenai lava ma si toaina ua leva.

Faamaonia le Fuaiupu 4.

FUAIUPU 5: Tagata faatagaina.

Faamaonia.

FUAIUPU 6: Tuuina atu o malosiaga e le Pule Sili o le Tiute.

Afioga Hon PALUSALUE FAAPO II: Lau Afioga i le Fofoga Fetalai.....

FOFOGA FETALAI: Ia.

Afioga Hon PALUSALUE FAAPO II: O lea la, o lea la ua faamanino mai iinei i le Fuaiupu 6 le mataupu lea na ou fesili ai - tuuina atu o malosiaga e le Pule Sili o le Tiute.

O le malosiaga lava lea ou te popole ai, o le a ave atoa le malosiaga i le Pule Sili e fai ai lava e ia tofiga ma mea faapena. O le ala lena o lou tutu atu, a ave se malosiaga i se tagata e toatasi, ia e ono fesiligia i se isi taimi. Ae i lou talitonuga, sa tatau lava ona ave le malosiaga pei ona i ai le Tulafono a le Matagaluega e Pulea Tagata Faigaluega. Ia o lea la ua toe faamautu mai e le Fuaiupu 6 le mea lea ou te lagalaga atua, lau Afioga i le Fofoga Fetalai.

FOFOGA FETALAI: Ia e manatu ua manino ma malamalama le folasaga a le Malo lau Afioga i le Taitai o le Itu Agai, ma e tatou te le tau tulituliaupu foi i le faamalieina o finagalo o sui usufono i le latou interpretation. O lea ua saunoa le Palemia, saunoa le Minisita e a ia le Matagaluega, ia tatou o ai lea i lena. E le mafai ona aafia ia le faamalamalama e ala i lalo i le Komisi o le Afaigaluega a le Malo.

Tulai mai lau Afioga i le Palemia.

Susuga Hon TUILAEP A FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e lelei lava ona faamalamalama le mea lea, e lelei ona ou toe agai tonu lava i le sao o le faaupuga, o lo o alu atu i lalo i le faa-Samoa, e le o se faa-Saina lea o le a ou faalau atua. “6: Tuuina atu o malosiaga e le Pule Sili o le Tiute- (1) E mafai e le Pule Sili o le Tiute ona tuuina atu i so o se tagata, so o se galuega tauave po o malosiaga o le Pule Sili o le Tiute i lalo o lena Tulafono po o so o se isi lava tulafono.” O Palu sa Minisita i lalo o le Kapeneta i lalo o lau taitaiga, i lalo o mea o Tulafono uma lava a le Malo, e taua tele le faaupuga lea o le Pule Sili e i ai le Pule Sili, e i ai tiute e faapitoa tonu lava i le Pule Sili, ma e le mafai ona i ai le Pule Sili i taimi uma i Samoa. E i ai le taimi e malaga ai le Pule Sili ona ia tusia loa lea o le delegation e tuuina atu ai i se tasi o le Matagaluega le malosi e mafai ai ona ia tauavea galuega tau Pule Sili. E i ai lava la i Tulafono uma lava. O le mea ua ou tei ai, pei faatoa malamalama lea o Palu e i ai se mea faapea i lalo o le Tulafono a le Malo, a o lea sa i ai foi i lalo o le Tulafono a Matagaluega sa ia vaaia, a o avea ma Minisita. E le afaina lava le tutulai mai o se isi sui usufono e le i Minisita, a o le tutu mai pea o Palu toe tu mai toe tu mai i mataupu o lea lava sa i ai i le taimi sa Minisita ai, o lona uiga, tasi lea sui usufono sa na ona faalua i luga o le nofoa i le taimi atoa sa Minisita ai ae le faitaua ana Tulafono. O lea foi la ua e sau i totonu o le Palemene ma aumai atoa ai lava lona le malamalama i Tulafono. Palu, o le mea lena e taualoa ai lou tulaga o oe o le Taitai o le Itu Agai, e te le soona tu. Faatoa e tu lava i se mea taua. A o lou tu mai ou tulai atu ma ou faasaoina atu mea ia te oe, e mataga i lou tulaga Taitai.

Afioga Hon PALUSALUE FAAPO II: Lau Afioga i le Fofoga Fetalai o se mea e fia faasao.

Susuga Hon TUILAEP A FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ia manatua lelei upu a Paulo, “O le alofa. O le alofa e lavatia ai mea uma lava,

o le alofa e le lotovale, o le alofa e tufa ana mea, o le alofa e le tu soo i luga.”

FOFOGA FETALAI: Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, o se mea e fia faasao. Na pau lava lea o le avanoa e fesili ai le Palemene. E mafua i se a? Ua le avea le Tulafono tele i le Komiti a le Palemene. O le ala lea o lou tutulai atu e fesilisili i mea ia, o lea ou te malamalama lelei lava i le mea lea e sau ai le Afioga i le Palemia. O le ala lena, ona o lea e foliga mai ua avea le mea faanatinati lea e aumai ai Tulafono lapopoa faapenei....

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: O le mea e fia faasao lau Afioga.

FOFOGA FETALAI: O lea ua maua lou finagalo Palu. O lea ua maua lou finagalo, o lea o le a e fefoifoiai. Se i uma ona avatu lea o lau tali i le mataupu lea.

Afioga Hon PALUSALUE FAAPO II: Se o le mea lea e leaga ai lau Afioga, e te tuuavanoa lava i o ae te le tuuavanoa mai iinei.

FOFOGA FETALAI: Malie o lea e uma tuu atu le avanoa.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga, e le o teena le avanoa pe tatou te alu i le tulaga o lo o tatou lotea ai nei le Tulafono Tau Faaofi lea, po o le alu o le Tulafono Tau Faaofi i le Komiti, e le o taofia lava le avanoa e tutulai mai ai pea sui usufono e aumai fesili. A o ita foi o le sui usufono, se ta te faaeteete e tu i luga e fai fesili, e atili iloa ai lota le malamalama i Tulafono Tau Faaofi. Ia vaai i le mataga o lea mea o le faamatala atu ia te oe Palu, a o le power lea i le Pule Sili.....

Afioga Hon PALUSALUE FAAPO II: Lau Afioga i le Fofoga Fetalai, o le mea e fia faasao, leaga o la e aumai upu ou te le malamalama.

FOFOGA FETALAI: O lea o le a uma ona avatu lea o le avanoa.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Tuu atu le avanoa i le Pule Sili na te delegate ina ai, na te tuuina atu ai le tiute e alu oe i le aso e alu i le mea le la e fai le lauga e avea oe ma sui o Au, ona alu lea o le Minisita po o le CEO, po ose isi i lalo ifo e faatino le mea lena, o le power of delegation e i le Minisita, e i le Pule Sili. Na pau lava le mea, e le mafai e le tagata ua tuuina atu i ai le delegation ona toe nofo ma toe delegate le power na tuuina atu ia te Ia. Lau Afioga, o le mea masani, ou te ofo i se isi sa Minisita ae le iloa lena mea taua i le faatinoina o tiute faa-Pulega.

FOFOGA FETALAI: Tulai mai le Taitai o le Itu Agai.

Afioga Hon PALUSALUE FAAPO II: Lau Afioga, o le mea e fia faasao i le saunoaga a le Palemia, e matuai ou malamalama lelei i le Tulafono Tau Faaofi lenei. O la e faafogafoga mai le atunuu, aua o le mea lenei e tataua ona silafia e le atunuu o le ala lea o le taua o Komiti a le Palemene e iloilo ai Tulafono Tau Faaofi nei. A matou le fesili la, ia e pogisa ma le atunuu.

FOFOGA FETALAI: O le mea tonu lea, ia malie lava lau Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, se i toe avatu lava si mea lea e tasi. O lea tatou te talanoa i le Fuaiupu 6 - O le tuuina atu o le malosia i le Pule Sili o le Tiute. O lea tatou te talanoa i le Fuaiupu 6. O le a le mea lea na fesili ai Palu? E fesili i le ofo i le mafai ona fai o lea mea, a o lea ou te tau atua, o mea lava ia e masani ai i Tulafono uma ia tatou te talanoaina e aumai, e aumai uma ai lava le mea lea. A o le ofo, o le a le mea lea e ofo ai? E ofo i lou le malamalama. O le a faapefea nei la ona fai mai nei o le ala lea e te tu mai ai e te malamalama, a o lea e maitau atu i lau fesili e matuai e le malamalama lava.

Afioga Hon PALUSALUE FAAPO II: Ia, e le mafai lava ona ou tuua le mea lea leaga o lea e fai mai ou te le malamalama. O le a ou le malamalama faapefea i faaupuga ia e aumai i le faa-Samoa, ioe, ave le malosia atoatoa i le Pule Sili. A avatu lava la le malosia e sese ona faaoga, o tulaga ia o lea ou te taumafai atu ai, a o lea ou te malamalama lelei lau Afioga i le Palemia i faiga faavae a le Malo.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e leai foi se upu malosia atoatoa. E leai lava ma se upu atoatoa o i ai. Ua vaai la i ai e uma atu le isi faaletonu toe polili mai le isi faaletonu, e leai lava ma se upu atoatoa o i ai.

FOFOGA FETALAI: O le ala lea o lou taumafai atu i lau Afioga i le Taitai o le Itu Agai. Silasila foi, na alu le aso atoa i le tatou Aso Gafua o faamalamalama le Tulafono Tau Faaofi lenei. E i ai foi lou talitonuga o lea na matua malamalama le faamalamalama a le Pule Sili o le Matagaluega, tolaulau, faamalamalama ma tuuina mai uma mau. O lea faatoa tatou tagofia, a ua atoa le ono, fitu, valu masina o fai le consultation a le Matagaluega o Tiute. E faafa, faalima ona feiloai ma le aufaipisinisi ma i latou uma i le atunuu o le a aafia i le mea lea. O lea e afio mai le Loia Sili ma i latou ua uma ona saolaupule le mataupu, ona i ai lea o lou talitonuga, aua tatou te toe asa le ogasami ua uma ona asa. O le ala ou taumafai atu lau Afioga i le Taitai o le Itu Agai, leaga o lea e te agai mai i totonu ma tau toso le tatou Fono i lou saunoa mai pea, ave mea i le Komiti. Ua le mafai ona tatou toe foi i le Komiti o lea ua uma ona saina le Tulaga Faanatinati. O le Tulafono Tau Faaofi lenei e aafia ai le SIDS lea e agai mai i le vaiaso lea, o tiute o vaalele, o taavale afi, o meli, o mea uma ia e agai mai lea na ala ai ona talosaga Minisita o le Kapeneta e fai le Tulafono Faanatinati.

O lea ou te talosaga atu ai i lau Afioga i le Taitai o le Itu Agai, vaai o le tele o avanoa lea ou te tuuina atu, a o lou saunoa lava i mea faamalamalama, tuu pea oulua e fai le lua misa, ae ou taumafai e faamalamalama mea uma. E le o ni ai avea lau Afioga i le Taitai o le Itu Agai, o lea ua malamalama lou finagalo, o lou popole i malosiaga tuuina atu. E leai o lo o i ai tapu i isi Tulafono a le Malo i le Pule ma Suetusi Sili, aemaise ai foi le Pule a Tagata Faigaluega a le Malo, e le sopo le taiao i le eleele, e le sopo foi le pulepo i le puleao, ua uma ona tuumatamaga mea ia ina ia malamalama ona ogatasi lea o le vafealoaloi ma le galulue faatasi o Matagaluega a le Malo.

Faamaonia le Fuaiupu 6.

FUAIUPU 7: Pepa e iloagofie.

Faamaonia.

FUAIUPU 8: Fu'a a le Ofisa o Tiute.

Faamaonia.

FUAIUPU 9: Faamaufaailoga a le Ofisa o Tiute.

Faamaonia.

FUAIUPU 10: Nofoga tau le Tiute.

Tofa LEALAILEPULE RIMONI AIAFI (Faleata Sisifo): Lau Afioga i le Fofoga Fetalai.....

FOFOGA FETALAI: O le Fuaiupu e fia le sui usufono mo Faleata Sisifo?

Tofa LEALAILEPULE RIMONI AIAFI: O le Fuaiupu 10 faamolemole.

FOFOGA FETALAI: Tulai mai le sui usufono mamalu mo Faleata Sisifo.

Tofa LEALAILEPULE RIMONI AIAFI: E muamua ona avatu foi le faamalo ma faamanuiaga a lenai itumalo i lau Afioga Faimalo i lou tulai mai, malo finau malo tau, ia manuia tele lau tulai mai i le tofi, e le gata i lenai Paeaiga ae toe sau foi i le isi Paeaiga.

A o le Fuaiupu 10 lau Afioga, ua ave nei le malosiaga o lo o i lalo o le Minisita mo Felauaiga i le Pule Sili o le Matagaluega e faasilasila ai ma atofaina ai, so o se malae vaalele e avea ma malae vaalele tau tiute. O le fesili lea i lau Afioga, aua o le mea sa i ai i le Tulafono tuai i le 37 tausaga talu ai, o le malosiaga lea sa i lalo o le Afioga i le Minisita o Felauaiga, e fetuutuunai ai ma isi Pulega, a o ia e declare ina le malae vaalele e avea ma malae vaalele tiute. A o lea la ua aumai nei i le suiga lea ua i ai nei, ua aveese ai le malosiaga lea mai lalo o le Minisita ae tuu i lalo o le Pule Sili. O le fesili lea i lau Afioga, pe ua femalamalamaai Matagaluega nei e lua a le Malo i malosiaga nei. Ma le faaaloalo lava.

FOFOGA FETALAI: E te fia saunua lau Afioga i le Minisita?

Tofa Hon TUILOMA LAMEKO: O lo o malamalama lelei lava le Tulafono Tau Faaofi, ou te le tau fia talanoa i ai, o la e malamalama lelei lava. Ia manuia le Fono.

Faamaonia le Fuaiupu 10.

FUAIUPU 11: Nofoga e pulea e le Tiute.

Tofa AVEAU TUALA LEPALE NIKO PALAMO (Faleata Sasae): Lau Afioga i le Fofoga Fetalai.....

FOFOGA FETALAI: O le a le Fuaiupu?

Tofa AVEAU TUALA LEPALE NIKO PALAMO: O le Fuaiupu 11 lau Afioga.

FOFOGA FETALAI: Tulai mai le sui usufono mamalu.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai. E momoli atu foi le faamalo i le Afioga ia Faimalo aua foi le oo mai i totonu o le Palemene. E faatalofa atu foi i le paia ma le mamalu o le atunuu, aemaise foi o aoga ua tatou faatasi ai.

O lau fesili i le Fuaiupu 11 – Nofoga e pulea e le Tiute. O lau fesili lea na ou fesili ai i lau lauga faamolemole, a o lea e le i... O lau fesili i le vaega lea aua o lea na taua e le Tamaitai Pule i lana faamalamalama, tasi lenei vaega fou o lo o ua tuu i totonu o le Tulafono Tau Faaofi lenei, o le faiga lea o fale nei e ave i ai oloa e teu ai, o lea la ua alu i lalo e pulea e le Ofisa o Tiute.

O lau fesili faamolemole lau Afioga i le Minisita mo Tupe Maua, e aafia ai ma fale nei e faaoga o freight companies lea e ave i ai oloa a le atunuu e tuu ai ona o atu lea o le atunuu e aumai i tua le vaega lea o oloa?

O le isi au fesili i le vaega lea, afai e manao se isi kamupani e teu ai ana oloa i le fale teuolua lea a le isi kamupani lea ua ave i ai le laisene lea a le Tiute? E mafai? Afai foi e i ai, o le a se vaavaai i le tau o lea vaega? Ma le faaaloalo lava.

FOFOGA FETALAI: Tulai mai lau Afioga i le Minisita mo Tupe Maua.

Tofa Hon TUILOMA LAMEKO: Lau Afioga i le Fofoga Fetalai, o le faafesili mai a le sui usufono mo Faleata Sasae i le vaega lea, o le malosiaga lava lea e i le Minisita, e mafai lava ona tuu atu, ma e fua foi mea e ave agai le tulaga o le manaomia o le ituaiga service lea e le public. O lea la, e mafai ona faapea, e fua i le iloa lelei e le Minisita pe talafeagai ona tuu i ai se laisene i le talosaga lea, ae le faapea o le a sau lava so o se tagata ona ave lea i ai. Ae fua faatatau i le tulai mai o le mataupu mai lea taimi i lea taimi. Ma le faaaloalo.

FOFOGA FETALAI: Malie lava le sui usufono mo Falealupo se i faauma mai le avanoa lona lua o le sui usufono mamalu. Tulai mai le sui usufono mamalu.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, leai ou te le toe fesili i le Afioga i le Minisita, ae ou te fesili lava i totonu i i. E ese le taua o le vaega lea o le Tulafono Tau Faaofi, o se vaega lea o le Tulafono Tau Faaofi ou te lagolagoina foi, ona o lea ua tagai i le Custom e fai vaega ia ina ia vave maua ai le seleni a le Malo. A o lau fesili la lea na tuu atu faamolemole, ona o lea foi e sau i le Tulafono Tau Faaofi, masalo o lalo ifo o le Tulafono Tau Faaofi lea, e le o i ai, e le faamatuuina i ai e le Minisita le laisene, ae faamatuu e le Pule Sili. A o le mea lea e ala ai ona ou fesili, pe mafai ona teu ai oloa a isi kamupani foi nei e leai ni latou warehouse e ave i ai i le fale lea pe a faapea o le kamupani lea e ona le fale. Ma lou faaaloalo lava. Ae pe lavea ai foi la ma fale nei e ave i ai lea e alu le tagata i o e aumai ni ana faaoso e aumai ona ave lea i freight companies e fai ai. Pe lavea i le Tulafono Tau Faaofi lea i le vaega o warehouses. Ma le faaaloalo lava.

FOFOGA FETALAI: O lea ua maua atu lou finagalo. Malie lau Afioga i le Minisita se i faamotu atu fesili ia ona tasi ai lea o le taimi e te tulai mai ai. Tulai mai le sui usufono mo Falealupo.

Afioga Hon AEAU PENIAMINA LEAVASEETA (Falealupo): Lau Afioga i le Fofoga Fetalai, a o le i fai atua se manatu ou te faamalo i le sui usufono mamalu mai Safotu, o ou mama na i lou afio mai i le Maotaga nei.

Lau Afioga i le Fofoga Fetalai, e mulimulitai lava se fesili i le tulaga lea ua tatou i ai nei i le Pule lea tutasi, e pei e foliga o le pule malosi i upu o le Tulafono Tau Faaofi. O gafea tonu lava e aafia ai lau Afioga i le Minisita i le Tulafono Tau Faaofi lea? Aua o le Tulafono Tau Faaofi lea e manino lava – Pule a le Pule Sili. A o lea la po o le mea lau Afioga i lou talitonuga e i ai foi ma lau pule e o faatasi ma le pule lea, e le o manino lelei mai? Po o oulua e pule faatasi? Se i fai maia sina au tala.

Tofa Hon TUILOMA LAMEKO: Ou te tali atu, o le pule a le Pule Sili, o le Minisita, aua e le faapea e alu le Minisita ae le i talanoa ma le Pule Sili o le Matagaluega. O lona uiga, e act le Pule Sili i le mea e tataua ona fai atu ai le Minisita. Ia, lau Afioga, o le tali lena o le fesili.

FOFOGA FETALAI: Malo. Ia ou te manatu ua manino ma malamalama lau folasaga.

Afioga Hon AEAU PENIAMINA LEAVASEETA: E le o manino, e faaluafesasi i le atunuu, aua e le iloa. O lona uiga e foliga aua e mafai ona faapea, sulu tasi lava i le Minisita e maua ai le tonu. Ae sulu atu la i lau Afioga e te le o malamalama foi oe i le Tulafono Tau Faaofi. O le mea lea e tuliloaina po o fea tonu lava e i ai, po o le mea e... A faapea o le tulaga lena, e pei e manaia pe a faamanino i le Tulafono Tau Faaofi i lalo o le puleaga a le Minisita. Pe o le sao lea, e manaia lava lou saunoa mai e malamalama ai, ia o atu tonu lava le atunuu, aua le maimau fua le taimi e o ai i le Pule Sili, ae o sao lava i le Minisita e tusa ai ma le Tulafono Tau Faaofi.

FOFOGA FETALAI: Malie lau Afioga i le Minisita se i tuu atu le avanoa i le Palemia.

Susuga Hon TUILAEP A FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o faiga faavae ia a le Malo, e faatulaga lava mea o organizations i lalo ifo o le pule a le Minisita, ae delegate la e le Minisita i le Pule Sili ona tiute uma ona faatino ai lea o galuega. E le faapea foi, o le mea lea ia manatua lelei, o i e sese ai mea. O le mea lava e tataua ona oo i ai le atunuu, ia o lava i le Pule Sili, aua o ia lea e faatino galuega. O le Minisita, o policies ia, e ala ona ou tau atua le mea lea, leaga o Aeau talu lava ona tulai mai i totonu o le Palemene, e le i Minisita, e le malamalama la ia i mea o Pulega faale-Malo. O lea lava e i le Minisita le faaululuga o mea uma, e faapena, e i ai lava le vafealoaloai, o le a lava le mea e manao i ai le Pule Sili, e alu ifo lava e talatalanoa ma le Minisita. A o tulaga lava o le faatinoga o galuega, e le faia e se Minisita, e faatino e le Pule Sili. O le ala la lena o lea e sese ai tagata, o le fai ma omai i le Minisita, o le galuega lea a le Minisita, ona faapea atu lea o le Minisita, "Pule Sili, ia fai le mea lea e manao i ai Palu e faatino, mea tau tiute." O le mea foi lena sa sese ai foi Palu i lena taimi, a o lea la e tau faasaosao atu a o lea lava ua alu alu ae ai lava faapena le sese, sau ai ia te oe, alu ane i le tama lena o Aeau alu ae ai ia Leala, a o oe Palu e tataua ona e faasino i tama ia mea sa e faia. Ma o policies na a le Malo, na o policies lava e faafeagai ma Minisita faapea foi ma Minisita Lagolago. A alu foi la le Minisita Lagolago e alu e faatino le galuega, paga le sese o le a agai i ai. Na o le pau lava le mea e faalogo i ai le Minisita Lagolago, o lana Minisita, ona alu lea e faatino galuega e delegate foi i ai e le Minisita galuega faatino e patino lava. A o le tulaga lava o le faatinoga o le tele o galuega i totonu, mea foi nei e tago i le suo e taeli lea mea, eli lea mea, eli lea mea, e le alu se Minisita e faapalapala ona lima, o mea na a le Pule Sili. O le ala foi la lena o lea e faaoga ai le upu, "Pule Sili" i le va lea ma le aufaigaluega. A o luga ae la o le Pule Sili, e nofonofo atu ai le Minisita. E faalogogata loa le Pule Sili, e uma ane loa le tolu tausaga, ia, uma. Ona faamalolo lea pe a le iloa le vafealoaloai lea.

O le tulaga lena ina ia manino lelei mataupu ia, e le afaina la le tutu mai pea o outou na e le i Minisita, ae a tu mai loa Palu, ona ou faanoanoa ai lava lea.

Afioga Hon PALUSALUE FAAPO II: Lau Afioga i le Fofoga Fetalai, o le mea e fia faasao ma fia faamalamalama.

FOFOGA FETALAI: O le a avatu muamua le avanoa, a e saunoa lava o outou na.

Afioga Hon PALUSALUE FAAPO II: E leai, faamuamua Saleaula.

FOFOGA FETALAI: E leai, tulai mai Palusalua e tali le mea lea. Saunoa mai.

Afioga Hon PALUSALUE FAAPO II: O le mea e fia faasao lau Afioga, e le faapea a ou tu i luga ona le tuua lea o se avanoa i i. Lau Afioga i le Fofoga Fetalai, o le mea e fia faasao, maumau le lauga tele a le Palemia, pe ana faapea o matamata tetele i le Tulafono Tau Faaofi mea la e saunoa mai ai. E leai lava ma se Minisita o taua i i, leai ma se Minisita Lagolago o taua i i, na o le Pule Sili lava ua ave i ai le power, e tusa ai ma le Tulafono Tau Faaofi leni. A o saunoaga a le Afioga i le Palemia, o lea matou te malamalama lelei lava. O le mea lea e fai mai ai le Tulafono Tau Faaofi, e leai ma se Minisita, leai ma se Minisita Lagolago o i le Tulafono Tau Faaofi. A ave i le Faamasinoga, na pau lava le mea e fesili ai le Faamasino, o le Tulafono Tau Faaofi.

FOFOGA FETALAI: O lea ua maua lou finagalo.

Susuga Hon TUILAIPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le faalavelave lea o le alu o le aso atoa o le Pule Sili e faamalamalama ai mea, ae le malamalama lava i latou o lo o fesili pea. O lea e i lalo o le Tulafono Tau Faaofi le Minisita, i lalo o le Itulau 22 lena e tau atu ai le Minisita, o Ia lena e nafa ma le vaaiga o le Customs. Ua e tau i ai Palu? O le Itulau 22 i le Gagana Peretania i lalo o le Interpretation Section. Ua lima tausaga o e Minisita, ae te le o iloa e i ai se section faapea.

FOFOGA FETALAI: Tulai mai le sui usufono mo Gagaemauga Nu.2.

Tofa LEVAOPOLO TALATONU (Gagaemauga Nu. 2): Lau Afioga i le Fofoga Fetalai, e leai o si mea lava ia ta te musu e tuuloa le tatou felafolafoaiga, a o lea sa maua foi i le saunoaga a le Palemia e faapea ia Palu, e fai i tama ia, leaga o lea e faamaumau a tatou faamaumauga o le Fono leni. Mo le silafia e lau Afioga ma le mamalu o le Maota, o matai Samoa, o afioga i sui usufono mamalu o itumalo, e le o ni tama. Ma le faaaloalo lava.

FOFOGA FETALAI: Malo. Ia, vaatele ia i lo outou finagalo. Ia se i avatu muamua le avanoa i le Malo ona avatu lea o le avanoa Aeau.

Susuga Hon TUILAEP A FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, a ou fai atu foi i lau Afioga Le-va-o-polo, ua e le fiafia foi.

Tofa LEVAOPOLO TALATONU: Lau Afioga i le Fofoga Fetalai, se i tau topetope mai lou gutu pe a e talanoa mai ia te au.

Susuga Hon TUILAEP A FATIALOFA LUPESOLIAI AIONO NEIOTI SAILELE MALIELEGAOI: E le mafai, leaga o tatou uma sa aooga i le Pi Tautau, ae se i vagana la le Pi Tautau foi lea sa aooga ai o le fa, fe, fi, lo, lua, ona tulai mai lea o le feeseeseaiga. A o tatou uma lava sa aooga i mea faapena. E i ai la le mea e topetope ai, ae i ai le mea e tosotoso faavavaloloa, ae i ai foi la le mea e faamamafa. Afai la e te le fiafia i lou faapea atu, lau Afioga Le-va-o-polo, o le a faapefea la? A e faitau lelei, L E V A O P O L O. O le a la le ituaiga faaleoga, o lea ou te alu atu lava i luga o le Pi Tautau?

Tofa LEVAOPOLO TALATONU: Lau Afioga i le Fofoga Fetalai, e leai lava se mea e te popole ai i le Pi Tautau, o lea foi e Tautau Pi a le matou itumalo e malamalama lelei ai lava.

FOFOGA FETALAI: O le a le... ua lava lea mea, ua lava le finauga i Pi Tautau, o lea o le a tatou o i le Pi Tautau ae tuu le Tulafono Tau Faaofo i tatou omai e fai.

Faamaonia le Fuaiupu 11.

FUAIUPU 12: Malosiaga e tuuina atu ai laisene.

Faamaonia.

FUAIUPU 13: Talosaga mo laisene.

Afioga Hon PALUSALUE FAAPO II: Lau Afioga, o lena e misi le Fuaiupu 12.

FOFOGA FETALAI: A lea ua uma ona ou fai atua ua pasi? Ua uma ona ou tolaulauina atu – Malosiaga e tuuina atu i laisene.

Afioga Hon PALUSALUE FAAPO II: A o le mea lena o lea ou te fia fesili ai.

FOFOGA FETALAI: O lea ua pasi. Agai i luma o lo o i ai isi vaega e le mafai ona toe foi i tua.

Afioga Hon PALUSALUE FAAPO II: O lea la e i i i le Fuaiupu 13.

FOFOGA FETALAI: Talosaga mo laisene?

Afioga Hon PALUSALUE FAAPO II: Ioe.

FOFOGA FETALAI: Ia, se i fai.

Afioga Hon PALUSALUE FAAPO II: O le Ofisa o Tiute, o kamupani tetele ia a le Malo o lo o talosaga i laisene. Ma o i le ivitu o le atunuu e maua ai seleni mai kamupani nei ma pisinisi. A o lea ou te vaai atu i le faiga o le laisene, e pule lava le Pule Sili, ioe. E pule toatasi le Pule Sili. O le ala lea o le matou tulitulia atua o le mea lea, leaga o kamupani ma pisinisi e aumai oloa mai fafo ma oloa e ave i fafo, e taua le silasila i ai o le Malo, ina ia i ai se leo o le Minisita, ia i ai se isi foi lea i luga ae o le Pule Sili, leaga e le o ni tamai laisene ma ni tamai tupe lea...

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai...

FOFOGA FETALAI: Ia, se i faamalamalama. O lea o le a tau faamalamalama atu le atugaluga lea e te atugaluga ai. Tulai mai lau Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: E i ai lava le mea lea ou te maitau. E pei o le agaga lea i le Taitai o le Itu Agai, e alu le Minisita e fai uma lava galuega ia. O le mea lene na hire ai tagata nei latou te o e fai galuega nei. Seiloga lava e i ai se mea ogaoga faatoa aumai lea i luma o le Minisita. O lou manatu o le mea lea... sa e faia ni mea faapena o e Minisita? E i ai le agaga lea e aliali mai, e pei e tetele i le Pule Sili. E silafia ea e le sui usufono o Pule Sili nei o tagata na aoga ma ua fia sefulu tausaga o galulue ua tele lo latou poto masani i le faatinoga o galuega? O latou nei o lea e faalagolago i ai, o le lima taumatau lea o le Malo, o i latou nei o Faatonu Sili po o Pule Sili ua i ai le tomai latou te faatinoina ai galuega ma latou iloa i luga o latou poto masani tagata e o atu e ono faatuatuaina ma tagata e le ono faatuatuaina. Ae tagofia lava le Minisita ona ua i ai se tulaga ogaoga ua tulai mai ai se fesoasoani faapitoa. A o le Minisita ia, e le laa lava i o e faatino galuega. Mo galuega nei o le lote o mea nei, e i ai tagata latou te faia, ae faamalumu lava le Minisita ia na o mataupu lautetele, faaiuga lautetele, se i vagana la ua i ai se faaletonu, o lea la e i ai le avanoa, a teena mai o, ona sulu mai lea o le tagata i i, o lo o i ai le appeal i le Minisita e mafai ai ona fesili le Minisita, o le a le mea ua le avea ai se laisene o Lafai? Ae tau mai o lea e faulai i i faaletonu, e le mafai ona matou avea i se tagata na o le tele o le mau faaletonu e tulai mai ai i le lumanai.

Lau Afioga i le Fofoga Fetalai, o le tulaga lene, ua ou le iloa po o le a le mea ua tupu i le Taitai o le Itu Agai, e pei e foliga mai o le tau atu lava o le Faatonu Sili tetele, tetele. A o ai sa e faalagolago i ai a o e Minisita? Sa e faalagolago i le Faatonu Sili e avatua le fautuaga ia te oe.

FOFOGA FETALAI: Ia, tulai mai le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, o se mea e fia faasao, leaga o lea e foliga mai i saunoaga a le Afioga i le Palemia e faapea mai ou te tetee i le Pule Sili. E leai, e leai se agaga faapena matou te tetee. O lea e silafia lelei le agavaa o le Pule Sili o lo o i ai. Na pau lava le mea lea matou te tulitulia atua, o le Tulafono Tau Faaofi. Maumau o upu ia e aumai pe ana faapea o lea e i totonu o le Tulafono Tau Faaofi. E pei o le mea lena o lea matou te tulituli atua lau Afioga, ae leai se agaga faapea matou te tetee i le Pule Sili, e leai, e ave foi i ai le matou faatuatuaga i le Tamaitai Pule Sili o lo o i ai nei, e tele le agavaa o lo o i ai. Na pau lava le mea lea matou te tutulai atu ai, ona o le Tulafono Tau Faaofi. Lau Afioga o le mea lea.

FOFOGA FETALAI: Malo. E leai o lo o manino ma malamalama faiga faavae a le tatou Malo, o lea foi ua faalua ma faatolu ona tulai atu le Afioga i le Palemia e faamalamalama le tulaga lea. E talitonu foi o lea ou te maua le mea lea e i ai le atugaluga o sui usufono ina ia ave uma le malosiaga i le Pule Sili ae le o maua se avanoa pe silafia foi e le Palemia ma lana Kapeneta. Ou te fautua atu, o lea tatou te nofo malamalama uma. O lena Tulafono Tau Faaofi, o se Tulafono Tau Faaofi e faafoefoe ai le Ofisa o le Tiute, a o lo o taatia faiga faavae a le Malo, o lo o i luga pea le Pulega a le Palemia ma lana Kapeneta. That is the full authority, e fai ai so o se faaiuga. O lea foi ua malamalama le folasaga a le Palemia, a i ai se mea e le faamalieina ai se isi o le atunuu i se mea ua talosagaina, o lo o avanoa le Minisita, o lo o avanoa le Palemia e sulu i ai pe a faapea o nisi tulaga. Ae malie le sui usufono ne i te i ua tatou toe afeafea i o tatou finagalo, ae malie o lea ua manino le tulaga lea o faiga faavae a le tatou Malo.

Faamaonia le Fuaiupu 13.

FUAIUPU 14: Suiga po o le faaleaogaina o aiaiga.

Faamaonia.

FUAIUPU 15: Faaleaogaina po o le taofia le tumau o laisene.

Faamaonia.

FUAIUPU 16: Toe faafoi o laisene.

Faamaonia.

FUAIUPU 17: Tapunia o Nofoga e pulea e le Tiute.

Faamaonia.

FUAIUPU 18: E le aafia noataga e ala i le faamutaina ona galue ai o se tagata e i ai le laisene.

Faamaonia.

FUAIUPU 19: O mea eseese e faatino ai auunaga tau le Tiute i totonu o Nofoga e pulea e le Tiute.

Tofa LEALAILEPULE RIMONI AIAFI: Lau Afioga i le Fofoga Fetalai.....

FOFOGA FETALAI: O le a le Fuaiupu?

Tofa LEALAILEPULE RIMONI AIAFI: 19 lau Afioga.

FOFOGA FETALAI: Tulai mai le sui usufono mamalu.

Tofa LEALAILEPULE RIMONI AIAFI: Faafetai. Ua manino le vaega lea e 19 o le Tulafono o lo o faapea mai, so o se nofoaga e fai ai galuega a le Ofisa o Tiute e fai fua e le totogia. O le fesili, mai lava i le amataga sei oo mai i le aso, o lo o totogi pea lisi pei o malae vaalele ma tulaga faapena, manatua foi o le mea lea sa ou taumafai atu ai lau Afioga i le Fofoga Fetalai, o lo o manaia le faaupuga o lo o i ai i le Tulafono tuai, o malae vaalele uma o i lalo o faamalumaluga ma le pule a le Minisita o Felauaiga, e fetuunai la ona faapena ona fai. I lou talitonuga, a oo loa i ni tulaga e atofaina ai ni vaa i ni mea tetele faapenei pei o malae vaalele ma uafu, o le level lea o Minisita, o i ina e sau ai le atofaina o mea nei, leaga o lea e manino i latou Tulafono, ona feteenai ai lea ma le Tulafono lea ua sau nei, aemaise ai la o lea ua faapea mai, e fai fua, ae manatua, e i ai foi le Tulafono ia a le Treasury le Public Bodies Act, ina ia operate, ina ia faafoe Matagaluega nei a le Malo e faapisinisi. O lea la ua i ai feteenaiga lea e i ai nei, po o le mea la o le a fai, o le a faatino fua e aunoa ma le tototogiina ia galuega ia a le Ofisa o le Tiute i malae vaalele ma isi galuega ia e fai ai a latou auunaga e aunoa ma le totogi. E fia malamalama ai ma le faaaloalo lava.

Tofa LEVAOPOLO TALATONU: Lau Afioga i le Fofoga Fetalai.....

FOFOGA FETALAI: Ia tulai mai le sui usufono mamalu mo Gagaemauga Nu. 2.

Tofa LEVAOPOLO TALATONU: O le 19 lau Afioga, o le vaega lea o le Tulafono lau Afioga i le Fofoga Fetalai, o lea ua aumai ai ia noataga o

kamupani ia e i ai mea ia o ware houses ia lea e teu ai oloa. O le fuaiupu lenei, o le matuai sau lava o le fuaiupu lenei. A silasila lau Afioga i le Fofoga Fetalai i le vaega lea, o lea ua aumai nei e provide uma e kamupani nei mea uma e faatino ai galuega a se ofisa tiute, ae a faatino loa le vaega lena, o lea ou te talanoa atu ona e i ai si au fasi pisinisi faapena. O le rent o fale ia e faaoga e kamupani, o lea e fai ma computers, o printers, internet, telefoni, e faaoga uma lava e le Ofisa o le Tiute lea, a o expenses ia a kamupani o lea foi e fia feola kamupani, tuuaia ia la ia malae vaalele ma corporations a le Malo o la e lava tupe, a o matou nei e taumafai e atinae e fai nai a matou tamai atinae nei, e matua le talafeagai. O le taimi lenei lau Afioga i le Fofoga Fetalai, o lea foi e tuu o ia kamupani nei e amiami ia ofisa o le Tiute e faatino le latou galuega i fale ia ma sides ia, tasi na vaegatupe o lo o faaalu a kamupani. A o lea la ua toe aumai ma le vaega lea o le Tulafono, ia faaavanoa so o se mea uma o meafaigaluega a kamupani, e faatino lea i le galuega a le Ofisa o Tiute?

Lau Afioga i le Fofoga Fetalai, ou te matua teena le vaega lea o le Tulafono. O lea foi la ua oo mai i le 20 lea e i ai, o la ua matua tapu faasa ona faaee atu se tau i le Ofisa o Tiute i mea ia latou te faaogaina.

Lau Afioga i le Fofoga Fetalai, pei o se vaivaiga lena o lenei foi sui usufono.

FOFOGA FETALAI: Malo. Ia lau Afioga i le Minisita.

Tofa Hon TUILOMA LAMEKO: Lau Afioga i le Fofoga Fetalai faapea ia sui usufono mamalu o le Maota, o fesili ua tuuina mai e faatatau i gaoiioiga a le tatou Ofisa o le Tiute, aemaise o lea e aafia ai le tulaga o lo o fesiligia ai le tulaga i mea tau fale foi nei e teu ai oloa ma tulaga faapena. Ou te talitonu o le amiotonu, e tatau ona pulea atu e le Komiti o le Custom ia fale uma nei lea e teu ai oloa, aua o nisi o fale e teu ai oloa, e avatu mulimuli lava o la e tuu ai le tele o uta a tagata eseese lea e aumai i inei, ona faatoa access mulimuli ai lea o le tiute e tatau ona totogi e le tagata. I le tulaga lava la ma le amiotonu, ma e le o se mea fou lenei, pei ona ou fai atu, o le Tulafono lea, o le Tulafono o le faamalosi po o le suiga ia o vaivaiga sa i ai le Tulafono 1977. O le mea lea o le faamalamalama lea i lau Afioga.

Tofa LEVAOPOLO TALATONU: Lau Afioga i le Fofoga Fetalai, faamolemole lava leaga e le o maua lelei mai e le toeaina matua ia le tulaga sa avatu. O le pulega lava ia a le Ofisa o Tiute o fale nei fale teu oloa, o lea lava e fetau ma talafeagai, e pulea lava e le Ofisa o Tiute. A o le mea lea sa tau avatu ai se lagona vaivai lau Afioga i le Fofoga Fetalai, o le fesoasoani mai a le Ofisa o Tiute i le faaitiitia o tupe faaalu a Matagaluega i mea ia e manaomia e faatino ai le latou galuega i tua i ofisa ia ma kamupani ia. Silasila foi lau Afioga i le Fofoga Fetalai, a leai kamupani vaa nei, e leai se galuega a le Tiute e faia, o le kamupani vaa lea e faia le maketi ma sue mai pisinisi e ao ai tatou tupe, a o lea foi ua toe avatu le mamafa lea. O lona uiga e faatau e matou computer e faatino ai ia galuega a le Ofisa o Tiute, a o le faigofie? O matou telefoni o internet ma mea faapena. Pei o le mea lena na avatu ai, faamolemole faatino e Tiute ia tulaga uma ia e avatu computer ma printer ma fesoasoani atu i le totogiina o pili o moli.

Tofa LEALAILEPULE RIMONI AIAFI: Lau Afioga i le Fofoga Fetalai.....

FOFOGA FETALAI: Malie lava, se i toe tulai atu le Afioga i le Palemia e faamalalama le mataupu.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le tulaga lea e i ai le tatou uafu, ua oo lava ina laitiiti, ma a alu se isi i ai i tai ma tilotilo i faulaiga containers ua toetiiti oo i luga i le lagi, a o le tulaga lava ia tau oloa, e taunuu mai loa le oloa o le a ave i tua e faaaoga, totogi loa ma le tiute, point na e totogi ai le tiute. A i ai la taimi e taunuu mai ai, e i ai isi taimi e taunuu mai ai po o ua vave taunuu mai po o ua matua ova mamao atu, e le i oo la i le taimi o lea e tele oloa, ae tatau la ona tuu i se mea mo se vaitaimi. O isi oloa e aumai e kamupani lea e i inei e toe ave i fafo i isi atunuu, for we export, e tatau la ona i ai se mea e tuu ai, o le ala foi la lena e le tatau ona tiuteina, aua e le o ni oloa e aumai e aumai i inei, a o le oloa o lea na ona malolo mai i inei e toe ave ai po o Tutuila. Ia o le ala lena o lea e ala ai ona e le talafeagai le tiute. O lea sa laga mai e se isi, e tatau lava o mea ia e manaomia e le Malo e manaomia e le Treasury. O le Tulafono lenei, a o le i aumaia, o faiga faavae a le Malo e talanoa ma le tatou Revenue Board, o le Komiti lea Faapitoa a le tatou Malo, latou te sailiilia ma siaki uma lava mo fuafuaga mo siitaga o ia tupe maua a le Malo, ona faatoa aumai ai lea ave ai lea i le Kapeneta, pasia mo le aumai i totonu o le Palemene. E leai la se mea e tau toe tu mai oe lea, o la ua uma ona soalaupule le tulaga lea. A o se mea aupito sili ona amiotonu, o le fesoasoani lea sa fai mai, e tatau ona ave le fesoasoani, le fesoasoani lea a le tatou Malo i le faatinoina o le partnership with the Private Sector, o le ave o oloa i le taimi e le i tatau ona faaaogaina ai e store ai i i, e aunoa ma le totogiina o ni tupe. E le o se mea leaga la o le fesoasoani le mea lena. A o lea la ua oo mai i le taimi, o le ala foi lea o lea e ave ai le tatou talosaga ua oo i le taimi ua tatau ai ona toe fai le tatou uafu fou ona ua laitiiti le uafu le la, ua laitiiti lava le nofoaga la e avanoa mo le teu ai o mea nei, ua tatau la ona aveese ma tai ave pea lava i nofoaga o latou nei na aumaia oloa ma ua oo ina mataga le mea, o isi ia e avatu, faulai i luma o latou ofisa ma faalavelave ai i le femalagaiga o taavale afi. O le mea la lea a outou silasila atu foi i le uafu, ia e tasi lava le taula ai o le meli atoa e sau lava i le isi itu e tau i le isi itu. O le tausaga e 1972 sa faia ai ia se sailiiliga a Professor Rod Kiri, o le inisinia mai le Auckland University, ma latou faamautinoa ai, o le uafu mo le lumanai o Samoa, o i i Vaiusu, ae fai e tatou le uafu i tai, ona pei o se fofu lea mo se taimi puupuu, ia mo fofu uma lava faavave mo taimi puupuu e puupuu foi le aoga, ua oo la i le taimi e uma ai le aoga. Ua matua tele mea la e fia fai i tai o lea foi ua omai foi ma faleia latou e fia faatu i totonu o le uafu, ua atili ai ona matua leai se avanoa. E tatau lava la ona i ai le uta fetalai, o le a foi le upu e masani ai outou faleupolu? O le uta a le potu e fetalai. O le mea la e tatau ona i ai, o le uta fetalai i le Pulega ma le Afioga i le Minisita e faia fuafuaga mamao mo le agai atu i le lumanai, ae le na o le fofu foi lele e pei o se pou e na ona tupu mai lava o le pou avatu le vai pou ae valivali ai uma, e le o se mea lena e tatau ona tatou agai i le mea tele mo le fofoina o mea ia. O le faiga la o le Tulafono lenei, o Tulafono e faavae i luga o le talafeagai ma le taimi lea

tatou te i ai – ma ua tatau foi i pisinisi latou ona malamalama lelei i le mea e tatau ona latou faia, i le tulaga ua alu lava i luma le tupu o le tatou tamaoaiga ma ua oo i le taimi e tatau ai foi ona faataoto fuafuaga mamao mo le isi afe tausaga o lo o lumanai ai.

Lau Afioga i le Fofoga Fetalai, o le ala lena o lea e faataoto ai ia fuafuaga faapenei e atagia i totonu o le Tulafono ua avatu, o le vaai mamao, vaai mamao o le Afioga i le Minisita ma le Pulega o le Uafu.

Tofa LEALAILEPULE RIMONI AIAFI: Lau Afioga i le Fofoga Fetalai.....

FOFOGA FETALAI: E manatu ua manino le faamalamalama, pe i ai se isi mea e ese ai?

Tofa LEALAILEPULE RIMONI AIAFI: Ia. Faafetai lava i le Afioga i le Palemia, vaai le ta uafu i uma lena Paeaiga e le i amata.

O le mea lea e popole ai le manatu, so o se malae vaalele lava faava.....

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e pau lava le mea e fia faasao.....

FOFOGA FETALAI: Malie le.....tulai mai le Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Ona o lo o i ai mo mea o upu foi ia o lo o aumai faauigalua pe aumai faaulaula. E i ai lava le taimi e faaulaula ai a tatou upu, e i ai foi le taimi a tatou talanoa loa i mea e aoga mo le atunuu i le lumanai, e le o ni mea e aveane ai mea ia, e \$140miliona le tau o le uafu lea ua uma ona fuafua, o le ala foi lena o lea e faatalanoa ai e tatou i fafo aua o nei mea uma, e fai i nonogatupe mama ia aiaiga e fai ai. O le mea la lea mo outou ia tou te palaaai, soia tou te tau feoti fua i le tulaga pe a agai le Malo e tagofia mea o tulaga o nonogatupe e faatino ai mea ia, o lea e siva taufai le Malo, a o le mea lea e tupu, e tau feoti atu fua ma outou. E pau lava le mea, tapuai lelei ma faalogologo ma aumai la outou fautuaga, fautuaga lelei, ae le o le tetee lava i mea uma tetee i mea uma, tetee i mea uma, e le o se tulaga lena e aloaia ai outou.

FOFOGA FETALAI: Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Lau Afioga i le Fofoga Fetalai, ou te le o iloa lau Afioga po o lelei le faafofoga a le Afioga i le Palemia, o lea ou te faafetai atu ai i le ma uafu ia vave ona fai, ou te le o tetee.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga, e matua lelei lau faalogo, ae ou te malamalama foi lava, o lea la e malamalama lelei, o le a ou faapea atu, lau tofa Lealaipulē, ou te malamalama lelei ia te oe. O le ala foi la lena ou te iloa lelei lava le taimi e te saunoa mai ai lou loto, ma le taimi e

te saunoa mai ai, e te foliga foi lele e te faatauemu i fuafuaga lelei ia e faataoto atu e le Malo. O isi la saunoaga ia na aumai nei, e te saunoa faatauemu, e le o ni mea mama ia e talanoa i ai le Malo.

Tofa LEALAIPEPULU RIMONI AIAFI: Lau Afioga i le Fofoga Fetalai, ina ua ou ulufale mai i le Palemene lenei i lau Paeaiga muamua, o le mea lea sa ou lauga i ai o le uafu e oo mai lava i le Paeaiga, ia se i faavasega ifo la, o le mea la lena ou te fai atu ai, o taimi uma lava ou te tautala ai, I speak from the heart.

Lau Afioga i le Minisita, o le mea lea e popole ai ona o lea ua aumai i le Tulafono Tau Faaofi e faagafua nofoaga nei. Ia manatua foi so o se malae vaalele faava o Malo i le lalolagi lenei, e le na o le Tiute se Ofisa o se Malo e i ai, ae i ai ma le Quarantine, e i ai ma le Ofisa o Leoleo, e i ai ma le falemai. Afai la o le a fai fua galuega a le Tiute, o lona uiga o le a fai fua ma galuega a isi Matagaluega a le Malo o lo o i ai? A faapefea le malae vaalele, e faapefea ona maua ni a latou tupe maua?

O le popolega lena ma le faaaloalo lava.

FOFOGA FETALAI: O lea ua maua; ia malie le Taitai o le Itu Agai. Na faalogoina foi le mataupu lea i le felafolafoaiga i le aso ananafi ma o lea na tatou faapea ane, o le a lafo ia i le va o le Minisita ma le Pule o le Malae Vaalele ma le Pule Sili o le Tiute e feutagai i laua, ona fai ai lea o le feutagaiga mulimuli. Aua o le Tulafono Tau Faaofi fou lea ua aumai, se e le o se mea o le a tamau i ni papa-maa. O le a tatou tilotilo i ai ma vaavaai, a o lena ua tau lau fautuaga po o fea e agai i ai pe a faatino, ona fuafua lea e i laua pe a tulai mai i lea taimi i lea taimi.

Tulai mai lau Afioga i le Palemia.

Susuga Hon TUILAIPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le mea lea e toso ai le tatou Fono ona o lea tatou te talanoa faapitoa i le Pulega lea o Uafu ma Tulaga i le faatinoga o ana galuega. Ona pau lava le mea lea e talanoa i ai le Tulafono Tau Faaofi, o mea e aafia ai le Matagaluega o le Tiute ma le faafaigofieina o galuega ma le aafiaga o oloa ia aemaise o le aafiaga foi o i latou e ana oloa.

O le faigata lea tatou te talanoa ai nei, o le talanoa i Tiute ma le Pulega o Uafu, ae toso ifo ai i o i le Pulega o Malae Vaalele.

Afioga Hon PALUSALUE FAAPO II: Lau Afioga i le Fofoga Fetalai o se mea e fia faasao.

FOFOGA FETALAI: Malie se i tuu atu le avanoa i le Taitai o le Itu Agai na muamua tulai mai.

Afioga Hon PALUSALUE FAAPO II: O le mea ou te tulai atu ai lau Afioga i le Fofoga Fetalai, se ua saunoa soo lava le Palemia ma fai mai o matou e palaaai, o matou e tetee. Ona pau lava le mea e faailoa atu i le Afioga i le Palemia, matou te le tetee ae ia fai fuafua aitalafu.

FOFOGA FETALAI: O lea ua maua.

Afioga Hon PALUSALUE FAAPO II: Ia fai fuafua aua a oo mai isi auga tupulaga, ona pologa ai lava lea. O le mea lena o lea e tulai atu ai leaga ua fai soo le mea lea.

FOFOGA FETALAI: O lea ua maua. E leai, o le a faapefea ona e palaai o oe o le Aiga Malosi? Aua le ave aua o upu ma faamatalaga o lea foi e taumafai atu le Malo e tali tali atu ona o lape o lauga. Ia malilie sui usufono, o lea ua saunoa atu le Palemia ma o lau foi lea faatonuga i le taeao lenei, tautata a tatou lauga i totonu o le Tulafono Tau Faaofi, ne i meaane ua felefele. O lea la ua lagalaga ma lavea ai fua le maaveave le fua i lau Afioga i le Taitai o le Itu Agai, a o lea ua faamalamalama le saunoaga a le Afioga i le Palemia, taatia le mataupu i le va o le Minisita e pulea le malae vaalele ma le Afioga i le Minisita o Tupe Maua.

Tulai mai lau Afioga i le Minisita mo Tina ma Tamaitai, Atinae o Nuu ma Afioga ma Agaafesootai.

Tofa Hon TOLOFUAIVALELEI FALEMEOE LEIATAUA (Minisita mo Tina ma Tamaitai, Atinae o Nuu ma Afioga ma Agaafesootai): Faafetai i lau Afioga i le Fofoga Fetalai. Sa nofonofo lava ma matau i atugaluga o sui usufono mamalu i le tulaga lea i le mafiafia o le Tulafono Tau Faaofi, a o tulaga foi e teena ai le pule a le Pule Sili o le Tiute, a o lea foi ua oo i le vaega lea ua matua mamafa ai lava i le finagalo o le Taitai o le Itu Agai ma sui usufono o lo o tutulai mai, o le tulaga lea i nofoaga ia e faaoga e le Ofisa o le Tiute ma faataga ia i latou e teu ma aveese mai ai oloa e auina atu i fafo ma aumai i totonu o le atunuu.

Ana faitau lelei le Taitai o le Itu Agai ma le Itu le la i le Tulafono Tau Faaofi, ou te iloa e leai se umi o le a faaumiumi ai. O lea lava e i ai avanoa o i latou e tuuina atu ai i ai laisene mo le faaogaina o nofoaga ia latou te pulea. A o atu le Tiute e fai a latou galuega, e leai se mea o le a charge ai fua le Tiute, aua foi o la e charge e latou tagata ia e ona oloa nei e aumai ma avatu i fafo? E leai ma se mea o taofi e le Tulafono Tau Faaofi i le vaega lena, a o le pemita e avatu e le Tiute lea e mafai ai ona faaoga o latou nofoaga nei e oo lava i o i le malae vaalele.

O le Pulega o Malae Vaalele o lea e i ai faiga faavae e avatu ai lisi o potu ma vaega o le malae vaalele lea e faaoga e Matagaluega taitasi. Afai foi e fai se faaiuga a le Malo e galulue fua ona o tulaga o tupe uma o lea e faatupe e le Malo, o mea na e tatau ona malamalama i ai, a o lea e i ai le avanoa i lalo o le Fuaiupu 19, afai e le fiafia le e tuuina atu i ai le laisene mo le faaogaina o maota ia po o fale e faataunuu ma aveese atu ai oloa, a i ai se determination po o se totogi e tapa e le Matagaluega o le Tiute mai luga o gaoioiga nei ae le fiafia i ai le e ana le pemita lea po o le laisene lea, e mafai ona tetee i le Komiti.

O lea la e pei ona saunoa le Minisita o ia e taiulu i ai le Komiti lena. A o le sasa solo faalou le magā, vaeatu le faafofoga a le atunuu, e tau mai ai e le i faitau lelei le vaega le la i le Tulafono. A o le Tulafono Tau Faaofi lenei, o lena e manino le folasaga a le Minisita, o le Tulafono tuai lea ua toe teuteu, o lea ua tuu i le Tulafono Tau Faaofi fou lenei. O lona uiga o le tele lava o mea o mea tuai, ae i ai lava mea ia e tatau ona silasila i ai lea e i ai le Tulafono Tau Faaofi lea ua mafua ai ona mafiafia, a o le mafiafia foi lena na faataga mai loa lava e Lana Afioga Mamalu O Le Ao o le Malo le talanoaina

faanatinati, ou te le iloa po o le a le mea e tetee ai i le mafiafia toe talanoa faanatinati e le avea ai i le Komiti, a o lea e ui le Malo i faiga faavae e taitaiina ai galuega a le Fono Aoao e ala i Tulafono e silafia e le Malo e tatau ona faanatinati. A saina loa Lana Afioga Mamalu O Le Ao o le Malo, ua uma, aua le toe tautala i ai se isi.

Ma le faaaloalo lava, ma o i ina foi e iloa ai le faaaloalo i le saina a Lana Afioga Mamalu O Le Ao o le Malo.

Tofa LEVAOPOLO TALATONU: Lau Afioga i le Fofoga Fetalai.....

FOFOGA FETALAI: Malie lava le sui usufono se i tuu atu le avanoa ona o lea ua uma o oulua avanoa. Se i tulai mai Hon Papaliitele Niko Lee Hang.

Susuga Hon PAPALIITELE NIKO LEE HANG (Palota Taitoatasi): Faafetai lava i lau Afioga i le Fofoga Fetalai mo le avanoa. Ua leva lava ona tau saili atu se avanoa ae e le i maua, a o lea ua saunoa tonu lava le Afioga i le Minisita o Tina ma Tamaitai, Atinae o Nuu ma Afioga ma Agafesootai i le vaega lea sa ou fia taua atu i se vaivaiga o lenei sui usufono.

O lou malamalama e i ai charges a le vaega lea o lo o fai i le aufai-pisinisi o handling charges. O lea la e pei o le mataupu lea e concern i ai sui usufono mamalu o le charge lea e faapea e leai se mea i le Vaega 19 o le Tulafono Tau Faaofi, ae ou te iloa foi o la e malamalama le Tiute i le tulaga lea, ma ou te talitonu foi e leai lava ma se mea aua e tatau lava ona charge pea le vaega lea e teuina oloa i a latou charges ia i a latou telefoni ma mea faapea, charges ia e pili ai le mamalu o le atunuu ma le aufai-pisinisi ia e teu e le vaega lea a latou oloa.

O le tulaga lea sa ou fia tautala i ai lau Afioga i le Fofoga Fetalai, a o lea ua saunoa manino le Afioga i le Minisita i le tulaga lea ma lou faaaloalo lava.

Tofa LEVAOPOLO TALATONU: Lau Afioga i le Fofoga Fetalai, leaga o le faatasi lea o lau toe tulai i luga talu ona fai lau lauga pe mafai sina taimi.

FOFOGA FETALAI: Saunoa ia faapuupuu mai o lea ua maua lou finagalo.

Tofa LEVAOPOLO TALATONU: Faafetai i lau Afioga i le Fofoga Fetalai. O lea ua faalogologo ma le totoa o lea ua fai lou finagalo ina ia soalaupule i le va o Minisita le tulaga lea e pei ona saunoa le sui usufono mo Faleata Sisifo i le tulaga lava ia faava o Matagaluega a le Malo. A o lau tagitagi atu lau Afioga i le Fofoga Fetalai o au o le sui o le private sector, o au o le sui o shipping agents ia ma shipping lines ia e i ai nei.

I le tulaga la lea o le fai fua mai o galuega a le Malo e faaoga ai meatotino a Kamupani nei, ae pei ona fai atu lau Afioga i le Fofoga Fetalai, o lea ua saunoa le Minisita mo Tina ma Tamaitai, Atinae o Nuu ma Afioga ma Agafesootai, o la e talanoa mai i le Tulafono tuai aua e leai se charge na faia pe a matou o e aumai le Tiute e faatino a latou galuega i le faamatuuina o oloa. O le taimi la lenei o lea ua aumai le Tulafono Tau Faaofi ia faaavanoa se Ofisa o le Customs i totonu mo Kamupani nei, e tuu i ai le computer ma

fai uma ai mea uma e faatino ai a latou galuega. Oka, oka nei expences o le a feagai nei ma Kamupani, a o lea e taumafai e tau atiae le private sector?

Ma le agaga faaaloalo.

FOFOGA FETALAI: Se i ou tali atu lava i le mea lea leaga o lea na manino le faamalamalama a le Pule Sili o le Tiute i le aso na tatou feiloai ai.

Ua maea ona soalaupule ma ioeina e i latou uma o agencies o lo o faia auaunaga ia sa taua, ma ailoga lava o le a se tau o le a faaee atu aua e alu atu lava le tama o le Tiute ia omiomi lana telefoni ma fai ana pepa i fafo? He does not need a new computer to work there for the whole day.

I lau vaavaai i le mea lea e te atugalu ai e pei e faapea o le a fau se ofisa. E le alu atu le tama saofai i se ofisa i le aso atoa ae se i vagana ua kilia ni oloa.

Ia malilie sui usufono mamalu, ina ne i o tatou toso le laau felefele a o tatou uma lava e tiute a tatou oloa mai fafo. O le agaga lea e aumai i le Tulafono Tau Faaofi ia faa-upgrade agencies ma outou uma ia e galulue ai, ae e le faapea o le a fai e le agent se isi ofisa e alu ai se \$100,000+ ma nisi totoa. O lau vaai ma lou talitonuga o lea ua malamalama le mataupu.

Se i tulai mai le sui usufono mo Faasaleleaga Nu.2.

Susuga PAPALII LIO FAAVAIVAIOMANU TAEU MASIPAU (Faasaleleaga Nu.2): Faafetai i lau Afioga i le Fofoga Fetalai. E leai e ese le vailiu lea e tau fai atu ai sau fesoasoani.

Faafetai lava i le Minisita mo Tina ma Tamaitai, Atinae o Nuu ma Afioga ma Agafesootai i le tau faailoa mai o le tulaga lea na ia faamalamalamaina, lea na ia taua mai ai e faapea e le malamalama lenei Itu. A o lea na ia faapea mai a faasea le fai laisene ona ave lea i le Minisita. E leai, o le vaega lea e i le Tulafono, e ave i le Custom Authority, a o lea e tau mai i inei e le i ai i totonu le Minisita. O lena e tau atu ai o lea e malamalama lenei Itu, ae faafetai i lau Afioga i le Fofoga Fetalai.

FOFOGA FETALAI: Malie le sui usufono e tataua ona ou toe faamanatu atu le mea lea. O lea o le a amata lava ona sese tele. E le mafai ona e faauilavea i le isi faauilavea, ae e tataua ona agai tonu lau mataupu i le Minisita e a ia le Tulafono Tau Faaofi e faamanino ai.

Lealailepule.....

Tofa LEALAILEPULE RIMONI AIAFI: Lau Afioga i le Fofoga Fetalai, e leai na ona fia fesoasoani atu i lau Afioga i le Minisita.....

FOFOGA FETALAI: Malie lava se i uma ona avatu lea o le avanoa Le Mamea, ae se i tuu atu le avanoa mulimuli lea mo Lealailepule.

Tofa LEALAILEPULE RIMONI AIAFI: Lau Afioga i le Minisita e le tasi le Tulafono lea e faitau e matou, e faitau le Tulafono Tau Faaofi fou i le isi itu, ae faitau le Tulafono tuai i le isi itu. E lua Tulafono ia e faitau. A uma la ona faitau sao ona faau lea i luga ae faitau atu i tua agai i luma.

Lau Afioga i le Fofoga Fetalai, o le mea lea e fai atu ai nei, o malosiaga ia ua aumai nei e le Ofisa o Tiute e le gata ina avatu e le Ofisa lenei ma Matagaluega a le Malo e pei o le Malae Vaalele ma le Pulega o Uafu le

avanoa e fai ai a latou galuega, ae avatu ma mea e faatino ai galuega ma toe maintain. O le faatupega uma o galuega o lea o le a fai e Matagaluega ia a le Malo e pei o le Pulega o Uafu ma le Pulega o Malae Vaalele e aunoa ma se mea e toe totogia e i latou. O mea fou la nei lau Afioga i le Fofoga Fetalai, e le o ni mea tuai na i ai i le Tulafono tuai. O lona uiga o lea ua tele le malosiaga ae ua avatu ai ma le demand i le Tulafono Tau Faaofi lenei ina ia aumai uma e latou. Se i vaai i ai, ia saunia ma tausia so o se vaega e faatinoina ai galuega. O apitaga ma mea uma e faatino ai le auaunaga, o fale, o mea faigaluega ma fale e teu ai oloa. O mea uma lava, afai e pasia le Tulafono Tau Faaofi lenei o tulaga na e agai i ai.

O le mea lena o lea e fai atu ai nei po o malamalama i ai le tóatele o Matagaluega a le Malo aemaise o nai tagata faipisinisi.

FOFOGA FETALAI: O lea ua malamalama. Tulai mai le Minisita mo Faatoaga, Faleoloa o Faatoaga ma Faigafaiva.

Afioga Hon LE MAMEA ROPATI (Minisita mo Faatoaga, Faleoloa o Faatoaga ma Faigafaiva): Se i tuu atu lava sina fesoasoani i le mataupu ona e faigofie lava le mataupu. E moni o le Tulafono fou ae ou te iloa o mea tuai lava. O le a ou agai muamua atu i le mataupu lea na saunoa i ai le sui usufono mo Gagaemauga Nu. 2.

Ia manatua foi a aumai ni oloa mai fafo, a faapea e fa ni au container ae access le tiute pe \$1,000,000, ae a ave oloa nei e i le container i le fale lea ua uma ona laisene, e le totogia se tiute. E tuu ai i ina seiloga e te manao e faaoga oloa ona faatoa totogi auauai lea o le tiute. O le matua tele o le fesoasoani i le aufaipisinisi o lo o fai e le Malo. Aua a faapea e totogi tiute o mea uma ia i le taimi e tasi, e matua faigata aua e le faapea e avatu loa oloa nei taulia uma loa i le taimi e tasi, ae a aumai tuu i le fale lea ua uma ona fuafua ma laisene e tuu ai, a manaomia loa o le a faaoga ona faatoa o atu lea o tagata o le Custom e access po o fea le tiute o mea ia o le a aveese. O le matua tele o le fesoasoani aua o le uiga o le mea lea, o lea e totogi auauai tiute o oloa ia na aumai. O le fesoasoani muamua lea, o le matua tele o le aoga o le mea lea ma o le mea foi lea ua manao ai le aufaipisinisi e talosaga mo fale ia e faafaigofie ai mo latou le totogiina o tiute ma mea ia. O le mea muamua lea.

O le vaega lea i le mataupu lea e agai mai ai le Tofa Lealailepule. Ia manatua foi o le malae vaalele, a leai le vaega lea o le Custom, Quarantine, le falemai ma vaega faapena, e le mafai ona faatagaina ni tagata e o ese ma le malae vaalele e pei o tagata ia mai fafo. E tatau lava ona i ai services uma ia i totonu o le malae vaalele. E tatau ona i ai le Quarantine aua a leai nisi o le Quarantine, e le mafai ona faagaioi le malae vaalele, e faapena foi le Custom, e le mafai ona omai nisi mai fafo. O lona uiga o le service lea e provide e Matagaluega nei e fesoasoani mo le malae vaalele. E leai ni mea se tele o i ai i o, ua na o nai potu lava la e malolo ai e faatalitali ai taimi e taunuu mai ai vaalele i le po. A taunuu le vaalele ae le o i ai tagata ia, e tu ai lava i o le vaalele ma le pasese e le mafai ona o i fafo. O lona uiga e tatau ona fiafia le Airport Authority ona o lea e i ai services ia, lea e o atu e faatino le mea lea.

O le faamalamalama o lea mea, e faigofie lava e leai ni mea tetele pei ona e saunoa mai i ai. Faafetai.

Tofa LEALAILEPULE RIMONI AIAFI: Lau Afioga i le Fofoga Fetalai, e faamalulu atu foi i le Afioga i le Minisita, o lea ou te malamalama i le mea lena e te saunoa mai ai. E le o le mea lena sa ou tautala atu ai i lou manatu. E i ai lava services ia, ae pei ona ou fai atu, o mea ia e tumau i le malae vaalele faava o Malo, ma uafu faava o Malo. A o le mea lena sa i ai, e totogi le auunaga lea, e totogi le tupe i le malae vaalele e operate ai leaga o le malae vaalele e ese foi lana Pulega. A o le mea lena e aumai i le Tulafono Tau Faaofi, o lea o le a galulue fua, e le gata ina galulue fua le Ofisa o le Tiute ae toe faapotu i ai ma meafaigaluega ma mea faaopoopo, o lea o le a faatupe uma atu i lalo o le Pulega lena i le uafu ma le malae vaalele.

O le mea la lena o lea e fesili i ai lou sui usufono, po o malamalama la i ai Matagaluega nei a le Malo? A o le i ai o tagata ia i o, e leai e tatau ona i ai Matagaluega nei a le Malo, na i ai lava talu mai le amataga, ae totogi foi o latou potu e oo mai i le aso. O lona uiga a pasia loa le Tulafono Tau Faaofi lena, ae o lona uiga o le a galulue fua la na o le Ofisa o Tiute ae totogi pea la potu o le isi vaega lea. O le mea sa i ai, na o le potu e ave i ai, provide e latou equipments ma mea e fai ai latou galuega, a o le mea lena e sau i le Tulafono fou, e leai e faatupe atoa lava e le Pulega mea uma nei e oo lava i computer ma mea ia pei ona saunoa atu ai le sui usufono mo Gagaemauga Nu.2. Ma le faaaloalo lava.

FOFOGA FETALAI: Ia, taatia maia lou finagalo Leala o lea e faafofoga mai Minisita. E le o i ai foi Tuivalea i Minisita. O le a taatia se i faaalu leaga o lea ua uma ona soalaupule le Tulafono Tau Faaofi. O a fa au i le lumanai, ona tatou toe tilotilo lea i ai.

Tulai mai le sui usufono mo Gagaemauga Nu.2.

Tofa LEVAOPOLO TALATONU: Faafetai, ae leaga o lea ua taua lou igoa i i, o lena e saolele lava le saunoaga ma le faamalamalama a le Afioga i le Minisita. Ae pei lava o lea na tolaulau atu e le sui usufono mo Faleata Sisifo le Tulafono Tau Faaofi, e \$4,000 le tau o le computer lea o le a ou alu e fai, faatau mai aua le galuega lea. O printers, totogi ma lau cashpower. O mea uma ia na faatino fua ai galuega a le Tiute lea na ou tau avatu analeila. A o le faalogo a Minisita e sese uma lava le latou faalogo i le mea lena ou te fai atu ai. Ma le agaga faaaloalo.

FOFOGA FETALAI: Se i tulai mai lau Afioga i le Minisita.

Tofa Hon TOLOFUAIVALELEI FALEMOE LEIATAUA: O le mea lena ua aliali mai lau Afioga, faafetai mo le avanoa, e mananao lava sui usufono o le Itu Agai e fai le mea latou te loto i ai, ae ese la latou silasila agai i le tulaga, ese le vaai a le Malo. Ma e sili atu le vaai a le Malo, aua o le Malo e ana le Tulafono Tau Faaofi na fautuaina foi le Loia Sili, o la e ua talafeagai. Ma o lea ua uma ona matou faamatalaina atu nisi vaega ia, a o le mea e tatau ona silafia e le Itu Agai, afai o le Itu Agai, e tatau ona faaleo maia, ae aua le finau, aua le finau, aua e le faia le mea e finagalo i ai latou, ae fai lava le mea e finagalo i ai le Malo.

Afioga Hon PALUSALUE FAAPO II: Lau Afioga i le Fofoga Fetalai, o le mea e fia faasao. E sese le mea lena tou te tutulai mai ai, o lea e tau faasao atu i i.

FOFOGA FETALAI: Malie Palu.

Tofa Hon TOLOFUAIVALELEI FALEMOME LEIATAUA: Nofu i lalo Palu, aua e te le migao o lea ou te tautala. O oe foi o lau uo alii. A o le mea lena, ou te fautua atu ai i le sui usufono mamalu, o mea na tou te finau ai, aua leaga o le Customs, e le o sona finagalo na faavae ai fale ia e faamautu i ai oloa. O la e i ai fale i le malae vaalele, o le mea lena e i lalo o Pulega a le Malae Vaalele, e pule le Malo. Afai la e fetuutuunai o a ni fees e totogi pei o mea ia o rentals ma mea faapena i le faaaogaina o potu, o le mea lena e pule ai le Malo. A o le mea lea i le faaaogaina o a outou computers, o le mea tatau. Malie Levaopolo o le mea e tatau ona outou faia, ina ia o atu le Customs e faataunuu le latou galuega e fai mo le faamatuu atu o oloa a i latou o auina mai fafo po o oloa e ave i fafo mai tagata o le atunuu, o outou e faia le mea lena, ae charge e outou tagata, e le charge ina e outou le Customs. Faamolemole e sese le mea lena, leaga o le Custom lea e faatino lona tiute mo le faataunuina o le service delivery mo tiute e tatau ona maua e le Malo mai oloa ia e aumai fafo ma oloa e auina i fafo. Ma le faaaloalo ae le o se mea o le a tee ai se uluga, ae ia lauama tootoo le tatou Fono, o le Tulafono, o le Tulafono Tau Faaofi a le Malo. O le mea lea ia onosai seia i ai se taimi, afai tou te seei i i ona outou iloa loa lea, se e sao lava toeiaina ia na i ai muamua. Ia ma le faaaloalo. Ia manuia le Fono.

Afioga Hon PALUSALUE FAAPO II: Lau Afioga i le Fofoga Fetalai o se mea e fia faasao.

FOFOGA FETALAI: O le a le faasaoga Palusalue?

Afioga Hon PALUSALUE FAAPO II: O lea e fia faasao fai mai o matou e taumafai foi lea e milomilo le Tulafono Tau Faaofi.

FOFOGA FETALAI: Leai, malie ia Palusalue....

Afioga Hon PALUSALUE FAAPO II: O le mea lea e fai atu ai, leaga o matou sa faigaluega i le malae vaalele e malamalama lelei i mea ia. O lea la e fai atu i le Kapeneta ae tutulai mai faauilavea, o le matua le fetau lava, e le malamalama i le latou Tulafono Tau Faaofi.

Ma lou faaaloalo lava.

FOFOGA FETALAI: Ia, ua malamalama le mataupu. E manatu ua taatia i lagatonu le tulaga o le taumafai mai foi o la outou pitolaau, ae ua uma ona ou fai atu muamua, taatia laia i le Minisita e a ia le Matagaluega o le Malae Vaalele ma le Minisita o le Tiute e soalaupule laua i le mea e sili ona talafeagai.

Faamaonia le Fuaiupu 19.

FUAIUPU 20: Tau faaee atu mo le teuina o oloa.

Faamaonia.

FUAIUPU 21: O oloa e noatia i le vaavaaiga a le Tiute.

FOFOGA FETALAI: Se i tulai mai le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): O le Fuaiupu 21 lau Afioga i le Fofoga Fetalai.

FOFOGA FETALAI: Saunua le sui usufono.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. E fia faaali se manatu i le vaega lea o oloa e le o aumai, a o oloa ia e ave i fafo. O le faanaunautaiga lau Afioga i le Fofoga Fetalai ina ia mafai ona lava puipuia a tatou... aemaise lava i oloa faale-punaoa faalenatura ona e maitauina i le tele o tausaga ua tuanai i le tele o nisi foi o figota pei o maisu, o nisi o figota taua a le tatou atunuu, o lea e sao atu i fafo. Ae le gata i lea o nisi foi o laau o lo o mafai ona ave i totonu o ato, o nisi o meaola o lo o mafai ona ave i totonu o ato, ae tele lo latou value po o property right i totonu o Samoa ae o lo o mafai ona auina atu i fafo. E maitau atu i le Fuaiupu 21 lea, pei seiloga e faailoa e tagata, a o le tele o vaega taua nei e illegal i totonu o le Tulafono foi lea i nisi o maliega faava o Malo e tai pei o le CITES, o le Convention Bio-diversity, o lea e puipuia ai rights a Samoa, o le tele o tagata ia latou te aveia ia punaoa faalenatura taua o lo o ave faanana. E talosagaina ai la e le gata i se tuualalo i le Pulega a le Custom ia galulue faatasi ma le quarantine, aemaise le Matagaluega o le Siosiomaga, ona ou te vaai atu atonu e le o mafai ona iloa tumau mai i le vaega lea o le Tulafono Tau Faaofi le puipuiga o nisi o nei punaoa lau Afioga i le Fofoga Fetalai e tuu i totonu o ato po o ofu o i latou e o atu i fafo. E ao la ona i ai se vaega e iloiloiloina, e le gata o le aveese atu, a o le i ai foi o maliega faapitoa e mafai ai ona aveeseina atu nei punaoa faalenatura. E tatau foi ona atagia i totonu o le Tulafono Tau Faaofi i le vaega lea, ia i ai se agreement po o ni pemita e maua mai i vaega eseese ia, ina ia mafai ona puipuia ai nei vaega. Faafetai lava.

Faamaonia le Fuaiupu 21.

FUAIUPU 22: Faasilasilaga o le taunuu mai, ma isi tulaga faapena.

Faamaonia.

FUAIUPU 23: Manaoga e tali atu ai i fesili.

Faamaonia.

FUAIUPU 24: O le aumaia i totonu o vaa.

Faamaonia.

FUAIUPU 25: Ia taunuu vaalele i nofoaga ua atofaina e le Tiute.

Faamaonia.

FUAIUPU 26: Vaalele e taunuu mai i se nofoaga e ese ai i lo nofoaga ua atofaina e le Tiute.

Faamaonia.

FUAIUPU 27: Lipoti agai mai i totonu.

Faamaonia.

FUAIUPU 28: Ia lipoti atu tagata e taunuu mai i Samoa, i se tagata ofisa o le Tiute po o se ofisa o Leoleo.

Afioga TOEOLESULUSULU CEDRIC POSE SALESA SCHUSTER:
Lau Afioga i le Fofoga Fetalai....

FOFOGA FETALAI: O le a le Fuaiupu Toeolesulusulu?

Afioga TOEOLESULUSULU CEDRIC POSE SALESA SCHUSTER:
Lau Afioga o le Fuaiupu 28.

FOFOGA FETALAI: Saunoa le sui usufono mamalu.

Afioga TOEOLESULUSULU CEDRIC POSE SALESA SCHUSTER:
Faafetai atu i lau Afioga i le Fofoga Fetalai. Ona e maitau atu i le vaega lea e pei foi lava o le fautuaga i ai i le Pulega a i latou i le Malae Vaalele, ona o lea e pei e foliga mai i le faaupuga o le Tulafono Tau Faaofi i le vaega lea, e muamua alu i le Customs Officer, a ia mafai ona galulue faatasi. O lo o i ai pea le faataatiaga o lo o i ai i le taimi nei, ae pei o lea e maitau atu i le

faaupuga o lo o sau ai i totonu o le Tulafono Tau Faaofi lea, e muamua Customs, ae pei o lea lava e muamua oo ma i le Immigration ona faasolo mai ai lea. O nisi foi o vaega e tele lava ina pasia le Customs, a o le siakiina o ato. E fautuaina ai ina ia mafai ona galulue faatasi le Matagaluega po o le Pulega o lo o latou vaai le ulufale mai o i latou uma, ina ia soalaupule lelei lea vaega o le Tulafono Tau Faaofi. Faafetai.

FOFOGA FETALAI: Malo.

Faamaonia le Fuaiupu 28.

FUAIUPU 29: O le ulufafo mai vaalele.

Faamaonia.

FUAIUPU 30: Ia tuuina atu ato malaga.

Faamaonia.

FUAIUPU 31: Ia malaga ese atu tagata mai Samoa mai nofoaga tau le Tiute.

Faamaonia.

FUAIUPU 32: Ulufale atu i totonu o vaalele.

Faamaonia.

FUAIUPU 33: Ia tuuina atu ato malaga mo fafo.

Faamaonia.

FUAIUPU 34: E faasa le faaogaina o masini tau fesootaiga faaeletoroni i nisi nofoaga.

Faamaonia.

FUAIUPU 35: Faamaeaina o le faagasologa o taualumaga i lalo o tulafono o le ulufale mai ma tulafono tau le puipuiga mai meaola faalafua ma le salalau o faamai.

Faamaonia.

FUAIUPU 36: O mataupu e manaomia ai suesuega mo faamoemoega o le soifua maloloina o tagata po o le faamalositia o tulafono.

Tofa LEVAOPOLO TALATONU: Lau Afioga i le Fofoga Fetalai, o le Fuaiupu 36 lau Afioga.

FOFOGA FETALAI: Ia, ona e manatu o lea ua tatou taunuu i le tatou taimi malolo, o le a avatu le avanoa o le sui usufono mamalu pe a tatou toe taliu mai i le tatou malologa masani.

Ou te faasilasila atu o le a faataatia ese Taulumaga a le Fono Aoaio Faitulafono mo lana malologa masani o le taeao.

Na faataatia ese Taulumaga a le Fono Aoaio mo lana malologa masani i le itula e 10:44 i le taeao ma toe amatalia i le itula e 1:27 i le taeao.

FOFOGA FETALAI: Ou te faasilasila atu ua toe amataina nei Taulumaga a le Fono Aoaio Faitulafono.

E talitonu ua faafoisia le malosia o le tino, aua o lea ua maea le palega auau o le sua, aemaise o le tautega i leni vaega o le aso. E momoli atu ai le agaga faafetai tele i le onosai mai o le Maota mai le taeao analeila sa tatou faatinoina ai le vaega muamua o le tatou fonotaga, ae faafetai mo leni taimi ua tatou taunuu mai i le faasologa o le tatou galuega i leni aso.

Ia, onosai mai le paia ma le mamalu o le tatou Maota, o lo o faagasolo pea le tatou galuega ma le talitonuga o le a tatou laasia se tasi o vaega tele ona o lo o i ai se vaega taua, aemaise foi o nisi o faamoemoega taua o lo o auga i ai le aso.

A o le i amataina le tatou galuega, ou te fia tuuina atu le avanoa i le Afioga i le Palemia mo le lafo.

LAFO MO LE FAAAUAUINA O ITULA FONO

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu e faatu le lafo, talu ai o le taua o leni Tulafono Tau Faaofi o lo o faagasolo nei, ou te faatuina ai le lafo, *Ina ia faaaauu pea le tatou Fonotaga i le aso seia pasia le Tulafono Tau Faaofi o le Ofisa o Tiute 2014.*

Faaluaina e le Sui Palemia, Minisita mo Tupe Maua, Minisita mo Galuega Tau Alamanuia ma Atinae a le Malo ma le Minisita mo Fesootaiga ma Faamatalaga Tekonolosi.

Na faamaonia le lafo.

LAFO A LE KOMITI O GALUEGA, TULAFONO TUMAU, MAOTA FONO MA MATAUPU TAU FAIGA PALOTA

FOFOGA FETALAI: Tulai mai lau Afioga i le Sui Fofoga Fetalai.

Tofa AGAFILI PATISELA ETEUATI TOLOVAA (Sui Taitaifono, Komiti o Galuega, Tulafono Tumau, Maota Fono ma Mataupu Tau Faiga Palota): Lau Afioga i le Fofoga Fetalai ma le paia o le Maota, ou te tulai atu e faatu ni lafo se lua e faapea:

1. *Ina ia faamaonia e leni Fono Aoa le filifilia o le Afioga Hon Faumuina Tiatia Liuga e avea ma sui usufono o Komiti Filifilia nei:*
 - (i). *Komiti o Tupe Maua ma Tupe Totogi.*
 - (ii). *Komiti o le Soifua Maloloina, Galuega Tau le Va Fealoai, Mataupu Tau le Lotoifale ma Atinae o Nuu ma Agafesootai.*
 - (iii). *Komiti o Tulaga Aloaia ma Amio Taualoa.*

2. *Ia faamaonia e leni Fono Aoa le filifilia o le Tofa Faimalotoa Kika Iemaima Stowers ma sui usufono o Komiti Filifilia nei:*
 - (i). *Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa.*
 - (ii). *Komiti o Mataupu tau le Va i Fafu, Fefaatauaiga ma Tupe Maua.*
 - (iii). *Komiti o Faafoega tau Pulega a le Malo.*

Ma lou faaaloalo.

Faaluaina e le sui usufono mo Aleipata Itupa i Lalo.

Na faamaonia le lafo ma faamaonia ai e le Fono Aoa le filifilia o sui usufono mo Komiti Filifilia a le Palemene e pei ona faatulagaina i le lafo.

FOFOGA FETALAI: Ia, o le a i ai se taimi mulimuli ane pe a tatou alo atu i le tatou malologa masani o le aoauli, o le a faatinoina ai se polokalame faaiu a alo ma fanau a le tatou atunuu mai kolisi maualuluga ua tatou faatasi i leni aso. O lo o fai mai iinei le faaiuga mulimuli o le latou tauvaga speech e uiga i mataupu Faapalemene. O lona uiga a tatou malolo i le tatou malologa masani o le aoauli, o le a tali la outou sua ma outou faafofoga i finals, ua filifilia mai i aoga e fai i totonu o le tatou atunuu. E lelei foi lena ina ia tali la outou sua ma outou faafofoga ai i finagalo, manatu ma lagona o fanau ua i le toafa aupito i luga mai aoga maualuluga uma a Samoa. O le tauvaga tusiga lauga leni faa-Peretania ua saunia e alo ma fanau o le tatou atunuu, ma o le a fai ai lava ma le laugatogi iinei i le ta o le 1:00 i le aoauli.

Na toe faaauau felafolafoaiga i luga o le iloiloga auiliili o le Tulafono Tau Faaofi o le Ofisa o Tiute 2014.

FOFOGA FETALAI: E faia le tatou malologa o tatou faagasolo pea i le Tulafono Tau Faaofi o le Ofisa o le Tiute 2014 ina ia lauliliuina ma le faamoemoe ia faataunuaina lona pasiaina i le aso.

Tofa LEVAOPOLO TALATONU: Lau Afioga i le Fofoga Fetalai.....

FOFOGA FETALAI: O le a le mataupu?

Tofa LEVAOPOLO TALATONU: O le Fuaiupu 36 lau Afioga i le Fofoga Fetalai.

FOFOGA FETALAI: Tulai mai le sui usufono mamalu.

Tofa LEVAOPOLO TALATONU: Faafetai. Lau Afioga i le Fofoga Fetalai, o le vaega lea o le Tulafono o lo o avatu ai le malosiaga i tagata ofisa o le Tiute, e taofia ai se ua masalomia po o se pasese foi e agai atu po o le agai mai i totonu o le malae vaalele, ua afaina po o ua i ai se tulaga foi lele e afaina ai le soifua maloloina, e le gata i lena e taofia ai foi ia ni tulaga foi ia o ni mea taumafa po o ni mea e aafia po o ni meaola faalafua po o iniseti e aafia ni mea faapena, lau Afioga, o lau fesili atu lava i le Afioga i le Minisita mo Tupe Maua, po o ua lava tapena le aufaigaluega i le latou silafia ma le latou agavaa e latou te silafia ai ia le tulaga o le aafia o le soifua maloloina o nisi, e le gata i lena a o ni faamai ogaoga e pei ona nafa ma le Quarantine?

O le fesili lona lua lau Afioga i le Fofoga Fetalai, e fesili atu foi i le Afioga i le Minisita mo Faatoaga, po o le a la le galuega a le Quarantine lea o le a fai i i o lea ua pei ua i lalo uma o le malosiaga o le Customs? E faapena foi i lau Afioga i le Minisita mo le Soifua Maloloina, o lea foi ua manino mai i le Tulafono le vaega lea o lea o le a nafa foi ma le Ofisa o le Tiute ia le silasila i ē e aafia soifua maloloina, po o le a le tulaga o le a i ai nei ia tatou Matagaluega nei? Ma le agaga faaaloalo, faafetai.

FOFOGA FETALAI: Ia o lea ua maua, se i tulai mai le Afioga i le Minisita mo Faatoaga, Faleoloa o Faatoaga lega o lea na taua le Ofisa o Faatoaga.

Afioga Hon LE MAMEA ROPATI: Ia faafetai, ia o le mea masani lava lea lau Afioga, pei ona ou taua analeila o Matagaluega nei o lo o aafia i vaalele foi ia o tagata ia e omai, lea e lavea ai le Customs, o le Agriculture i le vaega lea o le Quarantine a matou faapea foi le Health, a o le Tulafono Tau Faaofi la lena, o lea e faasinotonu i le Customs ia po o le Tiute. E manatua foi, e ui lava ina tau mai le Customs i totonu o le vaega lea e saunoa i ai le sui usufono mamalu lea e tau mai ai le Customs Officer, a o latou ia e galulue faatasi, galulue faatasi lava. E manatua foi i le tagata foi lele ua sau mai fafo ma le vaalele ae sau ma lana ato la e i ai lana pepa foi lele e tick ai lea mea ma lea, a, a faapea i le pepa lea o tick ai pe fesili mai po o i ai ni mea taumafa po o ni mea faapena e aumai, e te tago tick le column

lena, a sau la i totonu o le malae vaalele ae tagai atu le ofisa aua o le ofisa muamua lava e tau mai ai o le Customs, tagai i ai po o i ai se mea o la e tick i mea tau taumafa po o ni laau foi ia o aumai i totonu, e faasino i i i le auvaega lea e i tua mai i le Quarantine, ia ona suesue ai lea i ina, a faapea e suesue foi e le au Quarantine latou mo mea lava foi ia e mafai ona faataga le tagata e alu ma ave ana mea ia i tua, ia e faapena, a faapea foi o ni mea e taofia, ia e confiscate lava ma ave e le Matagaluega ma susunu i tai, vaeane lava foi le faadfofoga mai o le paia o le.....e faapena ia le tulaga o lo o i ai. E ui lava la o lo o tau mai o le Customs Act lea, a, ia ae galulue faatasi lava le vaega lea, o lena ua i ai le pepa foi lele e te taunuu mai loa, ia o le mea lena a faapea e tau mai ai mea tau faatoaga latou, ia ona faatumu lea e le tagata lana pepa ma vase ai le mea lena, ia a tagai atu la le tagata o le Ofisa o le Customs o la e i ai mea na, ia ona refer lea i i, ae a leai, e alu sao lava i le mea lea e i ai le X-ray ma X-ray ai, a i ai la ni mea e maua mai i ina ile X-ray e tataua ona...ia e toe faafoi mai lava i tua le atopau po o le a a le tagata lea se i toe suesue lelei po o le a le tulaga e i ai, pei o le tali atu lena, e moni lava la o lea e i lalo o le Customs Act, ia ae galulue faatasi lava, faafetai.

Faamaonia le Fuaiupu 36.

FUAIUPU 37: Kiliaina o vaalele.

Faamaonia.

FUAIUPU 38: Tusi faamaonia o le kilia.

Tofa LEVAOPOLO TALATONU: Lau Afioga i le Fofoga Fetalai o le 38.

FOFOGA FETALAI: Tulai mai le sui usufono mamalu.

Tofa LEVAOPOLO TALATONU: I mea ia o le kiliaina o tatou vaalele. Na ona ou faamanatu atu i le Afioga i le Minisita, ia o lea ua manino le Tulafono, e le mafai e se Airline se ofisa o le Airline ona kiliaina ni tatou vaalele, na ona ou faapena atu lau Afioga.

Faamaonia le Fuaiupu 38.

FUAIUPU 39: O le ulufale atu i vaalele e malaga ese atu i fafo.

Faamaonia.

FUAIUPU 40: Tuuina atu o tusi faamaonia o le kilia.

Faamaonia.

FUAIUPU 41: Ia na o le nofoaga tau le Tiute e malaga ese atu ai.

Faamaonia.

FUAIUPU 42: Poloaiga faa-Minisita i oloa ma vaalele.

Faamaonia.

FUAIUPU 43: Faamatalaina o uiga o upu.

Faamaonia.

FUAIUPU 44: Faamoemoe.

Faamaonia.

FUAIUPU 45: Tagata e faaoga i ai le fuaiupu 46 po o le 47.

Faamaonia.

FUAIUPU 46: Faamatalaga e uiga i vaalele e sopoia tuaoi.

Faamaonia.

FUAIUPU 47: Faamatalaga e uiga i tagata e sopoia tuaoi.

Faamaonia.

FUAIUPU 48: O nisi aiaiga e uiga i le tuuina atu i le Tiute o avanoa i faamatalaga i lalo o le fuaiupu 46 po o le 47.

Faamaonia.

FUAIUPU 49: Faafoega o lo o faaaogaina ai e le Tiute o faamatalaga.

Faamaonia.

FUAIUPU 50: Faamatalaga e uiga i malaga i totonu o se vaitaimi e 28 aso.

Afioga TOEOLESULUSULU CEDRIC POSE SALESA SCHUSTER:
Lau Afioga i le Fofoga Fetalai.....

FOFOGA FETALAI: Tulai mai lau Afioga i le sui usufono mamalu mo Aana Alofi Nu. 3.

Afioga TOEOLESULUSULU CEDRIC POSE SALESA SCHUSTER:
O le fuaiupu 50 lau Afioga e fia maua ai sina malamalamaaga i le vaega ua ala ai ona faapitoa i le 28 aso le manaomia o information ia e taua, pe aisea ua faatapulaa ai i le 20 aso, pe e i totonu mai o le 28 aso, faamolemole.

FOFOGA FETALAI: Se i tulai mai le Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIEGAOI: Lau Afioga i le Fofoga Fetalai, o le 28 aso o le masina atoa lava lena, ua matua lava ma totoe lena taimi e tatau ai ona tapena mea ia o lo o moomia, o le tulaga tonu lena e tatau foi ona talafeagai ma lava le taimi e tapena ai le tagata mo faamatalaga o lo o moomia.

Faamaonia le Fuaiupu 50.

FUAIUPU 51: E mafai ona sueina faamatalaga e uiga i isi malaga, mo faamatalaga e faasino i tagata malaga i totonu o le vaitaimi e 28 aso.

Faamaonia.

FUAIUPU 52: Tusi poloaiga e sueina ma mataitu ai.

Faamaonia.

FUAIUPU 53: Sueina male mataituina e aunoa ma se tusi poloaiga, i taimi o faalavelave tutupu faafuasei.

Tofa AVEAU TUALA LEPALE NIKO PALAMO: Lau Afioga i le Fofoga Fetalai.....

FOFOGA FETALAI: Ia tulai mai le sui usufono mamalu.

Tofa AVEAU TUALA LEPALE NIKO PALAMO: O le fuaiupu lea e 53 lea e sau ai le vaega lea e sueina ma mataituina e aunoa ma se tusi foi lea o se warrant, a vaai i le (b) o lo o faapea mai; “ua manatu le Pule Sili o le Tiute e faapea, afai o le a ia talosaga i se Faamasino mo se tusi poloaiga e sueina ma mataituina ai, i lalo o le fuaiupu 52, o le a faapea ona faamatuu mai e le Faamasino le tusi poloaiga;” O lea ou te faitau atu i le Tulafono lea, pei o lea ua manatu le Tulafono e tatalo atu loa ia le Pule Sili aumai loa ma le warrant, a o lea e fai mai le vaega lea, aua e i ai mea ia e tatau ona suesue ai le warrant. Pei ua fai sina matuia o lea vaega o le Tulafono o lea lava ua manatu le Pule Sili e fai atu loa aumai loa e le Faamasino le....

FOFOGA FETALAI: O lea ua maua le finagalo o le sui usufono, a faitau lelei i le uiga o le Tulafono, tusi poloaiga i taimi o faalavelave tutupu faafuasei. O lona uiga, e tatau ona tatou manatunatu lelei e i ai taimi tuga ma taimi faigata o le atunuu, ia e tatau ona tuusao le mea e tatau ona fai i le taimi o mea o lo o tutupu mai. O le agaga lena ma le uiga o le Tulafono e ese ai a tatou faiga faavae, ae i ai le malosiaga seia vagana taimi o faalavelave faafuasei ona faatino lea e le Pule Sili le tulaga lena.

Faamaonia le Fuaiupu 53.

FUAIUPU 54: Tualumaga pe afai e le o faatagaina le mataituina o faamatalaga.

Faamaonia.

FUAIUPU 55: Malupuipua o talosaga mo tusi poloaiga.

Faamaonia.

FUAIUPU 56: Faamatalaga ma le faailoaina atu i le fuaiupu 55(7).

Faamaonia.

FUAIUPU 57: Faalēaogaina o faamatalaga ua aoina e le Tiute.

Faamaonia.

FUAIUPU 58: Puipuiga o tagata o galulue i lalo o le pule faataga a lenei Vaega.

Faamaonia.

FUAIUPU 59: E le faatapulaaina e lenei Vaega isi avanoa i po o le faaāogaina o faamatalaga.

Faamaonia.

FUAIUPU 60: Pepa tusia o oloa faaulufale mai.

Faamaonia.

FUAIUPU 61: Pepa tusia faa-tuutuuga o oloa.

Faamaonia.

FUAIUPU 62: Faaooina atu o oloa i luga o pepa tusia faa-tuutuuga.

Faamaonia.

FUAIUPU 63: Poloaiga faa-Minisita i pepa tusia o oloa faaulufale mai.

Faamaonia.

FUAIUPU 64: Tuuina atu o inivoisi ma tautinoga.

Faamaonia.

FUAIUPU 65: Poloaiga faa-Minisita i totogifuapauina ma tau faaee atu i le faaulufale mai o oloa.

Faamaonia.

FUAIUPU 66: Ia tagofia oloa faaulufale mai i le faia o se pepa tusia.

Faamaonia.

FUAIUPU 67: Faaleaogaina ma teuteuga o pepa tusia.

Faamaonia.

FUAIUPU 68: Laueseina o oloa.

Faamaonia.

FUAIUPU 69: Faaulufale mai o se vaalele, e ese ai i lo se uta.

Faamaonia.

FUAIUPU 70: Vaegamea faataitai po o faataitaiga.

Faamaonia.

FUAIUPU 71: Felauaiga o oloa faaulufale mai.

Faamaonia.

FUAIUPU 72: Aveesea o oloa mai nofoaga e pulea e le Tiute.

Faamaonia.

FUAIUPU 73: Aveesea le tumau o oloa mai nofoaga e pulea e le Tiute.

Faamaonia.

FUAIUPU 74: Pepa tusia o oloa mo le auina ese atu.

Faamaonia.

FUAIUPU 75: Poloaiga faaminisita pepa tusia o oloa mo le auina ese atu.

Faamaonia.

FUAIUPU 76: Tusi faamaonia a Samoa o le atunuu e faapogai mo oloa e auina ese atu i vaega auai i feagaiga tau fefaatauaiga saoloto.

Faamaonia.

FUAIUPU 77: Faalapotopotoga faatagaina e tuuina atu tusi faamaonia a Samoa o le atunuu e faapogai.

Faamaonia.

FUAIUPU 78: Poloaiga faaminisita i tusi faamaonia a Samoa o le atunuu e faapogai ma faalapotopotoga tau le faamaoniga.

Faamaonia.

FUAIUPU 79: Ia tagofia oloa e auina ese atu i le faia o pepa tusia.

Faamaonia.

FUAIUPU 80: Oloa mo le auina ese atu e le tatau ona faatulaueleeleina.

Faamaonia.

FUAIUPU 81: Taimi e auina atu ai i fafo.

Faamaonia.

FUAIUPU 82: E mafai ona faaaoga le Faamaufaailoga a le Tiute i oloa mo le auina ese atu.

Faamaonia.

FUAIUPU 83: Faasilasilaga tau lapataiga mo pusa o faaaogaina ai le faamaufaailoga.

Faamaonia.

FUAIUPU 84: E mafai e le Pule Sili o le Tiute ona faamaonia le fuafuaga mo oloa auina ese atu ia malupuipua.

Faamaonia.

FUAIUPU 85: Faamoemoe o le Fuafuaga mo oloa auina ese atu ia malupuipua.

Faamaonia.

FUAIUPU 86: E ao ona faamaoti mataupu i totonu o le fuafuaga mo oloa auina ese atu ia malupuipua.

Faamaonia.

FUAIUPU 87: Mataupu e ao ona faailoaina i fuafuaga mo oloa auina ese atu ia malupuipuia.

Faamaonia.

FUAIUPU 88: O oloa o le a auina ese atu i lalo o le fuafuaga faamaonia a le Tiute mo oloa e auina ese atu ia malupuipuia, e mafai ona auina ese atu i lalo o se tulaga toe faafoi.

Faamaonia.

FUAIUPU 89: O le faaaogaina o le faamaufaailoga a le Tiute e faasino i oloa o le a auina ese atu i lalo o le fuafuaga faamaonia a le Tiute mo oloa e auina ese atu ia malupuipuia.

Faamaonia.

FUAIUPU 90: E mafai ona aafia tagata e auina ese atu oloa, i le auina ese atu o oloa i fafo atu o le fuafuaga faamaonia a le Tiute mo oloa auina ese atu ia malupuipuia.

Faamaonia.

FUAIUPU 91: Oloa faaulufale mai e faasaina.

Faamaonia.

FUAIUPU 92: Oloa auina ese atu e faasaina.

Afioga TOEOLESULUSULU CEDRIC POSE SALESA SCHUSTER :
Lau Afioga i le Fofoga Fetalai.....

FOFOGA FETALAI: O le a le Fuaiupu Toeolesulusulu?

Afioga TOEOLESULUSULU CEDRIC POSE SALESA SCHUSTER:
Lau Afioga i le Fofoga Fetalai o le Fuaiupu 92.

FOFOGA FETALAI: Saunoa le sui usufono.

Afioga TOEOLESULUSULU CEDRIC POSE SALESA SCHUSTER: Faafetai lava i lau Afioga i le Fofoga Fetalai mo le avanoa. Lau Afioga i le Fofoga Fetalai e fia fesili atu mo sina malamalama aemaise lava i le vaega lea i electronic publications. Po o le a se fuafuaga i le faatinoina ona e pei ona silafia o le electronic publications o lea e alu i luga i le internet, e mafai ona send i imeli. Po o le fuafuaga lea po o le a se fuafuaga a le Ofisa o le Tiute e taofia ai le aveeseina atu o electronic publication nei ma pe mafai foi ona fesootai ma nisi o vaega o le Communication Act, ae po o i ai foi se faiga e mafai ona taofia ai le tele o faasalalauga ma vaega o lo o faapea ona publicise i electronic publications lea e pei ona taua mai iinei faamolemole lau Afioga i le Fofoga Fetalai.

FOFOGA FETALAI: O lo o manino ma malamalama le tulaga i Tulafono e fesootai ma le Tulafono Tau Faaofi lenei. O lo o i ai pea le Tulafono o lo o malupuipua ai tulaga tau faasalalauga ma publication i le atunuu. O le Tulafono lenei o lo o fitoitonu i mataupu e le mafai ona hand carry e tagata agai i le malae vaalele e aofia ai mea faitino, a o tulaga tau faasalalauga ma isi mea uma o lo o malu puipua i lalo o le Tulafono o lo o aiaia ai tulaga tau faasalalauga i totonu o le atunuu.

Faamaonia le Fuaiupu 92.

FUAIUPU 93: Tuuina atu o se laisene po o se pemitā mo oloa.

Afioga TOEOLESULUSULU CEDRIC POSE SALESA SCHUSTER: Faaafetai mo le faamalalamamaga a lau Afioga i le Fofoga Fetalai, ae peitai e pei ona e taua atonu o le vaega lea mo tagata e aveeseina atu, ae peitai o le Tulafono lea e faatino mai o le export e mafai ona faaupuina foi lea o le aveeseina atu i le electronic imeli o le export. O lou malamalama lea i le Tulafono Tau Faaofi, a mafai ona e send ina, o lena ua export pe ua aveese atu ma Samoa.

FOFOGA FETALAI: Malie la se i faamalalamama atili atu e le Palemia le vaega lea na ou fai atu ai. Tulai mai lau Afioga i le Palemia.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le mafuaaga o lou tulai atu, ou te toe faasao atu lau faasalalauga lena na fai. O lena e sao, e sao foi ma le mea lena o le a tulai mai ai ma Palu, e lavea uma ai lava.

Afioga Hon PALUSALUE FAAPO II: Lau Afioga i le Fofoga Fetalai, na ona ou fesili lava i le Minisita aua o lea ua saunoa le Palemia, ou te le iloa i le tali a le Afioga i le Fofoga Fetalai, pe sao mea ia po o e malamalama ai?

FOFOGA FETALAI: Mo le silafia e lau Afioga i le Taitai o le Itu Agai ma sui usufono mamalu, so o se Tulafono e taunuu mai loa i ou lima, I study it. E le faapea a aumai ona ou nofonofa lea ma na ona tolaulau atu. E sili atu

lou tilotilo i Tulafono i lo outou. O le ava lava lea e avatu ai le avanoa i o, ae ana ou talia outou, ua leva ona uma le Tulafono Tau Faaofi lea, a o le ava tele atu ne i taotaomia outou avanoa e lua lea e fai atu. It is very simple. O le a tau atagia ai lo outou le aoao ma lo outou le study i le Tulafono.

Faamaonia le Fuaiupu 93.

FUAIUPU 94: Ia faamaoti e le e faaulufale mai oloa le tau aoga a le Tiute i pepa tusia.

Faamaonia.

FUAIUPU 95: Teuteuga o le iloiloga o le fuafuaina o tau.

Faamaonia.

FUAIUPU 96: Tupe ma le faafesuaiga o tupe.

Faamaonia.

FUAIUPU 97: Aia tatau a le malo o le mauaina faamalosi.

Faamaonia.

FUAIUPU 98: Atunuu e faapogai mai ai oloa gaosi mai I'a po o isi oloa gaosi o le sami.

Faamaonia.

FUAIUPU 99: Poloaiga faa-Minisita mo le fuafuaina o atunuu o oloa gaosi po o atunuu o gaosia mai ai.

Faamaonia.

FUAIUPU 100: Aiaiga a o lumanai ai le faaulufale mai o oloa i le fua faatatau o le tiute e talafeagai.

Faamaonia.

FUAIUPU 101: Talosaga talafeagai e le o faamautuina.

Faamaonia.

FUAIUPU 102: O se aitalafu i le Malo tiute o oloa faaulufale mai.

Faamaonia.

FUAIUPU 103: Malosiaga o le Minisita e taofia le tumau, auina atu, toe faafoi po o le faia o tuusaunoaga mai tiute o oloa gaosi i le atunuu, ma isi tulaga faapena.

Faamaonia.

FUAIUPU 104: Tiute faaopoopo faaecina atu.

Faamaonia.

FUAIUPU 105: Iloiloga o tiute.

Faamaonia.

FUAIUPU 106: Teuteuga o iloiloga.

Faamaonia.

FUAIUPU 107: Aso ua tatau ona totogiina ai le tiute.

Faamaonia.

FUAIUPU 108: Iloiloga ua avea e faapea ua sao.

Faamaonia.

FUAIUPU 109: Noataga ina ia totogi tiute e le o taofia le tumau e ala i se talosaga tetee.

Faamaonia.

FUAIUPU 110: Faatapulaaina o le taimi mo teuteuga o se iloiloga.

Faamaonia.

FUAIUPU 111: Tausiga o Faamaumauga faapisinisi.

Faamaonia.

FUAIUPU 112: Tuuina atu i le Tiute o avanoa i faamaumauga faapisinisi.

Faamaonia.

FUAIUPU 113: Uiga o le upu “e fesootai”.

Faamaonia.

FUAIUPU 114: O le tiute o se tau faaee atu i luga o oloa.

Faamaonia.

FUAIUPU 115: Faaaogaina o le fuaiupu 116.

Faamaonia.

FUAIUPU 116: Faatulagaga o tiute.

Faamaonia.

FUAIUPU 117: Faamatuu atu o oloa o noatia i tiute.

Faamaonia.

FUAIUPU 118: Noataga mo tiute o oloa na sese ona aveeseina po o ua le maua.

Faamaonia.

FUAIUPU 119: Noataga o e ona se vaalele mo tiute o oloa na faatulaueleele i se ala faasolitulafono.

Faamaonia.

FUAIUPU 120: Aafiaga o le totogiina o le tiute e se tagata e toatasi i noataga a isi tagata.

Faamaonia.

FUAIUPU 121: O se mea ua tulai mai i tiute ua suia.

Faamaonia.

FUAIUPU 122: Iloiloga o tiute i ni mataupu faapitoa.

Faamaonia.

FUAIUPU 123: Toe faaulufale mai o oloa na auina ese atu.

Faamaonia.

FUAIUPU 124: Totogiina o tiute e le tagata o faaulufaleina mai oloa, le o auina ese atu oloa, po o se tagata e fai le laisene ua tuua Samoa.

Faamaonia.

FUAIUPU 125: E mafai e le Pule Sili o le Tiute ona toe faafoi atu le tiute na sese ona totogi.

Faamaonia.

FUAIUPU 126: Tupe toe faafoi o tiute o oloa o lo o i lalo o tulafono o le faasologa o tiute.

Faamaonia.

FUAIUPU 127: O isi tupe toe faafoi ma faamagaloga o tiute.

Faamaonia.

FUAIUPU 128: Malosiaga e faaoga ai tupe toe faafoi i le totogiina o isi tiute.

Faamaonia.

FUAIUPU 129: Toe faaolaina mai o tiute na sese ona toe faafoi atu.

Faamaonia.

FUAIUPU 130: Oloa o faaulufale mai i se tulaga le tumau.

Faamaonia.

FUAIUPU 131: Tupe toe faafoi o tiute o nisi oloa.

Faamaonia.

FUAIUPU 132: Talosaga mo faaiuga a le Tiute.

Faamaonia.

FUAIUPU 133: Faia o faaiuga a le Tiute.

Faamaonia.

FUAIUPU 134: Faasilasilaga o faaiuga a le Tiute.

Faamaonia.

FUAIUPU 135: O le aloaia o faaiuga a le Tiute.

Faamaonia.

FUAIUPU 136: Faamaoniga o le faiga na faavae ai faaiuga a le Tiute.

Faamaonia.

FUAIUPU 137: Teuteuga o faaiuga a le Tiute.

Faamaonia.

FUAIUPU 138: Faamutaina o faaiuga a le Tiute.

Faamaonia.

FUAIUPU 139: Talosaga tetee i faaiuga a le Pule Sili o le Tiute.

Faamaonia.

FUAIUPU 140: E leai se noataga pe afai o faatuatuaina se faaiuga a le Tiute.

Faamaonia.

FUAIUPU 141: Faaeeina atu o faasalaga.

Faamaonia.

FUAIUPU 142: Noataga ina ia totogi faasalaga e le o taofia le tumau e se talosaga.

Faamaonia.

FUAIUPU 143: E leai se faasalaga i nisi mataupu.

Faamaonia.

FUAIUPU 144: Faavaeina o ma avanoa i faiga e faagasolo ai pepa tusia faakomepiuta a le Tiute.

Faamaonia.

FUAIUPU 145: Tagata e faaaogaina ua faamauina.

Faamaonia.

FUAIUPU 146: Faailoga faapitoa e iloagofie ai le e faaaogaina.

Faamaonia.

FUAIUPU 147: Faaaogaina o faailoga faapitoa e ilagofie ai le o faaaogaina.

Faamaonia.

FUAIUPU 148: E mafai ona faaee atu aiaiga i tagata o faaaogaina ua faamauina.

Faamaonia.

FUAIUPU 149: Taofia le tumau po o le faaleaogaina o le faamauina o tagata e faaaogaina ua faamauina.

Faamaonia.

FUAIUPU 150: Ia tausia e le Tiute faamaumauga o le feaveaiina.

Faamaonia.

FUAIUPU 151: Leoleoga faasolo ma le mataituina.

Faamaonia.

FUAIUPU 152: Faatulaueleeleina po o le faatonutonuina o le vave tulaueleele o vaalele o le Tiute.

Faamaonia.

FUAIUPU 153: O le ulufale atu i luga o vaalele.

Faamaonia.

FUAIUPU 154: Sueina o vaalele.

Faamaonia.

FUAIUPU 155: Puipuigamalu o oloa i luga o vaalele.

Faamaonia.

FUAIUPU 156: Faapaina o fana i luga o vaa.

Tofa LEVAOPOLO TALATONU: Lau Afioga i le Fofoga Fetalai.....

FOFOGA FETALAI: O le a le Fuaiupu?

Tofa LEVAOPOLO TALATONU: O le Fuaiupu 156 lau Afioga. Lau Afioga i le Fofoga Fetalai, pei o lea e manino mai i i malosiaga o tagata o le Tiute. I le Fuaiupu 156 lau Afioga, o lo o faapea ua aiaia ai mo le tuliloaina o vaa e aofia ai le faapaina o se fana i luga o le vaa e avea o se taumafaiga mulimuli e tetee atu ai i le tausisia o faatonuga.

Lau Afioga, e faafesili atu lava i le Afioga i le Minisita po ua faatulafonoina le faaaogaina e le Ofisa o le Tiute o ni fana vaeatu le paia o le Maota e faaoga la i le Tulafono lea 156?

FOFOGA FETALAI: Se i tulai mai le sui usufono mo Faleata Sisifo. O le a le Fuaiupu lau Afioga?

Tofa LEALAILEPULE RIMONI AIAFI: O le Fuaiupu lava lea e tasi lau Afioga ona o lea e pei ona saunoa mai lau Afioga e pei lava o vaalele ia, ae pei lava o vaa-a-lalo ia o i ai le vaega lea. O le fesili la i lau Afioga i le Minisita, po o a ni galuega po o ni metotia foi o faia e le Matagaluega i le taimi lenei i le puipuaia foi o le tatou lotoifale, i le oo mai o vaa ia mai fafo ma taula i isi vaega o le atunuu e aunoa ma le uafu. Po o le a le galuega o lo o faatino i le taimi nei e puipuaia mai ai lea vaega. Ma le faaaloalo lava.

FOFOGA FETALAI: Malie le Minisita se i faatea uma atu finagalo o sui usufono ona tasi ai lea o le taimi e te tali ai. Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: O le Fuaiupu lava lea e 156, po o le a se faiga e galulue faatasi ai ma le Ofisa o Leoleo le vaega lea po o lavea i lalo o le Tulafono a le Malu o le Malo ma le isi vaega o le fesili, o lea e sau lava i le fuaiupu lea, e faailoa ai le fua folau po o le fua a le Ofisa o le Tiute. Ua fai se fua a le Ofisa o le Tiute, a o le a foi lea ituaiga fua, po o le a le ituaiga fua ina ia silafia ai e le atunuu ma tagata, aemaise foi o le Palemene nei po o le a le fua lea.

FOFOGA FETALAI: Se i tulai mai le Afioga i le Minisita mo Tupe Maua.

Tofa Hon TUILOMA LAMEKO: Lau Afioga i le Fofoga Fetalai, o le fesili muamua e uiga i le tulaga po o le a se faiga i le taimi nei o le a mafai ai ona puipuaia ni vaa aemaise ni vaa e omai sese i totonu o le tatou atunuu. O le tulaga lava ia o le Tulafono Tau Faaofi, o mea uma lava ia pei foi ona fesootai ma le Ofisa o Leoleo, o lena e i ai le Tulafono lea e faaoga faatasi ai lava i le tulaga lea. Na pau lava le mea ia logo le tulaga e tutusa ai, e i ai vaa sese ia ua oo mai i totonu. O lea e masani ona maua i gatai o Aleipata le

tele o vaa. O le mea lava la e fai, o le logo e i latou i le Ofisa o Leoleo ma leoleo ma faataunuu lo latou tiute.

O le isi lena. O le tulaga foi lena lau Afioga lea sa fesili mai i le tulaga o le faagaioiga o le vaega lea o le Tulafono Tau Faaofi. Ma le faaaloalo.

Tofa LEVAOPOLO TALATONU: Lau Afioga i le Fofoga Fetalai, malie lava lau Afioga leaga o lea e manino lava le tulaga o le Tulafono Tau Faaofi, e le o aofia ai le Ofisa o Leoleo. A o le popolega lea pei ona ou avatu, o le faaauepegaina o le Ofisa o le Tiute e leai se Tulafono e faaaogaina ai ma faaauepega ai le Ofisa o le Tiute. E manaia la pe a faapea, a oo i se tulaga faapea ona refer lea i le Ofisa o Leoleo o lea ua uma ona faatulafonoina le umia o auupega. Ae afai o ni fanaofe, ua lelei, ae afai o ni fana foi nei, ou te iloa e le talafeagai ma le tatou Tulafono Tau Faaofi.

FOFOGA FETALAI: Ia, taatia maia le fautuaga o lea foi e manino ma malamalama le folasaga a le Minisita, e leai ni vaa o le Tiute e o ai latou. When you comes to issue i le mea lea, e tulai le Ofisa o Leoleo e o faatasi ma le Ofisa o le Tiute.

Se i tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO (Sui Palemia): Lau Afioga i le Fofoga Fetalai, e pei o le mataupu lea o la e taua faapea o se vaa, o se vaa i totonu o le service a le Malo. O lona uiga e aofia ai ma le vaa a leoleo, ma se isi vaa, pe i ai foi nisi vaa e toe faaoga e le tatou Malo i le agai atu i le lumanai, e aofia uma lava i totonu o le Tulafono Tau Faaofi lea. O le Tulafono Tau Faaofi la lea e fau mo le lumanai ma le agai atu i luma.

FOFOGA FETALAI: Se i tulai mai le Minisita mo Leoleo, o lea e maitau atu o lea e tau faamanino le tulaga lea i le vaa lea.

Afioga Hon SALA FATA LISATI PINATI (Minisita mo Leoleo, Falepuipui ma Auaunga o Tinei Mu): Faafetai i lau Afioga. O tiute lava ia a le Malo e pei ona i ai le Matagaluega o le Tiute, o Faatoaga, o le Quarantine, o le matafaioi lava lea a leoleo o le puipui, ae galulue faatasi uma lava. O le galuega a i latou nei e felagolagomai.

O le tulaga foi i vaega faapea e faaauepegaina, e le mafai ona tupu sea mea pe a le o i ai le lagolagosua a le malu o le Malo. Ma lou faaaloalo lava.

FOFOGA FETALAI: Malo. Faafetai fesoasoani mai. Ou te manatu ua manino le...

Tofa LEALAILEPULE RIMONI AIAFI: Lau Afioga, leai o le popolega o lena Itu lea e taumafai atu ai, o lea e assume e le vaega lea le vaega lea o le Tulafono Tau Faaofi. O le Tulafono Tau Faaofi lea e aumai ai i i, o lea e sao lava le malosiaga i le pule, le Comptroller, le Pule o le Tiute e faatino ai gaoioiga ia. E le mafai ona tatou assume ina faapena le Tulafono Tau Faaofi pe a oo i vaega faapea. O lea la ua i le Tulafono Tau Faaofi e carry ai ma auupega faapa pe afai e moomia, ae le o faapea mai o leoleo e faia le tulaga lea. E le mafai ona tatou tuutalaloa faapena le Tulafono Tau Faaofi. Ma le faaaloalo lava.

FOFOGA FETALAI: Ia, se i toe tulai atu le Afioga i le Sui Palemia.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, o lea e manino lava le Fuaiupu, a o le puupuu foi ia o le Fuaiupu. O le Fuaiupu e talosaga le Pule Sili po o le Comptroller i le vaa, po o le a lava le vaa lea o lo o galue i totonu mo le Malo, e aofia ai ma le vaa leoleo o lo o tauavea le fua a le Tiute, ma le fua a le Malo o Samoa, e ave i ai le talosaga pe faapefea ona faatino le tulaga lea, ona o se vaa foi e pei ona saunoa le Afioga i le Minisita, o lea ua sau i totonu o le tatou ogasami le faatagaina, pe fai ni tulaga faasolitulafono, ae mumusu e agai mai i totonu i le tulaga lea ina ia mafai ona aumai i totonu o le tatou Tulafono Tau Faaofi.

Tofa LEVAOPOLO TALATONU: Lau Afioga i le Fofoga Fetalai faamolemole lava, o lea ou te fiu e vaai le upu talosaga i luga o le Tulafono Tau Faaofi e leai se upu talosaga o i ai.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, vaai i le Fuaiupu 156 lea e te talanoa ai, lena e fai mai, at the request of the Comptroller.

Tofa LEVAOPOLO TALATONU: Lau Afioga leaga o la e faa-Peretania mai o lea ou te tilotilo i le faa-Samoa. O le mea la lea lau Afioga i le Fofoga Fetalai, se o le mea lava lea e feteenai ai mataupu i tai i le Faamasinoga, o le le fetai o le faapapalagi ma le faa-Samoa.

FOFOGA FETALAI: O lea na alu lenei taeao o tatou taumafai pea e faapulapula le mataupu. A alu alu loa le tatou gagana ua tau fenumiai, tatou te toe refer lava i le mea o lo o tusia ai le Tulafono Tau Faaofi, o i ina o lo o i ai uma aiaiga tuusao ma upu tuu faafeagai e sagatonu lava lau o le fo i le mataupu ona manino lea. A o lea ua manino. Masalo – Lealailepule, e i ai se isi mea?

Tofa LEALAILEPULE RIMONI AIAFI: Ia aua leaga o lea o le a tatou tilotilo loa la i le faapapalagi lau Afioga, o le request lea e sau i i a le Comptroller, e request i le Commander a le vaa la e tuli, e le o request i se vaa a i inei, pe a tatou tilotilo la i le faapapalagi. Ae tuaia ia. O le mea lea e taumafai atu ai, ia taumafai ia faagatasi le o a le faa-Samoa ma le faapapalagi. A o le mea lea e fai atu ai...

FOFOGA FETALAI: Ia, se i tulai mai le Afioga a Lautafi.

Afioga Hon LAUTAFI FIO SELAFI PURCELL (Minisita mo Galuega tau Alamanuia ma Atinae a le Malo): Lau Afioga i le Fofoga Fetalai, e le iloa pe eseese le faa-Samoa ma le faapapalagi la e i le Vaega le la ma le faa-Samoa ma le faapapalagi lea e ia te au. O lea ou te tilotilo atu i le faapapalagi, at the request. O lea ou te tilotilo atu i le faa-Samoa, e tusa ai ma le talosaga a le Pule Sili o le Tiute. Fuaiupu 156, i totonu o Samoa, ona tuliloa lea o se vaa. O lena e i ai i totonu faamolemole. Faafetai.

FOFOGA FETALAI: Ia, e manatu ua malamalama. Tulai mai lau Afioga i le Palemia.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o lea e tulituliloa atu ona o lea lava e manino tali a Minisita ma sao. O se mea le lelei foi le toe tu atu e tau faasao ma tau faasao mea o lo o aumai ma aumai sese pea. A o le tulaga lava ia a uma loa le tali a le Minisita, ua uma ai loa i ina. Po o le a lava le mea e milomilo mai ai le Itu Agai, a o lea lava ua avatu le tali, o le tali lava lena.

Afioga Hon PALUSALUE FAAPO II: Lau Afioga i le Fofoga Fetalai, o se mea fia faamalamalama i le mea lea e saunoa i ai le Palemia. A saunoa mai lava la le Minisita e le sao, e alu ai lava? O lea e fai mai i i, o le faapaina o fana i luga o vaa....

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga o le tulaga sao lea ou te tulai atu ai, o lea ua faasao faafia atu e le Palemia ma Minisita o le Kapeneta le sese lea e tutulai mai ai outou. Ae a pe a outou tulai maia se i sao se mea, a o le tou tulai mai lava e sese, tulai mai sese, tulai mai sese, na o le umi ai ona fai o le tatou Fono. Ae se i toe faitau ane lelei tou mea ona outou toe tutulai mai ai lea.

FOFOGA FETALAI: Ia, ua manino ma malamalama le folasaga a le Malo. O le faaaogaina o auupega nei, ona o le faafitauli o lea e tupu mai pea. E le o iloa e tatou lea e nonofo i le laueleele le mea la e tupu i o. E tele vaafagota solitulafono lea e agai mai Falealupo, Aleipata ma nuu la. E taufono atu ae tafana mai. Ona a laia? Ona tatou tutu lea ma tilotilo i ai. O le mafuaaga lena na ave ai – o le vaa o le Malo le Nafanua, e i ai ma le Tiute i luga, there will be Custom employees i luga o vaa nei. O le faatulagaga la, o la e ua i ai le Tulafono mo le puipua pei ona saunoa le Minisita mo Leoleo, they got the full authority e fana ai le fana. O latou na e faatinoa, ae request la e le Pule Sili o le Matagaluega.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o Tulafono Tau Faaofi nei, o Tulafono ua uma ona soalaupule, ma e taua lava le itu lea o le galulue faatasi. Ae alolofa ia alii le tou Itu, e oo loa i taimi faapea o puapuaga, e tele lava le avanoa e tatau ai ona faaoga le faautautaga tatau. E le faapea la e pa mai le fana ae o la e i ai le vaa o tatou ae faapea, se i tatou o muamua lava i o se i sue po o le mea la e fai mai ai le Tulafono Tau Faaofi, e le faapena ona faia. E le pei o le mea foi lele e lui mai loa e le isi tamaitiiti le isi tamaitiiti faapea loa lea, se i ou alu la e tau muamua oe i lou tama ona ou toe sau ai lea. E le faapena ona faia galuega. E oo loa i le taimi e tutupu ai mea faapenei, o la e i ai le faautautaga tatau e faatino ai a tatou galuega, ma o lo o i ai foi ma le vafealoaloai e fesootai ai itu uma o le Malo.

Tofa LEVAOPOLO TALATONU: Lau Afioga i le Fofoga Fetalai, se faamolemole lava, o le taua ia o le vaega lea o le Tulafono Tau Faaofi. A

silasila lau Afioga i le faapapalagi o le Fuaiupu 156 lea ou te fai atu ai, e leai ma se upu request o i ai. O lea o le a ou faitauina atu: Provides for chasing of ships including firing upon the ship as a last....

FOFOGA FETALAI: Faitau mai le pito i luga Levaopolo.... Faitau mai le pito i luga o le Tulafono Tau Faaofi ona e maua lea, that's to be requested by the CEO of Customs first.

Faamaonia le Fuaiupu 156.

FUAIUPU 157: Taofia o se vaa.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, na o lau fesili lava, e puupuu lava lau fesili, ona o le vaega lea o le Tulafono Tau Faaofi, o le vaega fou lea o le Tulafono Tau Faaofi, tasi lea vaega lea ua tuu i totonu o le Tulafono tuai, e i ai la vaega ia. Ou te faafesili atu la...

FOFOGA FETALAI: O le a le Fuaiupu?

Tofa AVEAU TUALA LEPALE NIKO PALAMO: O le Fuaiupu lea 157, pe aafia ai la i le vaega lea vaa lea e aumaia refugees, i te i ua oo mai iinei i Samoa. Pe aafia ai la i i le vaega lea o le Fuaiupu 157b(2), po o le vaega lena pe ono aafia ai i le vaega lea. Ma le faaaloalo lava.

FOFOGA FETALAI: E leai se refugee e feoi i ni vaalele, o refugees e omai i vaa a lalo, a o le taofia o vaalele lea e sau i le Tulafono Tau Faaofi.

Faamaonia le Fuaiupu 157.

FUAIUPU 158: Sueina o taavale.

Faamaonia.

FUAIUPU 159: Fesiligia o tagata e uiga i oloa ma aitalafu.

Faamaonia.

FUAIUPU 160: Fesiligia o tagata e uiga i tulaga e iloagofie ai tuatusi, ma isi faapena.

Faamaonia.

FUAIUPU 161: Fesiligia o tagata faigaluega o kamupani vaalele, kamupani vaa ma isi.

Faamaonia.

FUAIUPU 162: Faamatalaga molimau o faailoga e iloagofie ai ma faamanuiaga.

Faamaonia.

FUAIUPU 163: Faamatalaga molimau o tali i fesili i lalo o le fuaiupu 160.

Faamaonia.

FUAIUPU 164: Taofiga o tagata sa fesiligia e uiga i oloa po o aitalafu.

Faamaonia.

FUAIUPU 165: Taofia o tagata sa fesiligia i lalo o le fuaiupu 160.

Faamaonia.

FUAIUPU 166: Taofia o tagata ua faia po o o le a faia o nisi soligatulafono.

Faamaonia.

FUAIUPU 167: Taofiga mo faamoemoega tau le soifua maloloina lautele po o le faamamaluina o tulafono.

Faamaonia.

FUAIUPU 168: Tagata e faaaogā i ai fuaiupu 169, 170(1), ma le 171.

Faamaonia.

FUAIUPU 169: Uluai sueina o tagata e ala i le faaaogāina o tulaga tau fesoasoani.

Tofa LEVAOPOLO TALATONU: Lau Afioga i le Fofoga Fetalai.....

FOFOGA FETALAI: O le a le fuaiupu?

Tofa LEVAOPOLO TALATONU: O le 169 lau Afioga.

FOFOGA FETALAI: O lea tatou te le i oo i le 169.

Tofa LEVAOPOLO TALATONU: O le 169.

FOFOGA FETALAI: O le 168 lea ou te alu atu ai.

Tofa LEVAOPOLO TALATONU: Na e 169 loa ou tulai lau Afioga.

FOFOGA FETALAI: Leai, o lea e le i faa.....ia tulai mai loa.

Tofa LEVAOPOLO TALATONU: Lau Afioga i le Fofoga Fetalai faafetai mo le avanoa. O lea la ua manino lelei mai i le fuaiupu lea o le Tulafono le faatinoina e le Ofisa o le Tiute po o le Ofisa o Leoleo o suesuega, a, o le ituaiga mea la lea sa tatau ona aumai i le 156 lea sa matou fai atu ai, Ofisa o le Tiute po o le Ofisa o Leoleo, o lea la ua manino mai i i le vaega lea, faafetai.

FOFOGA FETALAI: A na se i outou onosai laitiiti lava e faasolo pea taualumaga o le Tulafono, leaga e le avatua uma vaega o le Tulafono i vaega muamua, o lea lava e faasolosolo e oo atu i le faaiuga, ia ua matua atoatoa ma manino.

Faamaonia le Fuaiupu 169.

FUAIUPU 170: Sueina o tagata pe afai ua i ai mafuaaga talafeagai e masalomia ai meataitasi o natia.

Faamaonia.

FUAIUPU 171: Sueina o tagata mo meataitasi matautia.

Faamaonia.

FUAIUPU 172: Faoa faamalosi o meataitasi ua maua.

Faamaonia.

FUAIUPU 173: Avanoa o tagata ofisa o le Tiute i nofoaga e pulea e le Tiute.

Faamaonia.

FUAIUPU 174: Suesueina o oloa e noatia i lalo o le vaavaaiga a le Tiute.

Faamaonia.

FUAIUPU 175: Suesueina o oloa e le o toe noatia i lalo o le pule a le Tiute.

Faamaonia.

FUAIUPU 176: Tuuina atu o se faamalamalamaga o oloa.

Faamaonia.

FUAIUPU 177: Tuuina atu o oloa.

Faamaonia.

FUAIUPU 178: Faamaoniga o pepa tusia.

Faamaonia.

FUAIUPU 179: Faamalumaluga mo le totogiina o tiute.

Faamaonia.

FUAIUPU 180: E ono manaomia ni faamalumaluga fou.

Faamaonia.

FUAIUPU 181: Pule faataga tusitusia a sooupu.

Faamaonia.

FUAIUPU 182: Suega faasuetusi po o le suesueina o faamaumauga.

Faamaonia.

FUAIUPU 183: Manaoga ina ia tuuina mai pepa aloaia.

Faamaonia.

FUAIUPU 184: O nisi malosiaga e faasino i pepa aloaia.

Faamaonia.

FUAIUPU 185: Tulaga aloaia o le galuega faaloia.

Faamaonia.

FUAIUPU 186: Pepa aloaia i gagana a atunuu ese.

Faamaonia.

FUAIUPU 187: E mafai e le Pule Sili o le Tiute ona umia o ma taofia pepa po o faamaumauga.

Faamaonia.

FUAIUPU 188: Faiga o ata o pepa aloaia na mauaina i suesuega faagasolo.

Faamaonia.

FUAIUPU 189: Taofia o pepa aloaia ma oloa.

Faamaonia.

FUAIUPU 190: Taofia o oloa ua masalomia o meatotino ua afaina.

Faamaonia.

FUAIUPU 191: Toe faafoiina o tinoitupe e talafeagai ina ia faamalieina ai manaoga taua faale-tagata.

Faamaonia.

FUAIUPU 192: O nisi aiaiga e uiga i le taofia i lalo o le fuaiupu 190.

Faamaonia.

FUAIUPU 193: Toe faafoiina o oloa na taofia i lalo o le fuaiupu 190.

Faamaonia.

FUAIUPU 194: Faaopoopoina o le vaitaimi e 7 aso i totonu o le fuaiupu 193(1)(a).

Faamaonia.

FUAIUPU 195: Puipuigamalu o nisi oloa ua taofia i lalo o le fuaiupu 190.

Faamaonia.

FUAIUPU 196: Tusi poloaiga e sueina ai.

Faamaonia.

FUAIUPU 197: Ulufale ma sueina i lalo o se tusi poloaiga.

Faamaonia.

FUAIUPU 198: Sueina o tagata mo meataitasi matautia a o faatino le tusi poloaiga e sueina ai.

Faamaonia.

FUAIUPU 199: Taofia o meataitasi matautia.

Faamaonia.

FUAIUPU 200: Ia tuuina atu tusi poloaiga e sueina ai.

Faamaonia.

FUAIUPU 201: O le tiute tauave le faailoa i lē e ona pe afai ua faoa faamalosi ni mea.

Faamaonia.

FUAIUPU 202: Tusi poloaiga i taimi o faalavelave tutupu faafuasei.

Faamaonia.

FUAIUPU 203: Faaaogāina o fesoasoani e tagata ofisa o le Tiute.

Faamaonia.

FUAIUPU 204: Aiaiga e faaaogā i le ulufale atu i fale.

Faamaonia.

FUAIUPU 205: Pueina faapagota o tagata solitulafono ua masalomia.

Faamaonia.

FUAIUPU 206: Puipuiga o tagata o galulue i lalo o le pule faataga.

Tofa AVEAU TUALA LEPALE NIKO PALAMO: Lau Afioga i le Fofoga Fetalai.....

FOFOGA FETALAI: O le a le fuaiupu?

Tofa AVEAU TUALA LEPALE NIKO PALAMO: O le fuaiupu lea e 206 faamolemole.

FOFOGA FETALAI: Fuaiupu 206: Puipuiga o tagata o galulue i lalo o le pule faataga. Saunoa le sui usufono.

Tofa AVEAU TUALA LEPALE NIKO PALAMO: Ia e faafesili i le fuaiupu lea aua o lea e fai mai le fuaiupu lea, e le noatia, e le noatia le Minisita po o se isi e faigaluega, pe afai lea e leiloa lau taavale i o i le Tiute pe leaga se mea o fai pei ona faatino mai i, a, a o lea e sau foi i i i le fuaiupu, pe afai o se mea ua faia po o ua le faia. Lona uiga, o le vaega lea e faasinotonu lava i le tagata lea na faatinoina o le Tiute, a o lea e afaina ai le tagata lea e ona le meatotino lea. E fesili atu lava i le Afioga i le Minisita, pe i ai la se vaega i totonu i i e puipuia ai le oloa lea a le tagata lea ua leaga po o ua leiloa ona o le mafuaaga faa-Tiute? Ma le faaaloalo lava.

FOFOGA FETALAI: Se i tulai mai le sui usufono mamalu. O le a le fuaiupu?

Tofa LEALAILEPULE RIMONI AIAFI: Lau Afioga i le Fofoga Fetalai, o le vaega lava lea lau Afioga.....

FOFOGA FETALAI: O le 206?

Tofa LEALAILEPULE RIMONI AIAFI: O le 204 e tau i le 206 faamolemole. O le mea lea o le entry, le mea lea o le ulufale atu i totonu o nofoaga ia ua masalomia o i ai ni oloa foi ia ma ni soligatulafono, aua o le mea lea e i ai pei e moomia se warrant mai le Minisita, ia ae talafeagai foi la le mea lea ua i ai, pau o le mea o le puipuiga o tagata nei faigaluega mai le afaina i a latou galuega ia e fai aua o lea foi ua i ai ma le paoa, masalo o lea sa i ai lava muamua ae sa galulue ma leoleo le power for arrest, foi lele e lokaina mai ai ni tagata foi lea ma molia tagata faasolitulafono. O le popolega la lea e i ai, i le malupuipua o tagata faigaluega aemaise foi o tagata o lo o ona mea mai le ono oo i se tulaga foi lea e ono lamatia ai le soifua. Aua i lou talitonuga, e le o malamalama le tele o le atunuu i

malosiaga ia e i ai i le Ofisa o le Tiute e mafai ai ona latou arrest ina molia ma lokaina mai tagata nei, o le manatu lava o le tagata Samoa ia, pau le tagata e i ai le malosiaga lea na o le Ofisa o Leoleo. O mea la ia e tataua ona toe tagai i ai, aua e le o malamalama tagata uma i functions i malosiaga ia ua i le Matagaluega o le Tiute e faataunuu ai le latou galuega, o lea lava ua oo i galuega faa-Leoleo mai le mea lea sa i ai o latou faatinoa? O le mea la lea e fesili atu ai ma le faaloalo lava.

FOFOGA FETALAI: Ia e manatu o lo o malamalama le taumafai mai o lenei Tulafono taua e sui usufono mamalu o le tatou Palemene, ua outou iloa o le most secure and security o se oloa po o le mea e tulai mai i le atunuu, e le muamua fetoi ma leoleo, e muamua fetoi i le Boarder ma le Ofisa o le Tiute, aua ou te talitonu o upu tuusao lava ia o lo o tele ma anoanoai faafitauli e tulai mai e o atu ai le Tiute e confiscate oloa ua masalomia, o lea sa tatou pasia mai i isi o aiaiga ia ua tulai atu i taimi ua sola.

O le mea la lea e agatonu le 204, 205 ma le 206 i le taimi e agai i ai le Tiute e agai ai ua i ai se fale ua masalomia i ni oloa e agai mai i totonu o le faaulufaleina ma lamatia ai lo latou soifua. Ia e manatu la e le o se mea e leaga le mea lea o le ave o se malosiaga ina ia mafai ona faia le galuega a le Tiute, aua o isi taimi e o atu tagata ua tutu mai tagata ma mea e faaletonu. O le puipuiga o le 206, o puipuiga o tagata o galulue i lalo o le pule faataga. O lona uiga e matua i ai se malosiaga e mafai ai ona puipua ia latou ua uma ona ave i ai le faatagaga a le Minisita ma le Matagaluega. E fesootai uma le 203, 204, 205 ma le 206.

Tofa LEALAI PULE RIMONI AIAFI: Lau Afioga i le Fofoga Fetalai, leai e le o fia faaali atu foi se fia atamai i lau tali mai i lau Afioga, i lou taumafai e faamalamalama mai le tatou Tulafono, ia ae pei e le ogatusa lau faamalamalama ma le tatou Tulafono, i lou lea talitonuga, faafetai.

FOFOGA FETALAI: Oi, oi, oi, ia oe lava ia lena e te le malamalama, ia a o lea e.....

Susuga Hon TUILA EPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e i ai le mea lea e misi i le malamalamaaga o sui usufono. E manatua foi o officials nei e fai a latou togiga, e fai foi o latou pulou a tilotilo i ai e pei lava o ni leoleo. O lona uiga la, a o atu lava e arrest, ia o le tulaga lava lena. E laei i laei e aloaia ai le latou galuega fai, e oo foi la i le taimi lenei sa faigata foi ona outou talia ia le tulaga o isi foi leoleo la e i lalo o le LTA, ia ae fai fai lava masani, e faapena le mea, e fai fai lava masani. O lena e sao lelei lau faamalamalamaaga.

FOFOGA FETALAI: E oo lava i le suega o onana e maua i i.

Faamaonia le Fuaiupu 206.

FUAIUPU 207: Faoa faamalosi ma le taofiga o oloa matautia.

Faamaonia.

FOFOGA FETALAI: Ia o le mea la lea.

FUAIUPU 208: Pepa malaga faasolitulafono.

Faamaonia.

FUAIUPU 209: Faoa faamalosi ma le taofia o oloa ua masalomia e i ai nisi tulaga lamatia po o ua molimauina le faia ai o nisi soligatulafono.

Faamaonia.

FUAIUPU 210: Tau faamatau po o le tetee atu i tagata ofisa o le Tiute.

Faamaonia.

FUAIUPU 211: Faalavelaveina o tagata ofisa o le Tiute po o le aiaina o meatotino a le Tiute.

Faamaonia.

FUAIUPU 212: Tuuaiga po o lipoti sese i tagata ofisa o le Tiute.

Faamaonia.

FUAIUPU 213: Faafoliga i se tagata ofisa o le Tiute.

Faamaonia.

FUAIUPU 214: Faamaufaailoga po o faailoga ua gaosia ma faafoliga pepelo.

Faamaonia.

FUAIUPU 215: Noataga o tagata e taunuu mai i Samoa.

Faamaonia.

FUAIUPU 216: O le auai e le i faatagaina i nisi nofoaga e pulea e le Tiute.

Faamaonia.

FUAIUPU 217: Avanoa e le i faatagaina i po o le faaaogāina ma le faaletatau o le faiga faakomepiuta e faagasolo ai pepa tusia a le Tiute.

Faamaonia.

FUAIUPU 218: O le aiaina o le faiga faakomepiuta e faagasolo ai pepa tusia a le Tiute.

Faamaonia.

FUAIUPU 219: Soligatulafono e faasino i le puipuigamalu o, po o le faaaogāina e le i faatagaina o, faailoga e iloagofie ai tagata faapitoa e faaaogāina.

Faamaonia.

FUAIUPU 220: O le le mafai ona tali atu i fesili.

Faamaonia.

FUAIUPU 221: O le le mafai ona tuuina atu o faamatalaga molimau o faailoga e iloagofie ai, faamanuiaga i malaga, po o isi mataupu.

Faamaonia.

FUAIUPU 222: O le le mafai ona tuuina atu po o le faamalamalamaina o oloa.

Faamaonia.

FUAIUPU 223: O le le mafai ona tausisia o manaoga.

Faamaonia.

FUAIUPU 224: O le le mafai, po o le teena o le i ai pea i se nofoaga.

Faamaonia.

FUAIUPU 225: Faaaogaina o le nofoaga e aunoa ma se laisene.

Faamaonia.

FUAIUPU 226: O le le mafai ona tausisia aiaiga o se laisene.

Faamaonia.

FUAIUPU 227: Soligatulafono e faasino i le taunuu mai o vaalele.

Faamaonia.

FUAIUPU 228: Soligatulafono e faasino i lipoti e auina mai i totonu.

Faamaonia.

FUAIUPU 229: Soligatulafono e faasino i le malaga ese atu o vaalele.

Faamaonia.

FUAIUPU 230: Soligatulafono e faasino i lipoti e auina atu i fafo.

Faamaonia.

FUAIUPU 231: O le le mafai ona tausisia o manaoga e taofia ai le faaaogaina o masini tau fesootaiga faaeletoroni.

FOFOGA FETALAI: Tulai mai le sui usufono mamalu mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, e fia faafesili atu lava i le vaega lea i faasalaga, o lea e sau o le 100 penalty unit. A faatusa i ai po o le silia ma le afe i le tausaga e tasi. Po o le a le faatusatusaga o i ai penalty unit ia ma le tausaga pei e tele penalty unit ae laitiiti tausaga ma taimi o faasalaga ia faamolemole.

FOFOGA FETALAI: Ia, se i tulai mai le Minisita mo Tupe Maua. Se i toe tulai mai le sui usufono e toe faapulapula le mataupu. O le faasalaga o le 100 iunite e faatusatusa i le tupe.

Tofa Hon TUILOMA LAMEKO: Aua o le tasi le iunite e tusa lena ma le \$100. A o lena la o lo o aumai i totonu o le vaega o le Tulafono Tau Faaofi le tupe e tatau ona totogi e tutusa ma le vaega lea.

FOFOGA FETALAI: E manatu e le i faigofie le sailiiliga a le Matagaluega, ou te iloa foi e le o se mea faafuagalu le taumafai mai, ua tuu tonu le talafeagai o le iunite ma le faasalaga e tatau ona i ai.

Faamaonia le Fuaiupu 231.

FUAIUPU 232: Tetee atu i moliaga.

Faamaonia.

FUAIUPU 233: Fetuunaiga o vaalele mo oloa e aumai pe aveeseina faanana.

Afioga TOEOLESULUSULU CEDRIC POSE SALESA SCHUSTER:
Lau Afioga i le Fofoga Fetalai....

FOFOGA FETALAI: O le a le Fuaiupu?

Afioga TOEOLESULUSULU CEDRIC POSE SALESA SCHUSTER:
O le Fuaiupu 233. E pei o le vaega lea na avatu ai se faafesili i le Fuaiupu 231. O lea e 100 iunite po o le tausaga i le Fuaiupu 233, e 1000 iunite po o le 5 tausaga. Pei e le talafeauga le faatulagaina o faasalaga, aemaise lava i iunite ma taimi i le toese. Faafetai.

FOFOGA FETALAI: Tulai mai lau Afioga i le Minisita.

Tofa Hon TUILOMA LAMEKO: O lea lava e fua i le tulaga talafeagai, aemaise o le talafeagai ma le faasalaga. E le faapea la o le a taumafai e aumai le isi taimi i lenei taimi, e fua lava le faasalaga ia e sau i i le ituaiga tulaga o le mamafa e fai ai.

Faamaonia le Fuaiupu 233.

FUAIUPU 234: Aiaiga o faamaufaailoga ma fusi e faamauina ai.

Faamaonia.

FUAIUPU 235: Soligatulafono e faasino i faamaufaailoga a le Tiute ma fuafuaga faamaonia a le Tiute mo le malupuipua o oloa auina ese atu.

Faamaonia.

FUAIUPU 236: Aiaina o uta.

Faamaonia.

FUAIUPU 237: Laueseina o oloa e aunoa ma se faatagaga.

Faamaonia.

FUAIUPU 238: Soligatulafono e faasino i le gaosia, feaveaia ma le teuina o oloa.

Faamaonia.

FUAIUPU 239: Aiaina o oloa.

Faamaonia.

FUAIUPU 240: Soliga o faatonuga a le Pule Sili o le Tiute i lalo o le fuaiupu 114.

Faamaonia.

FUAIUPU 241: Soligatulafono e faasino i pepa tusia.

Faamaonia.

FUAIUPU 242: Soligatulafono e faasino i pepa tusia.

Faamaonia.

FUAIUPU 243: Soligatulafono e faasino i faamaumauga.

Faamaonia.

FUAIUPU 244: Soligatulafono e faasino i le mafai ona tuuina atu i le Tiute o avanoa i faamatalaga.

Faamaonia.

FUAIUPU 245: Soligatulafono e faasino i le faailoaina atu e tusa lava pe manaomia le tuuina atu i le Tiute o avanoa i faamatalaga.

Faamaonia.

FUAIUPU 246: Umia o pepa faamaonia e le o maea.

Faamaonia.

FUAIUPU 247: Soligatulafono e faasino i le faaaogaina o oloa.

Faamaonia.

FUAIUPU 248: Aiaiga e faasino i soligatulafono e faasaga i fuaiupu 241 e oo i le 247.

Faamaonia.

FUAIUPU 249: Soligatulafono e faasino i le faaulufale mai po o le auina ese atu o oloa faasaina.

Faamaonia.

FUAIUPU 250: Soligatulafono e faasaga i le auina ese atu o oloa.

Faamaonia.

FUAIUPU 251: Faiga tau faasese ia le maua ai tupe maua a le Tiute.

Faamaonia.

FUAIUPU 252: Umia po o le pui-puigamalu o oloa e le i tiuteina po o oloa faaulufale mai e faasaina.

Faamaonia.

FUAIUPU 253: Faatau mai, faatau atu, faafesuiai ma isi tulaga faapena, o oloa e le i tiuteina po o oloa faaulufale mai e faasaina.

Faamaonia.

FUAIUPU 254: Umia po o le vaavaaiga o oloa ua natia.

Faamaonia.

FUAIUPU 255: Soligatulafono e faasino i oloa ua faoa faamalosia.

Faamaonia.

FUAIUPU 256: Soligatulafono e faasino i nisi oloa ua taofia.

Faamaonia.

FUAIUPU 257: Soligatulafono e faasino i le Pulega o Talosaga a le Tiute.

Faamaonia.

FUAIUPU 258: Faailoaina atu o faamatalaga e le i faatagaina.

Faamaonia.

FUAIUPU 259: Amioga le pulea a tagata ofisa o le Tiute.

Susuga PAPALII LIO FAAVAIVAIOMANU TAEU MASIPAU: Lau Afioga i le Fofoga Fetalai....

FOFOGA FETALAI: Ia, se i tulai mai le sui usufono mamalu. O le a le Fuaiupu?

Susuga PAPALII LIO FAAVAIVAIOMANU TAEU MASIPAU: O le Fuaiupu lea e 259 lau Afioga.

FOFOGA FETALAI: Tulai mai le sui usufono mamalu.

Susuga PAPALII LIO FAAVAIVAIOMANU TAEU MASIPAU: E pei foi ona lavea foi i se lauga a lenei sui usufono i le aso ananafi, e pei o le faaupuga lava o le vaega tonu lea o amioga le pulea a tagata Ofisa o le Tiute. O amioga lea e taua mai i i, o faamanuiaga, tau tau tupe po o se tau. Ae sau le faaupuga mulimuli lea, ae vagana ai mo ni tulaga e pei ona taua, ua taulimaina e ni tagata ofisa ua faapea ona i ai le faatagaga a le Minisita po o le Pule Sili o le Tiute. E pei la o lea e tau vaavaai i le itu lea, po o le a tonu lava le agaga, po o le mea i le taimi ua tuanai pe sa i ai se faatagaga o ni mea faapea, po o le mea – a faapea foi e i ai, o lea ua i ai le faatagaga, pe faalisiti ma mea faapena, pe a i ai ni tau faapea. E pei o le agaga tonu lava lea o lau faafesili i le vaega tonu lava lea.

Faamaonia le Fuaiupu 259.

FOFOGA FETALAI: Tulai mai lau Afioga i le sui usufono mo Faleata Sisifo.

Tofa LEALAILEPULE RIMONI AIAFI: O le Fuaiupu 268 faamolemole lava lau Afioga.

FOFOGA FETALAI: Ua e manao tatou te o i le Fuaiupu 268?

FUAIUPU 260: Noataga o tagata ofisa o faalapotopotoga.

Faamaonia.

FUAIUPU 261: Noataga o le tagata ofisa autu ma sooupu.

Faamaonia.

FUAIUPU 262: Taumafaiga.

Faamaonia.

FUAIUPU 263: Faatoai atu o tagi.

Faamaonia.

FUAIUPU 264: E mafai e le Faamasinoga ona poloaiina le totogiina o tupe e tusa ai ma tiute.

Faamaonia.

FUAIUPU 265: Malosiaga o le Pule Sili o le Tiute e tuufaatasia ai soligatulafono.

Faamaonia.

FUAIUPU 266: Faaaogaina.

Faamaonia.

FUAIUPU 267: Oloa ua taofia e le toe faafoia.

Faamaonia.

FUAIUPU 268: Taulumaga mo le faoa faamalosi.

Tofa LEALAI PULE RIMONI AIAFI: Ia, lau Afioga, o le Fuaiupu lea e 268 faamolemole, e fia maua se faamalamalamaga i le vaega lea e 3, o oloa foi nei faasaina ma oloa e masalomia, o faapea mai, e mafai ona aoina mai i totonu o le lua tausaga. O le mea la lea e fesili ai, o le a le mea ua umi ai lea lua tausaga, pe afai loa ua masalomia po o tulaga faapena ona vave aveese mai lea, aua na o vaega foi nei faasaina lea e faapea e mafai ona ao mai i le taimi e declare mai, a o le isi vaega, e lua tausaga e tuu i ai. O le fesili lea pe aisea.

Ona oo mai lea i le Vaega 7, a faapea la e i ai ni oloa foi nei po o meaola, vaeane, o manu, po o taavale, po o se vaa, e mafai la i lalo o le pule a le Tiute ona tuu ai pea mea nei e vaai e latou e ona mea, a? Sa ou faapea afai loa ua cease mea uma nei, ia matuai fai lava se mea tele e aumai uma mea nei e tuu ai, aemaise la mea nei o taavale ma mea faapea e faitino tetele, aua o lea e faapea mai, e mafai lava ona tuu ai pea i tagata e ona mea nei e vaavaai se i oo i le taimi e ave ai i le Tulafono po o le a se mea e fai ai. O le mea la lena o lea e fia fesili ai. Ma le faaaloalo lava.

FOFOGA FETALAI: Ia, se i tulai mai le Afioga i le Minisita mo Tupe Maua.

Tofa Hon TUILOMA LAMEKO: Faafetai atu. O le faafesili mai, aemaise o le vaai lea i le tulaga lea e faafesili mai ai po o le a le mea ua tuai

ai ona totoġi aemaise penalties nei e i ai. Lau Afioga, o le tulaga e i ai, e leai se mea o lo o taofia ai le tulaga talafeagai e faia e le Matagaluega ina ia faasaoina ai le tulaga lea pei ona e saunoa i ai.

Faamaonia le Fuaiupu 268.

FUAIUPU 269: Faasilasilaga o le faoa faamalosī.

Faamaonia.

FUAIUPU 270: Ia toe tuu i tua le aso na taofia ai se mea e le toe faafoia.

Faamaonia.

FUAIUPU 271: Faaooina atu oloa ua faoa faamalosī ina ua totoġi mai se tupe e tutusa ma le tau aoga.

Faamaonia.

FUAIUPU 272: Faatauina atu o nisi oloa ua faoa faamalosī.

Faamaonia.

FUAIUPU 273: Auala e faatino ai le faatauina atu o oloa.

Faamaonia.

FUAIUPU 274: Talosaga ina ia toe iloilo oloa ua faoa faamalosī.

Faamaonia.

FUAIUPU 275: Toe iloiloga.

Faamaonia.

FUAIUPU 276: Faaiuga ua toe iloilo.

Faamaonia.

FUAIUPU 277: Mataupu e uiga i le tuuina atu o se faamama avega.

Faamaonia.

FUAIUPU 278: Faaiuga i mataupu ua tuuina atu ai faamama avega.

Faamaonia.

FUAIUPU 279: O le faatamaia o oloa ua faoa faamalosi.

Faamaonia.

FUAIUPU 280: Talosaga tetee i le Pulega o Talosaga a le Tiute.

Faamaonia.

FUAIUPU 281: Faatamaia o oloa ua noatia i talosaga tetee.

Faamaonia.

**FUAIUPU 282: Faatamaia o oloa ua faoa faamalosi i luga o se moliaga
ua faamaonia.**

Faamaonia.

FUAIUPU 283: Faaleaogaina o oloa ua taofia e le toe faafoia.

Faamaonia.

FUAIUPU 284: Faaaogaina o aiaiga o oloa ua taofia e le toe faafoia.

Faamaonia.

FUAIUPU 285: Faamatalaga molimau e faamaonia ai.

Faamaonia.

FUAIUPU 286: Pepa aloaia e faia i atunuu i fafo.

Faamaonia.

FUAIUPU 287: Taliaina i se tulaga lautele o faamatalaga fatu fua.

Faamaonia.

FUAIUPU 288: Taliaina o faamatalaga fatu fua o lo o i totonu o faamaumauga faapisinisi.

Faamaonia.

FUAIUPU 289: Faamatalaina o uiga o upu ma le faaaogaina.

Faamaonia.

FUAIUPU 290: Taliaina o faamatalaga molimau o manatu o tagata tomai faapitoa.

Faamaonia.

FUAIUPU 291: Faamaoniga o pepa faatumu ua faia i lalo o le fuaiupu 338.

Faamaonia.

FUAIUPU 292: E taliaina faamatalaga molimau o Faamaumauga a le Tiute o feaveai i masini faakomepiuta.

Faamaonia.

FUAIUPU 293: Manatu taulagi i le tulaga faamaonia o pepa aloaia.

Faamaonia.

FUAIUPU 294: Faavaeina.

Faamaonia.

FUAIUPU 295: Vaitaimi i le tofi, faamavaega, faamalolo le tumau ma le aveesea.

Faamaonia.

FUAIUPU 296: Tautoga o le tofi.

Faamaonia.

FUAIUPU 297: Totogi.

Faamaonia.

FUAIUPU 298: Gasegase po o le le atoatoa o le malosi o le tino.

Faamaonia.

FUAIUPU 299: E le noatia taitoatasi sui auai.

Faamaonia.

FUAIUPU 300: Resitara o le Pulega.

Faamaonia.

FUAIUPU 301: Faamaufaailoga.

Faamaonia.

FUAIUPU 302: Malosiaga o le Pulega.

Faamaonia.

FUAIUPU 303: Talosaga i le Faamasinoga Sili.

Faamaonia.

FUAIUPU 304: Talosaga i le Faamasinoga o Talosaga.

Faamaonia.

FUAIUPU 305: O le faailoaina o se mataupu mo le Faamasinoga Sili.

Faamaonia.

FUAIUPU 306: Faamatalaina o uiga o upu.

Faamaonia.

FUAIUPU 307: E mafai ona tuuina atu i le Pule Sili o le Tiute se faasilasilaga e talosagaina ai le taofia le tumau o le kiliaina o oloa e le Tiute.

Faamaonia.

FUAIUPU 308: Malosiaga e taofia le tumau ai taualumaga a le Tiute mo le kiliaina o oloa.

Faamaonia.

FUAIUPU 309: Puipuigamalu.

Faamaonia.

FUAIUPU 310: Faasilasilaga.

Faamaonia.

FUAIUPU 311: Asiasiga ma le suesueina o oloa.

Faamaonia.

FUAIUPU 312: Taofia ma le faamatuu atu o oloa.

Faamaonia.

FUAIUPU 313: Taofia o oloa e le toe faafoia e ala i se maliega.

Faamaonia.

FUAIUPU 314: Faatamaia o oloa.

Faamaonia.

FUAIUPU 315: E le aofia ai ni aofaiga laiti o oloa faaulufale mai.

Faamaonia.

FUAIUPU 316: Puipuiga o tagata galulue i lalo o lenei Vaega.

Faamaonia.

FUAIUPU 317: Tauai mo le taofia sese o oloa.

Faamaonia.

FUAIUPU 318: Tuuina atu po o le teena o laisene.

Faamaonia.

FUAIUPU 319: Faaleaogaina po o le taofia le tumau o laisene.

Faamaonia.

FUAIUPU 320: Sooupu ua faatagaina.

Faamaonia.

FUAIUPU 321: Tuuina atu o pule faataga.

Faamaonia.

FUAIUPU 322: Noataga o le e ona mo gaoioiga a se sooupu tomai faapitoa mo galuega tau le tiute.

Faamaonia.

FUAIUPU 323: O le galue faasolitulafono e avea o se sooupu tomai faapitoa mo galuega tau le tiute.

Faamaonia.

FUAIUPU 324: O tupe totogi atu e le Pule Sili o le Tiute mai tupe a le Malo.

Faamaonia.

FUAIUPU 325: Faaaogaina o Tulafono i mea e lafoina i le meli.

Faamaonia.

FUAIUPU 326: Tautinoga i lalo o lenei Tulafono.

Faamaonia.

FUAIUPU 327: Malosiaga o le Pule Sili o le Tiute e fuafuaina ai faamaufaailoga, faailogatusi ma faailoga.

Faamaonia.

FUAIUPU 328: Faamatalaga e uiga i vaalele, tagata ma oloa e sopoia tuaoi.

Faamaonia.

FUAIUPU 329: Tuuina atu o faamatalaga e uiga i vaalele, tagata ma oloa e sopoia tuaoi.

Faamaonia.

FUAIUPU 330: Ia tuuina atu e le Pule Sili o le Tiute mafuaaga tusitusia mo faaiuga e avanoa i talosaga tuuina atu i le Pulega o Talosaga a le Tiute.

Faamaonia.

FUAIUPU 331: Tuuina atu o faasilasilaga.

Faamaonia.

FUAIUPU 332: Aiaiga faaopoopo e faasino i faasilasilaga i lalo o lenei Tulafono.

Faamaonia.

FUAIUPU 333: Tulafono Faatonutonu.

Faamaonia.

FUAIUPU 334: Faamaoniga o aiaiga ua tuufaatasia i faasinomaga.

Faamaonia.

FUAIUPU 335: Avanoa i aiaiga ua tuufaatasia i faasinomaga.

Faamaonia.

FUAIUPU 336: Faaaogaina o le Tulafono o Tulafono Faatonutonu 1953 i aiaiga ua tuufaatasia i faasinomaga.

Faamaonia.

FUAIUPU 337: Totogifuapauina, tau faaee atu, ma tupe alu.

Faamaonia.

FUAIUPU 338: Pepa faatumu ua faamaonia.

Faamaonia.

FUAIUPU 339: E ao ona lipotia le faaaogaina o le malosi.

Faamaonia.

FUAIUPU 340: Faailoaina atu o faamatalaga i atunuu i fafo.

Faamaonia.

FUAIUPU 341: O faamatalaga e mafai ona faailoa atu.

Faamaonia.

FUAIUPU 342: E mafai e le Tiute, mo nisi faamoemoe, ona aoina, faaoga pe faailoa atu nisi faamatalaga.

Faamaonia.

FUAIUPU 343: Teuteuga faatupulaia.

Faamaonia.

FUAIUPU 344: Soloia.

Faamaonia.

FUAIUPU 345: Aloaia o gaoioiga i lalo o Maliega i le Va o Malo e faasino i le taofia le tumau o tiute a le Ofisa o Tiute.

Faamaonia.

FUAIUPU 346: Faasaoina mo Taulumaga ma isi mataupu.

Faamaonia.

FUAIUPU 347: Aiaiga tau soloaiga e faasino i fuaitau faaaogaina.

Faamaonia.

FUAIUPU 348: Aiaiga tau soloaiga e uiga i le iloiloga ma le tologiina o tiute.

Faamaonia.

FUAIUPU 349: Nofoga tau suesuega ua faatatauina e avea ma nofoaga e pulea e le Tiute.

Faamaonia.

FUAIUPU 350: Uafu e faasee i ai, ma uafu ua faatatauina e avea ma nofoaga e pulea e le Tiute.

Faamaonia.

FUAIUPU 351: Apitaga o le aufaigaluega, mea eseese e faaaoga ma fale e faasee i ai ua faatatauina e avea ma nofoaga e pulea e le Tiute.

Faamaonia.

FUAIUPU 352: Fale teu oloa mo oloa auina ese atu ua faatatauina e avea ma nofoaga e pulea e le Tiute.

Faamaonia.

FUAIUPU 353: Nofoga e gaosi ai oloa ua faatatauina e avea ma nofoaga e pulea e le Tiute.

Faamaonia.

FUAIUPU 354: Aiaiga tau soloaiga e faasino i aiaiga o tofiga po o laisene.

Faamaonia.

FUAIUPU 355: Talosaga mo laisene e avea ai se nofoaga ma nofoaga e pulea e le Tiute ina ia faia i totonu o le 40 aso faigaluega.

Faamaonia.

FUAIUPU 356: Tulaga tau soloaiga e faaauau seia faia o se talosaga ma faaleaogaina ai.

Faamaonia.

FUAIUPU 357: Aiaiga tau soloaiga e faasino i tagata ua faamaonia ina ia tolopo le tologiina o tiute.

Faamaonia.

FUAIUPU 358: Aiaiga tau soloaiga e faasino i pisinisi e le manaomia ona laiseneina.

Faamaonia.

FUAIUPU 359: Aiaiga tau soloaiga e faasino i so o se suesuega i mataupu tau le va o tagata po o suesuega tau solitulafono i lalo o le Tulafono o le Ofisa o Tiute 1977.

Faamaonia.

FUAIUPU 360: Tulafono faatonutonu tau soloaiga.

Faamaonia.

FAAMATALAGA.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o le Ofisa o Tiute 2014.

Susuga PAPALII LIO FAAVAIVAIOMANU TAEU MASIPAU: Lau Afioga i le Fofoga Fetalai.....

FOFOGA FETALAI: Se i tulai mai le sui usufono mamalu.

Susuga PAPALII LIO FAAVAIVAIOMANU TAEU MASIPAU: O le mataupu muamua i le (3) o lo o i ai i ina i le Fuaiupu 12(7) ma le Fuaiupu 14(5), e le o i ai se (7) ma se (5) i totonu o le Tulafono Tau Faaofi pe mafai ona sui?

FOFOGA FETALAI: E faamaonia e le Fofoga Fetalai le tulaga lea, a o lo o i ai le malosiaga i le Failautusi ona o le typing error. O le a i le Failautusi le discretion e faasao ai le tulaga lea, aua le popole i le tulaga lena.

Faamaonia le Fuaiupu 1 ma le Igoa.

Na faagasolo le Tulafono Tau Faaofi o le Ofisa o le Tiute 2014 e aunoa ma se Teuteuga.

TULAFONO TAU FAAOFI O LE OFISA O TIUTE 2014 – faitauga faatolu

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo e uiga i le Tulafono Tau Faaofi lenei, o lea o le a sagai atu loa le Palemene i lona faitauga faatolu.

Tulai mai le Afioga i le Minisita mo Tupe Maua.

Tofa Hon TUILOMA LAMEKO: Lau Afioga i le Fofoga Fetalai faapea foi sui usufono mamalu o le Maota, a o le i tuuina atu le lafo mo le faaiuina o le Tulafono Tau Faaofi, ia avea ia lou leo e fai ma fofoga tau momoli o le Afioga i le Palemia ma le mamalu o le Kapeneta, aemaise foi o le matou Matagaluega o Tupe Maua e momoli atu le faafetai tele i sui usufono mamalu o le Fono Aoao Faitulafono ona o finagalo sa faaalua i tualumaga o le Tulafono Tau Faaofi lenei a le Tiute. E talitonu le taofi o a outou

saunoaga i lenei aso, o le a mafai ai foi ona toe tilotilo i ai le Matagaluega ma vaai i nisi o suiga e avatu i le Kapeneta pe a talafeagai i se taimi. O lea faamalo faafetai.

Lau Afioga i le Fofoga Fetalai, ou te tulai atu e faatu le lafo, *Ina ia faitauina nei le Tulafono Tau Faaofi o le Ofisa o le Tiute 2014 i lona faitauga faatolu.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

FOFOGA FETALAI: E manatu o lea ua tatou taunuu i le taunuuga o a tatou galuega i lenei aso. O le tatou taimi o lea ua ta tonu le itula e 1:00. Sa i ai le faamoemoe i le lafo faatu a le Afioga i le Palemia o le a sili atu so tatou taimi galulue, ae peitai, ua taotoga tonu a l'asa outou finagalo i se taumafai atu a le Fofoga Fetalai, aemaise o lo outou faaaloalo i le Afioga i le Minisita e a ia le Tulafono Tau Faaofi, masalo o lena ua faigofie ai le tatou galuega.

E momoli atu le faafetai tele i le paia ma le mamalu o le tatou Maota i lenei aso ma le tauavagameaina o le tatou galuega, e le faigofie le galuega sa tatou feagai ai, mai lava i le uluai aso, sa tatou feagai ma le tele ma le anoanoai o fuafuaga matagofie ma fuafuaga lelei e atagia ai le tele ma le anoanoai o le tapenaina o le tatou Fonotaga i lenei masina. O lea foi ua tatou taunuu mai i lenei aso taua, ua tatou feagai ma le faaulufaleina mai o se tasi o sui usufono fou o le tatou Maota. Ia, ou te talitonu ai, ua tele upu i manu, ua tatou sapi i le Atua ma Lona alofa faasalafa ua faapena ona faataunuuina ma le manuia le faatautoga o le tamaitai faipule i lenei aso. Sa tatou tiu foi faamatalaia aua le faaaloaloga a le tatou nuu mai Satupaitea aua le feagai ai o le Afioga i le Minisita ma le tofiga, o ula ia ma aute aua le faaaloaloga pea o le tatou Palemene. Ua toe taliu mai i lenei aso, o lo o talia lupe o mau i le faatalitali mai o le fanau aua lo outou afifio atu aua le faaiuina o le latou polokalame faalauiloa mo taualumaga o le tauvaga lauga e faapitoa mo le tatou Palemene. E i ai le agaga ma le faamoemoe e faafetai atu mo la outou galuega o lenei aso. O le agaga ma le faamoemoe, e leai se isi o tatou e i ai sona malosia atoatoa. Ae faafetai i lo outou onosai i lau Afioga i le Palemia ma le paia ma le mamalu o le Kapeneta. O le tuualalo foi ma le faufautua a lea Itu o le Maota, o a ni a tatou upu ma tala o lenei aso, ia tatou ave ia lea i luma o le nuu. E leai lava se iota e maligi fua o lo outou tautiga. O lea ua saunoa manino le Afioga i le Minisita o le toe Ulutaia foi o le Maota, e tatau ona tatou faatuatua lana saunoaga. O a outou tuleiga ma fautuaga ua tuu atu i le aso, e leai se mea o misi, o le ua tuu atu e matimati ai le tulaia mai o lenei Tulafono Tau Faaofi taua, aua le faamapueina o le tatou Matagaluega o Tiute. E pei ona outou silafia, e le i levaleva atu ona faia le faatofalaiga a le Maota i le tulaga o le faaleleia o le auaunaga. O mea uma lava na tulai mai i lenei suesuega, o lea e matimati ai le lelei o le Matagaluega mo le lumanai. O lona uiga, o le tatou sao taua lena aua le faafoefoeina o le tatou galuega fai.

Se i tulai mai le Afioga i le Minisita mo Galuega Tau Alamanuia ma Atinae a le Malo po o le sui usufono mo Satupaitea.

Afioga Hon LAUTAFI FIO SELAFI PURCELL: Faafetai lau Afioga i le Fofoga Fetalai. E maitau atu o lea ua faaiuiu la tatou Fonotaga i lenei aso ma atonu foi o le tatou Fonotaga mulimuli lea o lenei masina.

Ua ou tulai atu lau Afioga e fia faaleo le agaga o le faafetai i lau Afioga i le Fofoga Fetalai faapea le mamalu o le Palemene, le Afioga i le Palemia, i le tofa tatala ma le tofa fetuutuunai i le aso ananafi i le toe suia lea o le polokalame o le tatou Fonotaga a le Palemene o Samoa, talu ai le taunuu mai o si ou itumalo. E talitonu lava o polokalame faataatia ma galuega o le aso o le Palemene e le soona suia ae o lo outou silasila i le oo mai o si ou itumalo, e pei o le tulaga lea na fai ai. E momoli atu le agaga o le faafetai ona o lo outou silasila maualuga i lou itumalo faapena foi lou sui usufono faatauva. Ua tasi ai se tofa ina ia faataatia taulumaga o le Fonotaga ananafi, ae tatou alo atu e feiloai ma le itumalo. E faamalulu atu i ni sui mamalu sa i ai ni manatu ua toe mou talu ai le sui o le polokalame, ae e i ai le talitonuga e toe oso foi le la ma toe maua nisi manatu lelei. Faafetai foi i lau Afioga i le Fofoga Fetalai ma le mamalu o le Palemene i la outou faaaloalo, ua momoli mai le faamalo ma le faafetai a si o matou itumalo ua toe foi atu i Salafai ma le fiafia. Faatutumu e le Atua mea ua faagaogao, o le a foi se tou maitau i se taumafai a lou itumalo, ia o le agaga lava o le fiafia ma le faafetai i le tulaga ua siitia i ai e le Maota nei aemaise le Afioga i le Palemia le tofi o lenei itumalo, o le tulaga lena o le oo mai. Mo le tou silafia, ua silia nei po o le 40 tausaga lea faatoa toe sii Satupaitea o se itumalo. O le agaga lena e tumu i le fiafia ae tulai atu e momoli atu le faafetai i lau Afioga faapea le mamalu o le Palemene, ona o tulaga na i ai ananafi. Ia manuia tele le alo atu o Samoa i le taligamalo i le faaiuga o le masina nei, manuia le Maota nei, manuia foi le tapuaiga a Samoa.

FOFOGA FETALAI: Faafetai saunoa i lau Afioga i le Minisita. Tulai mai lau Afioga i le Palemia.

LAFO MO LE TOLOPOINA

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu e faatu le lafo, *Ina ia tolopoina nei la tatou Fonotaga seia aulia le aso 21 o Oketopa, 2014 e pei ona faataoto ai i le Polokalame o Fonotaga a le Palemene 2014.*

A o le i aumaia le fesili, ou te tulai atu ma le agaga faaaloalo ona e le toe faaluaina lau saunoaga, a o le faafetai ma le faamalo i le pasiaina o le tatou Tulafono e faagaioi ai a tatou galuega, aemaise lava e le o toe na ma le laina, o le tatou toe Fonotaga lenei ona alo atu lea o le Malo i le taligamalo i le Fonotaga tele o le a usua mai i Samoa nei. O le Aso Toonai o le vaiaso fou e fai ai le sauniga faapitoa e tuuina atu ai aloaia fale uma faapea foi ma malae i lalo o le vaaiga a Malo Afaatasi, aemaise lava i le puipuiga. O aga ia pe a oo ina masii Malo Afaatasi e usua se Fonotaga i se taligamalo a se atunuu o sui o Malo Afaatasi, e i ai le taimi e tuuina aloaia atu ai le pulega atoa o malae faapea ma fale fonofono e take over, e pulea e latou le faagasologa o Fonotaga e ui ina talimalo tatou, aua o le Fonotaga a Malo Afaatasi. O le

aso 4 o Setema e toe faia ai le sauniga e toe tuu aloaia mai ai ia aseta uma o fale ma malae pe a uma le Fonotaga ma o le a toe foi mai lava ia Samoa le vaaiiga o nei fale.

O lou tulai atu la i le taimi lenei ou te momoli atu le faamalo i le Maota nei i a outou Afioga o sui usufono o le Palemene i le tapuaiga ma le lagolago i galuega faatino mo le tatou taligamalo aua e le o se galuega faigofie. E auala atu ai foi lau faafetai i Taitaifono uma lava o Minisita ma Minisita Lagolago, faapea foi ma le aufaigaluega toatele a le Malo o lea ua togia mo le faafeiloaiga o i latou uma o malo mai fafo. E oo lava ia i latou e le gata i le puipuiga ae faapea foi ia i latou uma lava ua aoaoina faapitoa mo le felauaiga o malo faaaloaloga, o Faauluuluga o Malo faapea foi ma Minisita o le a suia o latou Malo, ma faipule foi o le a tumutumu mai i totonu o le tatou atunuu, ona o le taua o le Fonotaga faaii lenei e tolu a'i Fonotaga i le tatou Malo i tulaga o Malo ia a le lalolagi, i tulaga lava i le tagofia o faafitauli o faafegai ma le lalolagi i le vaitaimi lenei.

O le Aso Faraile nei, o lea ua logo mai ai foi au o le a faataitai ai le isi vaega lea mo le tatou taligamalo, o le fale faapitoa lea ua faalupe o le Namua Food Court, o le fale tele lena e lima i ai fale o le a faatino ai le tatou taligamalo. E faapitoa mo taumafa, e toatele le augasese taumafa o le a latou gasea taumafa mo usugafono. O lea la, o i tonu lava i le Aso Faraile i le ta o le 11:00 i le 2:00 o le a faia ai le isi faataitai. e valaau atu ai foi i le Maota nei ma le mamalu foi o le atunuu e oo atu ai o avanoa, sei o tatou muai solia momona o taumafaiga uma o le a fai aua taligasua ua matua tapena lelei i ona tulaga eseese ina ia talafegai foi ma le mamalu o malo o le a fai mai i totonu o le tatou atunuu. O le tulaga o lea o le a faafae loa ia fale fono uma nei a le Malo Afaatasi, o tatou uma o le Palemene nei e tataua ona lesitala e le faapea e saoloto oe, e te alu atu loa taofi oe e leoleo o le Malo Afaatasi. E tataua ona lesitala ina ia auai i nisi o sauniga. Pe a tala aao atu foi le mamalu o le Maota nei i nisi o Fonotaga o le a fai po o sauniga, ia outou manatua ma tatou manatua o tatou lea e talimalo, pe a fai e o mai uma le 3afe lea, o lona uiga e ono i ai se tulaga tatou te oo atu i ai ua tumutumu uma i tatou malo mai fafo, ona o le tulaga lava ia i Fonotaga faapenei, a tatou o atu loa ua tumu, ona tatou malilie lea o tatou lea e talimalo. E moomia tele le tulaga malamalama foi o a outou Afioga i le tulaga e i ai i lalo o le vaaiga a le Malo Afaatasi, o le Fonotaga tele lenei a le lalolagi e usuia mai i Samoa nei, e afio mai ai foi le failautusi aoao o le Malo Afaatasi o le Afioga ia Ki-moon e auai i le Fonotaga.

Lau Afioga i le Fofoga Fetalai, e i ai le sauniga mo le tuuina ifo i lalo o le tatou tagavai ma le tagavai a le Malo Afaatasi o le a faapena foi ona tapena i ai leoleo i tulaga masani ma le mamalu e faatino uma ai ia mea uma nei, e pei lava foi ona tatou maimoa i ai i aso o le Tutoatasi e tuu i luga le fua i tulaga mamalu, e tuu foi i lalo le fua i tulaga mamalu. Ona e le o toe i ai nisi o toe aisili o lea ua iinei le lalolagi atoa e faaali i ai o tatou uiga talimalo ma tulaga tau tausi mamalu. O le avanoa foi lenei ou te avatu aloaia ai mai le Maota lenei le faafetai i ekalesia o lo o latou lagolago i le tolaauina o le malae. A silasila i ai nisi o outou o le tele lava o vaega ua matua aulelei i le faamatagofieina o le malae i fugalaau, o lo o toto solo ai, e le gata i lea ae o le tulaga o le o atu pea e faamama, e aofia ai foi ma nisi o aoga ua latou ofo mai le faamama, e le gata la i le malae ao totonu o le tatou taulaga.

Ua ou taua lea mea, ona o lea foi e alofaiva le mamalu o le tatou atunuu e tali mai i le talosaga a le tatou Malo ina ia teu faamanaia lo tatou atunuu, e leai lava nisi o toe aisili, o tatou lava tatou te faamatagofieina le tatou atunuu. E leai se isi taimi e tuu i ai lo tatou fai mea lelei, o le taimi lenei. I le lolofi mai o Malo esese ma atunuu o le lalolagi, ia o atu ma le tala ave, se e leaga lava le atunuu e mama, leaga le atunuu e tumama ma mananaia le teuga o o latou fale ma o latou malae. E momoli atu le agaga faafetai i afioaga mai lava i o i Satapuala sei tau mai i Apia aemaise lava o le toaiga muamua o le vaaiga muamua e nofo pea i le mafaufau o le tagata. E alu atu ai lava i o ma manatua lana vaaiga o lana uluai vaaiga. A sau lava la le tagata ae vaai atu e mataga le nuu e tumau ai lava lena vaaiga e toe talii atu i atunuu la ma talaave. O le mea la lea tatou te moomoo uma i ai aemaise o tatou o Samoa, taatiaese o tatou uiga fetuiai faalotoifale ao le taimi lenei o le taimi tatou te galulue faatasi ai ina ia silasila atu atunuu i fafo, o Samoa o le atunuu fai mea mafai. O le atunuu e iloa teuteu lumafale.

Lau Afioga i le Fofoga Fetalai o le tulaga lena o lea ua ou tulai atu ai ona mo tatou uma lava tatou te mitamita i lo tatou atunuu, ma avatu ai le faafetai ia i latou uma o lo o galulue faatasi i le uunaia o le tatou taligamalo ina ia atoatoa i ona tulaga eseese. E tele seleni a atunuu o le lalolagi e faaalu i le faalauiloaina o le latou atunuu, ao lea ua o mai lava le lalolagi ia i Samoa nei ma latou tilotilo i ai i lo tatou atunuu ma mea tatou te faia. Lau Afioga i le Fofoga Fetalai, e tele lava isi faamanuiaga e mulimuli mai, aua a o mai tagata nei e o mai ai ma le aufaipisinisi i fafo ma tilotilo iinei, o lea tatou te mananao i ni tagata e i ai ni a latou seleni e o mai e matua atiae ni a latou pisinisi i inei i Samoa e ono maua ai galuega a tatou fanau. O le avanoa lenei aua nei o tatou valetuulimaina i tulaga o le teuteuga o o tatou fale le teuteuga o o tatou aai aemaise pulega mamalu a Alii ma Faipule e vaaia lelei ai ia tupulaga amio le pulea. O le taimi lava lenei e tataua ona vaai totoa i ai, aua e le malamalama le tagata ia e amio le pulea e sana faia ai ana faiga e faamataga ai le tatou atunuu, i le tiai o lapisi e faalapisia ai le auala aemaise foi le tulaga o le faafogafoga mai a atufalega i Apia aemaise le aufaipisinisi sei o ane i latou e teuteu o latou tuafale ma o latou lumafale aua le vaaiga atu i le feafioai o malo mai fafo.

Lau Afioga i le Fofoga Fetalai, e pei o se upu puupuu lena e molimoli atu ai i le agaga faamalo a le Malo le Kapeneta faapea foi ma Komiti o lo o fitaituga i le taumafaiga o le tatou taligamalo ina ia taunuu i se manuia ma fanau mai ai nisi lelei mo le tatou atunuu aua tupulaga fai mai.

Lau Afioga i le Fofoga Fetalai, o le lafo lena ua taoto atu.

Faaluaia e le Afioga i le Sui Palemia ma le Minisita mo Fesootaiga ma Faamatalaga Tekonolosi.

Na faamaonia le lafo.

FOFOGA FETALAI: Tulai mai le Taitai o le Itu Agai.

SAUNOAGA TALIFUAITAU A LE TAITAI O LE ITU AGAI

Afioga Hon PALUSALUE FAAPO II: Faafetai i le avanoa ua tuuina mai e lau Afioga i le Fofoga Fetalai. O lea ua logo faa-Tutuila le Maota aemaise le faafogafoga tapuai a Samoa i le saunoaga a le Afioga i le Palemia. Ou te tulai atu ma le faaaloalo e fai ma sui o lenei itu, e tau fai atu ai se faamatalaga aua o lenei Fonotaga o se Fonotaga taua tele o se Fonotaga e sea sea ona tupu i se atunuu e pei o Samoa. Aepeitai lau Afioga i le Palemia, outou Afioga i alii ma tamaiti Minisita a le Kapeneta aemaise Minisita lagolago ma le aufaigaluega a le Malo, e le lava ni a matou upu e molimoli atu ai lo matou agaga faafetai ona o tapenaga o le Fonotaga lenei e pei ona e saunoa i ai. E ui lava ina tatou le fevaaiai ma lenei itu, ae ou te talitonu o le agaga atoatoa lea o lenei itu ina ia tatou galulue faatasi, aua ia taunuu i se taunuuga manuia ia le Fonotaga a le lalolagi aua e seasea ona tupu. O lea lava matou te faia le faiva o tapuai i outou faiva. O lea ua matou vaai, e le gata i a outou galuega fai aemaise le lagolago a le atunuu e pei ona e saunoa i ai. E tatou te mitamita uma lava e pei ona e saunoa i ai i si o tatou atunuu. O lenei foi mea o le a tatou sauni atu i ai, o se lagona fiafia ma se lagona e faagaetia i ai lenei itu aemaise o Samoa atoa. Ou te faafetai i le tapuaiga a le Aufai-Tatalo o lo o faia le faiva o le tatalo ma nonomanu ina ia manuia le faamoemoe a lo tatou Malo, i le faagasolo mai o usufono aemaise o le taimi atoa i iinei i Samoa, lea ua faafogafoga atu aemaise le tapuaiga a Samoa ina ia tatou galulue faatasi, taoto ia a tatou mea faalotoifale e pei ona e saunoa ao le agaga maualuga ina ia tatou maua se Fonotaga fiafia, se Fonotaga e manuia ai si o tatou atunuu aemaise o a tatou paaga i totonu o lenei vaipanoa o le lalolagi. O le mea lea lau Afioga i le Fofoga Fetalai , o le agaga fiafia lena ma le agaga faafetai o lou nei tagata ma lenei itu, ona ua outou mafai, o le a tatou mafai ona tatou talimalo i le lalolagi atoa. E le mafai ona faia e se isi atunuu, ae ona o le lelei o lau taitaiga lau Afioga i le Palemia aemaise o le lagolago a le Kapeneta ma le Malo, o le agaga lea e faailoa ai le fiafia tele ma le tapuaiga ina ia tatou tuu i le Atua ina ia iu manuia le Fonotaga o le a tatou alo atu nei i ai. O lena e faafogafoga mai Samoa ou te talitonu e pei ona saunoa lau Afioga i le Palemia o lo o tapuaia uma aemaise o le taumafai ina ia faamatagofie atili lo tatou atunuu. O mea ia ou te le tau selu atu i lau Afioga i le Palemia ma lena itu o le Maota, o se agaga fiafia lena. O le matou tatalo ma le matou tapuaiga ia alofa mai le Atua ina ia faapaolo mai ona aao alofa, ma ia faamanuia mai, o a mea uma o le a tatou galulue ai, e leai lava se mea e le mafai pe a faatasi mai lo tatou Matai sili o i le lagi. E le faamatafauloaina sa matou faamatalaga, lau Afioga i le Fofoga Fetalai, o la matou tatalo o outou mama na. O le feagai ai ma le Fonotaga aemaise o le feagai ai o le tatou atunuu ma le taligamalo, ia tatou maua le agaga fiafia ma le agaga faafetai ina ia iu ai mea uma o lenei Fonotaga i se viiga o le Atua. Ia manuia lau Afioga i le Fofoga Fetalai, manuia lau Afioga i le Palemia ma le Kapeneta ma Minisita Lagolago aemaise o le tatou Malo ae ola lenei itu i le alofa o le Atua.

FOFOGA FETALAI: Malo. E manatu o lea ua ao ua piilagi ua le taea i matagi ua tini tauao foi ma soo le ula a le faimea i lenei aso i tuleiga ma saunoaga. E talitonu o lea ua fetai fola i le saunoaga a le Palemia aemaise lau tuleiga saunoaga e ala i le tapuaiga a Samoa, o lea foi ua tali fuaitau le

Taitai o le Itu Agai, ou te manatu o ula ia o le aso ma le faaiuga o le tatou Fonotaga. Tatou saisai laia ma tatou tiu faamatalaoa ma afifi ma ave i le Atua. Faafofoga le atunuu i taualumaga o lenei aso ua tatou tuu faatasi o tatou manatu ma o tatou lagona, ae tatou alo e tali a tatou malo e pei ona o tatou fuafuaina. O le agaga ma le faamoemoe e le toe mala ese lena itu mala ese le itu a le Malo. O Samoa e tasi la tatou tapuaiga o le tatou galuega ina ia uluulumatafolau ma ia faataunuu manuia fuafuaga ma tatou tuu i le Atua, e aumai lana faamanuiaga. Ae e lei faaiuina le tatou mafutaga i lenei aso, e fia faailoa atu ma le ava ma le faaaloalo tele, o le a tapunia la tatou Ofisa o le Fono Faitulafono nei i le Aso Tofi ma le Aso Faraile, ona o nisi o fuafuaga taua mo le tofiga ua tuuina mai mo le tapenaga o le tatou Fonotaga i Tuanaimato, o lo o ua i ai nisi o tulaga, na faalaolao mai lava, ona o lea sa feagai lenei vaiaso atoa ma taualumaga o le Fonotaga, ae ua faalaolao ai tulaga mo le faamoemoe mo le tapenaina o le Gymn 2. O le tatou main venue foi lea o lo o gafa ma le tatou Ofisa lenei o le Fono e agai e teuteu ma faaleleia ma faamatagofie. O le ala lena ua manatu ai e ave le taimi atoa mo uta i le tatou tapenaga ina ia taunuu ma le manuia. Faamanatu atu o le a fai le tatou tamai faafiafiaga e faauma ai lenei masina iina i le laoa o Pau Sefo Pau po o le Seana o lo o pule aoao ai le sui usufono mo Aana Alofi Nu 2 ma le sui usufono mo Siumu. Tatou faatasi e talia ma le fiafia ma le agaga faafetai lo outou afifio atu e togi lau maa i le social club a le tatou Maota Fono, e fesoasoani i nisi o toniga e fesoasoani ai mo le tatou SIDS, ma maua ai foi nai faamalositino i le tagata e lelei lana foai mo le Ofisa o le Fono. E le faatuaoia, o lenei Ofisa e tautua mo outou Afioga i le 24 itula. Afifio atu ma tala atu aao ua i ai faafiafiaga mai fafo mai Peretania, Ausetalia, Niusila ma Saina ua saunia le au tatafiti aua lo outou afifio atu i lea po. Ma le agaga faaaloalo ou te faamanuia atu i lau Afioga i le tamaitai faipule fou mo Gagaifomauga Nu 1 lau Afioga Faimalotoa, o lena ua ou tuuina atu lau Tusi Paia lena ao le Tusi Paia lena e taialaina ai oe e pei ona tuuina atu Tusi Paia uma lava i sui faipule uma. Ma o le faatautoga o le aso, o le faamanatuga lena e toe faamanatu ai i sui usufono uma o lenei Maota, vaai le tatou tautoga o le amio taualoa ia outou tausisia. Ao lei faaiuina le tatou Fonotaga i lenei aso, ou te valaau atu i lau Afioga i le sui usufono mo Salega e te tulai mai o ia te oe le Komiti Tumau o le Ekalesia Metotisi e faaiu le tatou Fonotaga i se tatalo.

Na tolopo Taualumaga a le Fono Aoao i le itula e 1:32 i le aoauli, seia aulia le itula e 9:00 i le taeao o le Aso Lua, 21 o Oketopa 2014.